

**SEVENTH LEGISLATIVE ASSEMBLY OF MIZORAM
(FIFTEENTH SESSION)**

LIST OF BUSINESS

FOR FOURTH SITTING ON FRIDAY, THE 16th MARCH, 2018
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

S.R. ZOKHUMA

Commissioner & Secretary

-
- * Please see Bulletin Part-II No. 205, dated the 13th March, 2018 for relative precedence of Private Members' Resolutions to be moved.

....

SPEAKER : “Mi nun tluangte chu LALPAN a en zui a, An rochan chu an nei kumkhua tawh ang.” (Sam 37 :18)

Zawhna No. 21-na kan la ang a, zawhna neitu MLA zahawm tak Dr.K.Beichhua zawt turin i lo sawm ang.

Dr. K.BEICHHUA : Pu Speaker, ka lawm e. Agriculture changtu Minister zahawm tak hnena ka zawhna chu:

- a) Mizoramah Agriculture SMAM leh RKVY Scheme hnuaiia custom hiring centre engzat nge din anih tawh?
- b) Agriculture department hnuaiiah hian Tractor engzat nge sem chhuah ni tawh?

SPEAKER : Chhang turin Minister zahawm tak Pu K.S.Thanga sawm ila.

Pu K.S.THANGA : Pu Speaker, member zahawm tak Pu Beichhua zawhna chhanna (a) Agriculture department hnuaiiah custom hiring centre hi SMAM atangin 24 leh RKVY atangin 47 din tawh a ni. Tichuan heng scheme pahnih hnuaiiah hian a vaiin custom hiring centre 71 din tawh a ni. (b) Agriculture department hnuaiiah hian tractor engzat nge sem chhuah a nih tawh tih chhanna chu heng custom hiring centre 71 tan hian tractor leh leilehna pakhat theuh, a vaiin 71 pek chhuah tawh a ni. Ka lawm e.

SPEAKER : Zawhbelhna, zawhna neitu Pu K. Beichhua i lo sawm leh ang.

Dr. K.BEICHHUA : Pu Speaker, Siaha District ah sawn Agriculture potential area kan nei nual a, a bik takin i bial lamah sawn. Tunah hian custom hiring centre hi pathum chauh kan nei a, Minister hnena ka zawh duh chu engpawhnise min pek belh thei em ? tih leh tractor pawh hi pathum chiah kan nei a, mipui lo neitute hian kan hmang tangkai angreng viau a. Chu chu a tlem tham deuh hlekin kan hria a. Min pek belh thei ang em tih ka zawhbelhna a ni a.

Tin, Pu Speaker, question hi kan thehluh teuh a, 20 rawn chhuak thin kha 12 chauh tunah hian a rawn chhuak a. Hei hi engatinge? Official lam te hian sorkar hi an ngaihthah ta deuh nge ni tih hi clarification min siam sak theih chuan ka lawm hle ang.

SPEAKER : Chungte chu kan lo en ang a. Minister zahawm tak chhang turin i sawm ang. Pu K.S.Thanga.

Pu K.S.THANGA : Pu Speaker, member zahawm tak Pu K.Beichhua'n, Siaha District ah Custom Hiring Centre pathum din tawh a ni a, 'A dang min pek belh thei ang em' tih chhanna chu, tunah hian 30 pek chhuah theih kan nei mek a, an dil em tih ka hre lova, an dil chuan kan lo hria ang a. Tin, Pu Speaker, keimah ngei pawh hi kan session zawh lamah hian a rem chuan sawtah Phurra thlenga potential saw a taka va en ve ka tum a. Engang tak nge ni tih kha a rem leh bialtu MLA te pawh kha min tawiawm turin kan sawm nghal a ni. Ka lawm e.

SPEAKER : Awle, zawhna 22-na zawt turin Pu T.T.Zothansanga, MLA zahawm tak i lo sawm ang.

Pu T.T.ZOTHANSANGA : Pu Speaker, ka lawm e. Starred Question no.22-na, Minister zahawm tak Law and Judicial changtu ka zawhna chu hei hi a ni: 'Champhai-ah Court building thar engtikahnge sak a nih ang?'

SPEAKER : Finance Minister Pu Lalsawta chhang turin sawm ila.

Pu LALSAWTA : Pu Speaker, member zahawm tak Pu T.T.Zothansanga zawhna chhanna chu hetiang hi a ni. Champhai Court building thar sak tur, Court Hall pasarih awm, proposal sakna tur hi 15th Finance Commission kum 2020 atanga 2025 hnuaiyah fund dil tum mek a ni tih a ni.

SPEAKER : Zawhbelhna a awm em? Aw, han zawt leh rawh, Pu T.T.Zothansanga.

Pu T.T.ZOTHANSANGA : Ka zawhbelh hma lawkin, Champhai Court khi kan mamawhna a rei em em tawh a, tunah hian building kan indaihloh avangin IITC kan hmang tawp mai a. Min sak hmasak tur emaw kan tih kha a dangin min khalh leh thin a. Kan hmanhmawh ang reng tawh khawp mai a; tin, a ram khi kan pe fel tawh a. Zote ten engmah, chengkhat mah pawh ngai lovin Court hmun tur tha tak mai min pe a. Kha kha mipuiin min lo hriatpui kan duh a. 15th Finance Commission hi a lo kal mai lo ve thei a ni a. Khati a nih chuan state fund atang hian min sak sak theih mai dan a awm em tih kha ka zawt a. Tin, building sak rual hian quarter engzatnge min sak tel sak theih ang tih kha kan zawt tel bawk a ni. Ka lawm e.

SPEAKER : Zawhbelhna dang a awm loh chuan Minister zahawm tak chhang nghal turin sawm ila, Pu Sawta.

Pu LALSAWTA : Pu Speaker, tunah hian zawhna neitu MLA zahawm takin a zawhbelhna 15th Finance Commission in a pek loh palh te pawh awm thei a ni a, chutah chuan engtinng e ni ang? State fund atangin pek theih a ni ang em tih chhanna kha chu, state fund atangin kan pe ngei ang tih keiin a han sawi mai chi a ni lova. Amaherawhchu ngaihtuah theih tur chu a nih ka ring a. An mamawh dan te department in kan hrechiang khawp mai a. Chuvangin state fund atanga ngaihtuah theih dan tur kawng chu anmahni lamte pawhin proposal te pawh han siamin a tul angin hma han la se kan lo ngaihtuah ang e. Tin, quarters hi sak tel a ni dawn em tih chungchangah kha chuan heng hi chu a compact area a tih deuh thin a nih avangin quarters te hi chu a design ah khan a tel ngeiin ka ring. Ka lawm e.

SPEAKER : Zawhna dang kan lak leh hma in department thenkhat zawhna chhan ah tlemin kan muangchang deuh niin a lang a. Department te khan zawhna kha chhan ran theih ni sela tih kan inhriattir ni se. Zawhna no.23-na kan la ang a, zawhna neitu MLA zahawm tak Pu Lalthanliana zawt turin ilo sawm ang.

Pu LALTHANLIANA : Pu Speaker, Law and Judicial Department changtu Minister zahawm tak chhan atana ka zawhna chu:

- a) Lokayukta din fel a ni tawh em?
- b) Enge a dinhmun? Ka lawm e.

SPEAKER : Chhang turin Finance Minister zahawm tak Pu Sawta sawm ila.

Pu LALSAWTA, MINISTER : Pu Speaker, member zahawm tak Pu Lalthanliana zawhna, Lokayukta din fel a ni tawh em tih chhanna chu, Lokayukta din fel ala nilo tih a ni a. Enge a dinhmun tih chungchangah hian, tunah hian Lokayukta Chairperson leh member tur atan search committee chuan mi a short list tawh a. Heng mite hi an biodata kimchang nen Selection Committee-ah thawn a ni tawh a ni. Selection Committee hian ngun taka a ngaihtuah hnuah thutlukna chu a lo siam ang. Tin, Lokayukta dinna tur hian officers leh staff post 35 (sawmthum panga) ruahman a ni a. Heng post atana Recruitment Rules pawh peihfel a ni tawh a, tunah hian DP & AR-ah 'filling up of post' dil mek a ni a, min phalsak chuan post

hnawhkhat tura hma lak a ni ang. Lokayukta building luah tur thlan fel a ni tawh a, tunah hian anmahni puala building kan la nei lova, Pu Speaker, chutah chuan mi in luaha tih kan duh a, a building hi chei that hna tan tum mek a ni a, rent agreemet pawh buaipui mek a ni tih a ni e.

SPEAKER : Zawhbelhna a awm loh chuan a dawt ah kan kal thei e. Aw, House Leader.

Pu LAL THANHAWLA, CHIEF MINISTER : A chhang tha a, a lawmawm a. Khami kha han belh tehchiam tur a awm lo na in, tlema kan hmanhmawh theih lohna chhan pakhat chu keimahni mi leh sa te ngei hi awm thei se tih hi kan duh ber a hnam dang ai chuan. Tin, chu loh ah chuan Selection Committee-ah hian Chief Justice of Assam, Guahati High Court, Assam a tel a ngai a. Chu chu hun remchang kan han hrilh a, a lo kal lawk hlei thei lova, tunah hian kan nawr leh mek a, a rang thei ang bera puahchah kan duh avangin. Tin, a candidate tur pawh kha hual ruk te chu kan nei a, kan Minister zahawm takin a sawi ang khan, chung vel chu short list te a ngai dawn a, chuvangin a rang thei ang bera tih kan duh nachungin hun engemawti chu ala duh maithei.

Tin, khami a committee-ah khan, Selection Committee-ah khan, Chief Minister te, Chief Justice te bakah Opposition Leader te kha member kan ni a. Khang kan remchan tlan kha kan nghak mek a ni.

SPEAKER : Aw le, a lawmawm e. Zawhna no. 24-na ah kan kal thei ang a. Zahna neitu MLA zahawm tak Pu R.L.Pianmawia zawt turin i lo sawm ang.

Pu R. L. PIANMAWIA : Pu Speaker, Starred Question no. 24-na SAD changtu Minister zahawm tak ka zawhna chu –

- a) New Secretariat building atana solar vuah kha zawh a ni tawh em?
- b) Office hrang hrang ten current awm loh changin an hmang tangkai tawh em?

SPEAKER : Aw le, Department neitu Chief Minister zahawm tak Pu Lal Thanhawla chhang turin i sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu R.L. Pianmawia zawhna kha

- a) New Secretariat building atana solar vuah kha zawh a ni tawh em tih kha zawh a ni tawh e.
- b) Office hrang hrang ten current awm loh changin an hmang tangkai tawh em? Hmang tangkai tan mek a ni.

SPEAKER : Zawhbelhna a awm a. Zawt rawh le.

Pu R. L. PIANMAWIA : Pu Speaker, ka zawhbelhna chu New Secretariat lamah solar vuah a ni a, an hmang tangkai tawh tih report a ni a, Old Secretariat lamah pawh hian a pawimawh ve tho mai a. Assembly House kawtah hian sorkar in office te min pe ve a, current a awm loh chang hian a mangan thlak ve thei khawp mai a, helama kan officer ho hrang hrangte nen hian harsatna kan tawk thin a. Old Secretariat building lamah hian hma min lak sak ve thei ang em tih ka zawhbelh e.

SPEAKER : Aw le, House Leader zahawm tak chhang turin i lo sawm ang Pu Lal Thanhawla.

Ngawi rawh u aw, in pahnih khan zawt law law teh u. Tu nge zawt hmasa ang? Pu Rinawma.

Er. LALRINAWMA : Pu Speaker, ka lawm e. Ka'n zawhbelhna chu kan Minister zahawm tak chhan atan. Engzatnge he thil ah hian senso a nih tih ni ta se pakhat-na ah. A pahnih – na ah tute nge thawk? A pathumna ah chuan ka'n sawi lawk duh chu tunah hian damdawi in thenkhatah hian solar hi bun a ni ta a ni, a chhiah hian a buaithlak em em a. Tunah pawh a chhe thenkhat hi siam ala ni lova, churang chuan he thil ah hian lo chhe ta se tutenge enkawl ang tih lai vel bawr kha min hrilh thei em tih kha ka'n zawhbelhna a ni e.

SPEAKER : Pu Lalruatkima'n zawt leh se.

Pu LALRUATKIMA : Pu Speaker, kan House Leader zahawm tak zawhna a kha ka'n tuihnih leh duh chu hei zawhna hi 130 ka thelut a, ka

thehlut tam ber a, pakhatmah ala rawn chhuak lo a ni. Dan ang in accept vek a ni a, Department-ah thawn vek a ni tawh a, tun thleng hian ka zawhna pakhatmah ala rawn lang ve lova, ala rawn lut lo a ni, Assembly Secretariat-ah hian. Heng hi chu kan Parliamentary Secretary te pawn min lo enzui sak sela a tha in ka hria. Heti ringawt hi chu kan kalphung tur ni lo deuhin ka hria.

Pu Speaker, kan zawhna SAD changtu Minister zahawm takin min chhan atan New Secretariat-a solar saw tunah hian a function reng em? Nikum lamah khan House-ah hian keimah ngeiin a chhiat thu ka sawi tawh a, 'kan lo en tha ang e,' an ti a, siamthat a ni tawh em? Siamthat a nih tawh chuan engtik atang khan nge a that leh tawh tih ka'n zawt tel a.

Tin, saw mi huam chhunga hmannia hmeithai pakhat Pi Hmangaihi in thiah tak kha sorkar-in a thiah chhan kha a hre reng em? Engvanga thiat nge a nih tih kha ka zawhbelhna a ni e.

SPEAKER : House Leader, Pu Lal Thanhawla chhang turin sawm ila.

Pu LAL THANHAWLA, CHIEF MINISTER : Pu Speaker, State Solar Policy hi kan nei tawh a tunah hian central lam pawhin New & Renewable Energy hi hmang tam ber turin min duh a, chumi zawng chuan hma kan la mek a. Damdawi in pawimawh ah leh hmun hrang hrangah te hetiang hi dah mek zel tum a ni a. Tin, chu bakah Vankaldai-ah mega watt 20 pechhuak thei tur solar power kan din mek a, Thingsulthliahah khian mega watt 2 a tirah chuan kan ti a tunah hian mega watt 5-ah kan raise chho a, chutiang chuan zawi zawiin hma kan la chho a. Hmannia Kolkata-a Magnetic Mizoram kan zuk tirh a show kan zuk neih khan Company pakhat in mega watt 100 min bun sak turin offer an rawn siam a, chu chu kan in be mek a ni. Chutiang chuan kan kal chho mek a. Tin, zirna in hmun hrang hrangah solar lamp te leh khatiang kha an sem mek a. Tin, Assam Rifles te nen pawh kan tangho tha a, saw tah chhim tawp lamah khaw hla deuh ah te pawh kan bei tlang a, tiang chuan tunah hian electrified lo ah pawh solar nen tang kawp in hma kan la chho mek zel a ni.

Pu LALRUATKIMA : Pu Speaker, kan House Leader zahawm tak khan kan zawhbelhna kha a chhang lo vek mai a. (SPEAKER : A eng ber thil kha) Solar installation chungchangah tuna a dinhmun sawlai New Secretariat ami te. Tin, Pi Hmangaihi hmeithai dawrte thiah chungchang kha sorkar-in a hriatpui em tih leh kan member zahawm tak Er. Lalrinawma zawhbelhna kha a chhang lo fai vek a ni. Khalai kha a ziak in min pe dawn nge ni. (SPEAKER : A chhang lo fai vek em ni?) Aw, chhang lo fai vek. (SPEAKER : Company-in an ti mek a tia maw!) Ni lo e, tuna a status te kha kan hre duh a, kan zawt a, a chhia ang khan a awm reng a, liabilities mai a nih avangin sawlai saw engnge kan din hmun, a tha ta reng em tih kha kan zawhna kha a nia. Kan House Leader zahawm tak khan min chhang thei lo a nih pawhin hun remchangah min chhang leh mai turah ngai ta ila.

SPEAKER : Hun remchangah kan la chhan tir dawn nia. Zawhna no. 25-na ah kan kal ang a. Zawhna neitu Dr. K. Beichhua zawt turin sawm ila.

Dr. K. BEICHHUA : Pu Speaker, ka lawm e. Information & Public Relations Department changtu Minister zahawm tak hnena ka zawhna chu-Siaha-a I&PR Office leh Quarters sak that tumna a awm em?

SPEAKER : Minister zahawm tak Pu Lal Thanzara chhang turin i lo sawm ang.

Pu LAL THANZARA, MINISTER : Pu Speaker, member zahawm tak Dr. K. Beichhua zawhna Siaha-a I&PR Office leh Quarters sak that tumna a awm em tih chhanna chu Siaha-a I&PR Office leh Quarters hi sak that tuma hma lak tan mek a ni a, chumi mai piah lamah chuan Multi Facility Centre anga cheibawl turin NEC ah sum dil mek a ni.

SPEAKER : Pu Lalruatkima.

Pu LALRUATKIMA : Pu Speaker, kan Minister zahawm tak khan a chhang thei tho in ka ring a, I&PR Directorate ram hi teh fel a ni tawh a, chutah chuan Controller, Printing & Stationery ram hi teh tel vek niin ka hria a, chu chu a dik reng em? A nih chuan engvanga I&PR-in a Controller, Printing & Stationery ram hi la ta vek nge an nih tih kha ka zawhbelhna a ni e.

Dr. K. BEICHHUA : Pu Speaker, Siaha District hi District senior ber zing ami a ni a. An sorkar department hrang hrang Office te leh Quarters te saw a chhe viau tawh hlawm a ni, condemn tlak vek a ni tawh a, chulai chu hma kan la mek a ni tih min rawn hrilh a, a lawmawm hle a. DPR thehluh a ni tawh em, engtika thehluh nge ni? State NEDP a tih tum nge he hmalak dan hi chiang deuh hlekin min hrilh thei se ka lawm viau ang.

SPEAKER : Minister zahawm tak chhang turin sawm ila, Pu Ruatkima zawhna pawh kha a chhan theih chuan chhang nghal mai se.

Pu LAL THANZARA, MINISTER : Pu Speaker, member zahawm tak Pu Ruatkima zawhbelhna chhanna chu khilai hmun khi thil sawi fel ngai leh en fel ngai awm a ni a, Cabinet meeting-ah ngaihtuah tura chhawp chhuah a ni a, Cabinet meeting hmasa berah rel fel a ni ang.

Tin, Dr. Beichhua zawhbelhna kha hei hi NEC-ah thehluh a ni a, sum dil mek a nih avangin DPR pawh thehluh tel tura ngaih a ni.

SPEAKER : A lawmawm e. Zawhna no. 26-ah kan kal thei ta a, zawhna neitu MLA zahawm tak Pu K. Sangthuama zawt turin i lo sawm ang.

Pu K. SANGTHUAMA : Pu Speaker, ka lawm e. Ka zawhna Starred Question No. 26 Agriculture Minister zahawm tak chhan atan ka zawt e.

SPEAKER : Awle, Minister zahawm tak Pu K. S. Thanga chhang turin i lo sawm ang.

Pu K.S. THANGA, MINISTER : Pu Speaker, MLA zahawm tak Pu K. Sangthuama zawhna –

- (a) Sorkar Flagship Programme NLUP ah hian chhungkaw engzatnge pek ni tawh a, cheng engzatnge sen a nih tih chhanna chu - NLUP-ah hian chhungkaw 1,34,689 pek an ni tawh a, cheng nuai 1,29,306 sem a ni tawh.

Tin, helaiah hian ka sawi belh duh chu tunah hian cheng vaibelchhe 80 sorkar kum kal lai mekah hian dah niin chhungkaw 16000 thlan fel mek a ni tih kha ka chhan belhna ni sela, ka'n sawi belh hlek a nih chu.

- (b) Heng pekah te hian chhungkaw engzatnge hlawhtling ni a in hriat tih chhanna chu – NLUP hnuuia tanpuina pekte zingah hian hlawhtlinpui tam tak an awm a, hemi chungchang zirchianna Impact Analysis hi neih mek a ni a, he zirchianna hi zawh fel a nih hunah chauh chhan theih a ni dawn a ni.
- (c) Pek leh zel tumna a awm em tih chhanna chu – Pek chhunzawm zel tura ruahmanna siam mek a ni.
Pu Speaker, ka lawm e.

SPEAKER : Zawhbelhna, a neitu Pu K.Sangthuama.

Pu K. SANGTHUAMA : Pu Speaker, ka lawm e. Ka zawhbelhna pakhatna – NLUP dawng mi engzatin nge Bank Account hawng? Pahnihna – 2018 inthlan puan tawh hnuah NLUP pawisa te hi anmahni account ah direct-a khung tumna a awm em? Pathumna - Hlawhtling teh dan hi engtinng e in teh?

SPEAKER : Pu Rinawma'n zawt law law se.

Er. LALRINAWMA: Pu Speaker, ka lawm e. Minister zahawm tak chhan atana ka zawhbelh chu – Pek leh zel tumna a awm em tih kha pek belh zel tum te a niin kan lo hria a. Tin, tuna an thlan mek chhoah hian tutenge thlang tih leh hemi NLUP dawng tur hian eng tehkhawng nge hman a nih tih kha ka zawhna a ni.

SPEAKER : Pu Ruatkima'n zawt law law se.

Pu LALRUATKIMA : Pu Speaker, ka lawm e. Ka zawhbelhna chu – NLUP ah hian sum engzahng e hmuh a nih? Convergence scheme te nen vek a vaiin engzatng e hmuh a nih a, material component-ah engzatng e ni a, office expenditure-ah engzatng e kan senso tih ka zawt e.

SPEAKER : Awle, Minister zahawm tak chhang turin sawm i la. A then phei kha chu a chhan tawh hnu a nia. Pu Pianmawia, a tam tawh a nih hi.

Pu R. L. PIANMAWIA : Pu Speaker, NLUP chu kan lawm tlang baw k a, a lawmawm hle in ka hria a, veilam amite pawhin an lo ngaina in an lo ngai ropui hle a ni tih a hriat a. Chuvang chuan hetiang a miretheite thlang phak programme tha hi sorkar kal tawh khan a lo kalpui tawh thin em, hei aia tha lo kalpui tawh a nei em tih ka zawh belh e.

SPEAKER : Minister zahawm tak chhang turin sawm ila. A inziak tawh bawk a, a chhang kim thei ang chu maw.

Pu K. S. THANGA, MINISTER : Pu Speaker, zawhna kha a tam angreng a, ka chhan kim loh leh min lo zawt mai ula. Tin, heta chhan nghal vek mai chu a harin ka ring a, a chhan chu kan lo inbuatsaih loh lamte a ni deuh a. Starred question neitu zawhna – NLUP dawngtu engzatin nge bank account hawng tih hi tuna kan chhanna kha a ni turah ka ngai a. Chhungkaw 1,34,689 hian bank account an hawng ang a, tunah hian chhungkaw 16000 in an hawng leh mek. Kha kha bank account through a pek an nih thin avangin chhan theih dan chu a nih deuh ka ring a, a beneficiaries te khan bank account atanga la an nih hlawm tlangpui avangin.

Tin, hlawhtling tehkhawng engnge tih kha a tehkhawng lam kha chu an eizawna kha a hma aiin a lo sang a, cheng sing 4/5 pawh kum khata thar chhuak lo ten kum khatah nuai khat aia tam te, nuai 2/3 te. Hmanniah hetilaia NLUP Kutpui kan neihah te phei kha chuan hlawhtling tak tak kha an lo tam hle mai a, kan ngaihthlak sen loh khawpa tam kha an awm a, a bu ten an siam a. Khang kha kan MLA zahawm tak te hi an lo kal ve lo a ni mai thei a. Khangah khan an hlawhtlinna te chu a hma aia an dinhmun a sanna hi a tehkhawng pawimawh tak ni turah kan ngai a ni.

Tin, tutenge thlang tih zawhna kha chu NLUP Implementing Board in, MLA Congress-ah pawh kan senior, Minister hlui zahawm tak Pu J.H. Rothuama hovin Implementing Board an awm a. Chung chuan ruahmanna fel tak siamin anmahni District theuh atangin DC te kaltlangin chutiang chuan ruahmanna an siam a. Chung chuan beneficiaries thlan dan leh tul zawng zawngte chu Implementing Board in ruahmanna an siam anga a kalpui a ni.

Tin, material component-ah engzatnge awm tih hi chuti mai chuan ka sawi mai thei lova. Kan hriat angin Agriculture Department kan enkawlina a la rei lova, khang zawng zawng kha vawiinah hian ka hre lova, a tul a nih chuan ziakin kan lo pe thei ang tih kha ka chhanna ni sela.

Tin, sorkar lo kal tawhin khatiang kha kalpui ve an awm tawh em tih lai kha chu tun sorkar lovah hi chuan hetiangam ram pum huap thil ropui tham, cheng vaibelchhe sang tel involve-na, mipui kuthnathawktute hnena pawisa pakhatmah an

chanai lak sak awm lova kal zo vek ang hi chu Mizoram-ah a la awm lova, tin, khawvelah pawh a awm ka ring lova. A chhan chu India ram ngeiah pawh hian Pu Speaker, hemi chungchangah hi chuan India sorkar state hrang hrang pawh hian tunah hian kan sorkar thil tih dante en in, wawiinah hian Mizoram sorkar tih ve dan te en turin Prime Minister ngei pawhin state thenkhatte chu thurawn te pawh a lo pe a. Tin, state lian deuh District thenkhatah Mizoram tihdante pawh hi entawn turin an hrilh a ni. Tin, chubakah chuan UNO hian an tuipei em em mai a, tunah pawh hian UNO atang hian hemi kawngah hian hmalakna rawn chunzawmna ang ruahman na programme tha pui pui a lo kal a. Tunah mai pawh hian IFAD an ti a, UNO peng pakhat Rome headquarter a hmangin chungte pawh chu tunah hian a project cost hi vaibelchhe 50 vel tur lai a ni. NLUP hnathawh UNO in a lo hriat atanga hmalakna lo kal chunzawm a ni. Chutiang chuan tunah hian agreement siamin Agriculture Department bawh hi a nodal department kan ni dawn a, tahchuan CEO tur te pawh kan thlang fel tawh a, Office lamte pawh an inbuatsaih tan a, chutiang chuan hmalak tan a ni. Hetiang ang programme lian hi Mizoram sorkarah chuan a la awm ngailo a ni tih kha ka chhan theih chin a ni e. Pu Speaker, ka lawm e.

S P E A K E R : Pu Zawma hian a la phar, i lo sawm ang.

Pu VANLALZAWMA : Pu Speaker, ka lawm e. NLUP Implementing Board hnen atangin February ni 9 khan MLA te D.O. letter thawn theuh niin a lang a, chutih mek lai chuan opposition lamte hi chuan kan dawng ve lem lova, chu lehkhah ah chuan, ‘i bial chhung atangin cheng nuai 400 dah a ni a, beneficiary pakhat zel tan cheng nuai khat theuh ruahman ani, i bial chhung atangin beneficiary zali i thlante NLUP Implementing Board-ah February ni 14, 2018 aia tlai lovah rawn thehlut tura hriattir i ni e,’ tih a ni a. He lehkhah a lan dan hi chuan MLA pawh kha a thlangtu an va nih mai hmel ve ka ti a. Chutih mek lai chuan keini opposition lam hi chuan ruling lamin an dawng vek pawh kan hre chiah lova, keini lam hi chuan kan dawng ve lova, hei hi engnge a awm zia tih min hrilhfiah thei em tih kan Minister zahawm tak kan zawt a ni.

Pu K. SANGTHUAMA : Pu Speaker, ka zawhbelhna pakhat kha chhan loh a la ni a, khawngaihin Minister zahawm tak khan min chhan theih chuan a lawmawm khawp ang. Hei tun 2013 inthlan dawn pawh khan (tlem kan sawi belh ang a) beneficiary te kha direct in a acount ah khan inthlan puan tawh hnu khan thun

zung zung mai a ni a Bank ah khan kan hre vek a. Chuvangin kuminah hian kan inthlang leh dawn a ni a, inthlan puan tawh hnu November velah inthlang dawn ta ila, October-ah chuan an puang tawh ang a, September vel chho ah khan 2013-a an tih ang tho khan direct hian Pu Speaker, khung leh mai hi an tum dawn em tih kha ka zawt duh a, a chhang theilo a nih pawhin a theilo a ni mai a, hei hi chu mipui tam takin an complaint a. Chuvangin Mizoram mipui zawng zawng pawh hian hria se chu a thain ka hre khawp mai. Khawngaiha min chhan theih chuan a lawmawm khawp ang.

Pu H. ZOTHANGLIANA : Pu Speaker, ka lawm e. NLUP hi chu a tha a ni, a tu a te pawh hian han sawi chhuak zeuh se, sawi tur hi a lo piang zawih zawih mai a, a hlu a ni. I veilama thute pawh hian sem ve an chak a ni, chu chu a lan dan a ni a Zoram mipui tan hian a chhawrnaawm em em a ni tih hi a Chiang leh thin a. Pu Speaker, sorkar hmasa huna ki dang a chian nan MNF sorkar lai khan mipuite hnenah kut hnathawktute lo neitute tanpui nan Mizoram Intodelhna Project tih emawni (MIP) an tih hmang khan tanpuiina cheng engemaw zat pek tura tiam a niin ka hria a. Khatah khan engzatnge an tiam zat kha ni a, engzat tak tak nge ni an pek tak, kum 10 an sorkar chhung khan tih kha hriat a chakawm riau in ka hria a, khawngaih takin min chhan theih chuan a lawmawm ngawt ang, kan zawh belh a ni e. Ka lawm e.

Er. LALRINAWMA: Pu Speaker, ka lawm e. Minister zahawm tak khan ka zawhbelhna min chhang lova, NLUP an thlannaah hian eng tehkhawng nge an hman tih lai kha a ni mai e.

Pu T. SANGKUNGA : Pu Speaker, anrawn sawi chhuak ta rau rau a, ka hriat sual loh chuan NLUP singthum theuh Congress sorkar hmasain kan sem khan a aia tha MIP singnga theuh sem tiam kha a ni a. Singnga kha an sem ta reng em le tih leh mipui zingah hian, beneficiary zingah hian NLUP dawng nge tam MIP tih te kha kan Minister hian thil a hre bawk a, a hriat mai kan ring a. Tunge dawngtu tam? A aia tam zel intiam a ni mai a, tunah pawh SEDP kan ti a, nuaikhat sem khan nuaithum intiam leh a nia, a hmasa kha an thutiamah hian an rinawmin an tihlawhtling tha reng em le tih kha kan zawt a ni.

Pu LALRUATKIMA : Pu Speaker, ka lawm e. NLUP hi sorkar flagship programme kan ti a, sorkar flagship a nih si chuan engatinge sorkarin

guidelines mumal tak siam ang khan vawiin thleng hian kal harsa kan tih em em? Engnge a chhan tih kha ka zawh belhna ni sela.

A dawt lehah chuan NLUP beneficiary additional bial tinah mi 400 theuh beneficiaries thlang leh tura hriattirna kha opposition MLA zawngin kan hmu lo a ni. NLUP kan bialah kalpui ve tur a nilo nge, he thil hi political party flagship pakhat ve mai a nih tih kha ka zawt duh a. A chhan chu chutianga sorkar programme ti reng si a, party mal anga kalpui chiam chiam mai hi kan ram economy pawhin a tuar thei a, kan moral pawh a ti chhe thei a, kan value system thlengin a ti chhe thei a ni. Chuvangin, guidelines fel tak ang khan tun thlengin kan kal lo niin a lang a, khang kha enge a chhan chiah tih ka zawh belh a ni.

SPEAKER : Pu Vena han zawt ve teh, khilam khi..

Pu R. VANLALVENA : Pu Speaker, ka lawm e. Kan Minister zahawm tak chhan atan ka zawh belh duh chu NLUP-ah hian Congress party chauh thlan an ni em? tih a ni e, ka lawm e.

SPEAKER : Ngawi rawh aw, a tam tawh khawp mai a.

Pu LALTHANLIANA : Pu Speaker, a changin pathum chauhte kan la a. Hemi chungchangah hian sawihona hun i hawng nge ka hrethiam lo, a duh duhin an zawt a, i entertain vek baw si a. Kan danah hian pathum aia tam zawh phal a ni ta nge ni? Hemi zawhah hian ka zawhna a awm dawn a, hmannah in kal pel tawh baw a, a kal pelh leh pheh chuan. Enge ni kan kalphung hi ka hrethiam lo, ka zawt a ni.

SPEAKER : I duhtawh tawh ang u aw, dan pawhin a phal zozai tawh lo ve.

Dr. K. BEICHHUA : Pu Speaker, pakhat te chauh. Kan NLUP hi Prime Minister Special Package atanga a hrana pawisa lo kal nge ni state pawisa tih kha ka rawn zawt leh e.

SPEAKER : Khai le, a zavai khan Minister-in a chhang ang a, tumah zawh awih tawh loh, a tam tawh em mai. Minister zahawm tak sawm ila, a chhan theih chin chin kha a chhang tawh ang chu, a tam zozai em mai.

Pu K.S. THANGA, MINISTER : Pu Speaker, NLUP hi chu a ropui a niang, kan sawi chhiat reng lai pawh hian tel ve lova kan inhriat hi chuan kan vui leh thin a, engpawhnise hei hi a ropuina zelah ngai ila.

Member zahawm tak takte kha a zawttu hming ka rawn sawi kher lo mai ang a. NLUP Implementing Board Chairman atangin Congress MLA chauh thlang tura tihna an dawng tih kha chu Implementing Board in an lo ti a nih chuan ka hre lova. Engpawhnise, a buaipui leh a thlang duh MLA kha thlang turin an ti ni maiin ka hria a, Mizoram pum huapin a kal a ni. Opposition MLA te hi Implementing Board khan an tuipui vak lova an hriat avangin an lo pe lo palh a nih chuan ka hre lova. (PU LALRUATKIMA : Pu Speaker, NLUP hi nodal department chu Agriculture a ni a, Agriculture Minister zahawm takin a hriatpui tur a ni, a hriatpui loh chuan a dik thei lo)

S P E A K E R : I zawt tawh a, mi dinlai chuan tibuai tawh lovang.

Pu K.S.THANGA, MINISTER : Pu Speaker, kan chhang ang e, min lo ngaichang ula. Chuvang chuan a tuipui MLA te hnenah an peah i ngai mai ang. A tuipui lo te, a thalo ti tute leh sawichhetu MLA te kha an lo pe lo palh a nih chuan, a hlawhchham ringtute khatiang ang vel kha Implementing Board in an lo thlang lo a nih pawhin mipui chu a huap tho ang.

Pu Speaker, kan sawi chian duh chu hetilaiah hian baseline survey neih tirha Mizorama NLUP dawng thei chin baseline survey-a a lan dan chuan chhungkaw nuaikhat leh singnga (150,000) vel a ni. Amaherawhchu, mihring pun chhoh dan azir te, erawh chuan tlem tlem chuan a danglam thei ang a. Chutah chuan, nichina ka chhannaah khan chhungkaw nuaikhat singthum sangli (134,000)leh tuna chhungkaw singkhat leh sangruk (16,000) in an dawn leh vek hian chhungkaw nuaikhat leh singnga (150,000) a kai tawh dawn a ni. Pu Speaker, khang zawng zawng kha Congress party ringawt an ni lo tih tunah hian ka sawi duh a ni. Chuti nilo ta se Congress vek an nih chuan hetilaia i veilama thute tan hian politic-ah sawi ve tur a awm tawh lovang. Vawiinah hian sorkar te an la tum a, election te chuh an la tum a nih chuan chhungkaw nuaikhat singnga (150,000)-ah khan an mite an tel ve a ni tih hi an hriatchian atan kan sawiduh a ni. Chuvangin, hei hi party mal programme a ni lova. Sorkarin flagship programme anih angin, vawiinah hian Mizorama baselkine

survey in a cover ang kha chuan tun financial year kal mekah hian an dawng vek dawn a ni tih chiang deuhin kan sawifiah duh a ni. A thlanna tehkhawng hi chu sorkar hnathawk lo, chhungkua eizawna atana kuthnathawh hmang, lo neih a ni emaw, ranvulh a ni emaw, dawr te emaw, khatianga an income kum khata cheng nuai ang chin la pha lo ang chi zawng zawng kha chu, sorkar hnathawk lo an nih chuan a huam vek a, tehkhawng dang, a hranpa in hemi atan hian a awm chuang lo va. Kan ram mipui an harsatna chhawmdawl na tur anih avangin khang zawng zawng te kha chu NLUP hian a cover vek a ni. Tin, flagship guideline angin a kal lo tih hi a guideline angin engkim hi kalpui zel a ni. Road map duan ang khan vawiinah hian tha takin kan kalpui a. Chu chuan Mizoramah hian malsawmna nasa tak min thlen mek a ni.

MLA zahawm tak Pu Vena zawhna kha ka chhang nghal ni deuh main ka hria a, Congress chauh thlan an ni em tih kha. Congress chauh a ni thei lo va, chhungkaw 150,000 lai kan thlan tawh chuan baseline survey a NLUP dawng thei tura tih hi an kim deuh vek tawh a. Mahse lo indang chho zel an awm dawn avang erawh chuan a pa inah dawng mahsela, in hrang a lo chang a, bul a tan that leh a ngaih avang erawh chuan a la ngai ang a. Tin, chung bakah te chuan eng emaw chhan leh vang danga lo la dawng ve lo te pawh an awm thei a. Khang ang la hmaih kha chu la tih leh zeuh zeuh a ngai ang. Engpawhnise, party mal ni lovin rampum huapa kuthnathawktute, sorkar hnathawk lo chhungkua te hi hei hian a huam a ni. Pu Speaker, kha kha ka chhanna chin ni mai sela. Zawhbelh duh an awm leh.

S P E A K E R : A awm tawh lovang. Aw, House Leader a ding a.

Pu LAL THANHAWLA, CHIEF MINISTER : Pu Speaker, sawifiahna tura tha ber ni a ka hriat chu 2013 inthlan zawh khan, kan han chak leh khan Congress party, opposition party lian ber President-in, ‘An NLUP hi a ni kan hneh loh ber ni,’ a ti. Hei hi chanchinbu tam takah a awm a, an NLUP hi a ni kan hneh loh ber ni. Chu chu opposition party lian ber President-in a ti a nih chuan NLUP hi a hlawhtling a ni tih hi a pawmnaah ka ngai mai a, chu chu No.1 a ni.

Tin, a pahnihnaah chuan hemi growth rate indicators te zinga pawimawh ber chu economic policy hi a ni. NLUP hi Congress party economic policy te zinga kan ngaih pawimawh ber a ni a. Mi hausa leh mi khawsa thei te a zawng lo va, sorkar hnathawk te Lal Isuan “heng mite ber pakhat chung a in tih hi ka chung a ti in ni e”, a

tih te chauh kha a ni a zawn ni, chung mite tan chuan a ni. Party panga President in tha an tih avangin Prime Minister hnenah anmahni signature theuh in titawp turin an zuk ngen a. Hmanah helaiah pawh hian a lehkhka ka phawrh tawh in ka hria a, a tul hunah chuan ka phawrh leh thei tho ang a. Mahse, Prime Minister in a ti tawp lo a ni. Tih tawp ahnekin state dang hnenah; ‘Hei hi a tha khawp mai a, in tih ve theih chuan,’ tiin a zawrh zawk a ni tih kan hria a, NITI Aayog-a an thawk tute hnen atangin. Chutiang chu NLUP hi a ni.

Tin, UNO ko haw tu ber chu NLUP hi a ni, kan ramah office te pawh an rawn hawn nachhan hi NLUP hi a ni. Tin, hmannah ka sawi tawhin ka hria a, state thang tha tehna ber chu growth rate an tih hi a ni a. Growth rate inngahna ber pakhat chu economic policy hi a ni. NITI Aayog-in an tehkhawngah chuan hmannah ka sawi tawh a, vawinah hian growth rate-ah India rama a ti tha ber state pali zingah Mizoram hi kan tel a ni. Kan economic department tih a ni lo, NITI Aayog tih a ni. Tin, next fiscal-ah phei chuan kan growth rate hi two double digit-ah min forecast sak nghe nghe a ni. Hei hi Mizoram sorkar tih a ni lo. Tin, kan per capita income hi national average aini a sang zawk a. National average chu 93293 a nih lain keini hi 95317 a ni. Hei hi a indicator leh a growth in base na pakhat ber chu economic policy a nih avangin a main indicator chu kan NLUP hi a ni tih hi a chiang khawp mai. Hei hi India ramin a pawm a, khawvel economist pawhin an pawm lo thei lovang. Tin, chumai chu a ni lo va, Think Tank Organization on the Quality and Level of Governance in the State of India hi Bangalore-ah khuan an awm a. IAS retired te, Economist te, High Court leh Supreme Court Judge te an ni a. Chung ho chuan Mizoram hi all round base state-ah an declare a ni. India ramah state lian 17 an awm a, chuta a ti tha ber chu Kerala a ni a, Tamil Nadu, Karnataka, Maharashtra in a dawt a. Tin, khami indicator focus point 25-ah indicators 65 vel zingah khan small state-ah Mizoram hi pakhatnaah an puang a ni. Hei hi Mizoram sorkarin a estimate a a tih a ni lo va, Think Tank, mithiam awmkhawm ten an tih a ni. Chuvangin NLUP hi sawichhe thin mahsela a tha a ni tih hi a dik a. Tin, Lal Isuan, “heng ka unau mite ber pakhat chung a in tih hi ka chung a ti in ni e” tih hi keini ang chuan kan thiam tawh leh phak ang tawka kan implement ve na a nih avangin malsawmna pawh a dawng a ni. Hetiang hian India ramah growth rate-ah state ti tha ber pali zingah Gujarat, Jharkhand, Tripura leh Mizoram te kan ni.

Pu LALRUATKIMA : Pu Speaker, kan House Leader zahawm tak a ni a, kan zah em em a, kan ngaithla a. Amaherawhchu, question hour a ni a, a changtu Minister a ni chiah lo a, hun zalen tak i pe bik kha chu a diklo a ni.

Pu LAL THANHAWLA, CHIEF MINISTER :....(Interruption) NLUP hi kan sorkar chhung chuan kan kalpui dawn a, tunah pawh hian bial tinah 200 vel theuh kan thlang leh dawn a ni. A pawisa pawh kan dah a ni. Tin, hemi tichangtlung tur hian New Economic Policy Planning Minister zahawm takin a rawn duang chhuak leh tawh a, heta tang hian kan thalai lekhathiam te sorkar hna ah kan leng vek dawn lo. Company kan nei lo, industry kan nei lo, employer tha ber chu sorkar a ni, a dawt ah kohhran. Chuvangin kan thangthar lekhathiam te hi anmahnia eizawna ngialnghet an neiha zahawmtaka an khawsak theihna turin entrepreneur development lamah kan kal a, hemi atan hian Indian Institute of Management, Kolkatta, management lama institute tha ber te nen tie - up kan nei a, wawi hnih wawi thum seminar kan nei tawh a ni. Chutiang chuan economy-ah kan thang zel dawn, Pathian kaihraina in.

SPEAKER : No.27-na ah kan kal thei ta e. Tunah chuan zawhna neitu MLA zahawm tak Pu Lalthanliana zawt turin sawm ila.

Pu LALTHANLIANA : Pu Speaker, ka lawm e. Kei chu tawi te te hi ka zawt thin a, midang tan hun ken nachang hi ka hre ve thin a. A dawt leh atan tawi te ka zawt ang, ka zawt nawn lo bawk ang, ka zawt belh lo bawk ang, thian te tan.

Law & Judicial changtu Minister zahawm takin min chhan turin ka zawhna chu hei hi a ni e. High Cour Building sak tan a ni tawh em? Enge tun dinhmun tih te kha ni a, ka lawm e.

SPEAKER : Department neitu, Minister zahawmtak Pu Sawta chhang turin sawm ila.

Pu LALSAWTA, MINISTER : Pu Speaker, member zahawm tak Pu Lalthanliana zawhna High Court Building sak tan a ni tawh em? Enge a dinhmun Tih chhanna chu – High Court Building hi sak tan a ni tawh a, hei hi kum 2017 atang khan sak tan a ni a, tunah hian earth work zawhfel a ni tawh a, a ban (foundation), a beam lei hrul engemaw zat siam zawh a ni tawh. 2017 December quarter ending thlenga overall physical progress chu 2.0% a ni tawh tih a ni e.

SPEAKER : Zawhbelhna a awm lo a, a lawmawm e. Zawhna no.28-na, zawhna neitu MLA zahawm tak Pu K.Sangthuama zawt turin sawm ang.

Pu K.SANGTHUAMA : Pu Speaker, ka lawm e. Starred Question No.28-na Planning Minister zahawm tak chhan atan ka zawt e.

SPEAKER : Planning Minister zahawm tak Pu Sawta chhang turin i sawm ang.

Pu LALSAWTA, MINISTER : Member zahawmtak Pu K.Sangthuama zawhna – NEDP ₹ 750 crore atangin cheng engzatnge hman anih tawh tih chhanna chu hetiang hi a ni.

NEDP sum ₹ 750 crore hi kum kal mek 2017 – 2018 atana dah a nih avangin hemi Financial year chhung hian Department ten an hman zawh ngei beisei a ni. ₹ 750 crore kha tih a ni e.

SPEAKER : Zawhbelhna a awm em? Pu K.Sangthuama.

Pu K.SANGTHUAMA : Pu Speaker, a chhanna kha a chiangnial lo a. Nikum tun ang hun vel khan hemi NEDP hi vawiin ni ang te leh tunkar financial year ral dawn tep khan an bei mawlh mawlh mai a, hnathawh mumal mang loh te nen khan an bill a, tikhan an bei chhiam mai a, kha kha kumin ah hian tih leh loh in, a hma in in lo thawk zo thei lawm ni? ₹750 crores chauh a ni a, kha kha khawngaihmin min chhan theih chuan ka lawm khawp ang.

SPEAKER : Rawtna a ni lawm ni, i rawt a ni lawm ni?

Pu K.SANGTHUAMA : Pu Speaker, ₹ 750 crores hmang zo tur hian financial year dawn tepah MB-ah te Bill khung lo khan a hma deuhin a tih theih lawm ni? Tunhma tlema kan changkan hma hret a kan lo tih ang kha ni tawh lo in, tunah hian a dawn tepa ti lo in a hma khan a lo thawh theih loh em ni? PWD te hi financial year zan te hian kan tlaivar a, kan ti chuk chuk a, chung chu a awm tawh lo a, nikum khan a awm leh a, hetiang hi a awmlo a tih theih lawm ni? Pahnihna, NEDP pawisa hi eng atan ber nge hman a nih?

SPEAKER : Awle, Minister zahawm tak chhang turin ilo sawm ang. Pu Ruatkima'n zawt nghal sela.

Pu LALRUATKIMA : NEDP sum 2017-2018 ami, ₹ 50 Finance Department ami kha eng atan nge hman tur a nih tih ka zawh belh e.

SPEAKER : Minister zahawm takin chhang tawh sela.

Pu LALRUATKIMA : Khawngaihin kan Minister zahawm tak khan a hrechiang lo a ni mai thei a. Finance Minister ah ₹ 50 park a ni a, Planning Department atang chuan a hmanna kan hre rih lo a ni tih a ni a. Amaherawhchu kan Minister changtu zahawm tak hi, Department pahnih enkawlna atana hman tur nge a ruahhman na tun thlenga hriat la ni bawk si lo hi ₹ 50 crores lai a ni si a tih kha kan zawt a ni.

Pu LALSAWTA, MINISTER : Pu Speaker, member zahawm tak zawttu zawhna kha kan chhang hmasa ang a. Tuna a zawh paha a sawi tun hma deuha khatia financial year tawp dawna tih khan 1990 – 2008 thleng kha chuan a rual vek khawp mai a, tunah hi chuan chutiangan kan ti lo a. Department ten pawisa hmanna tur an buatsaih, an ruahhman hi DPR kan tih, Detailed Project Report tih hi uluk ngai tak mai a ni a, a then te phei hi chu 3 inches laia chhah te a ni a, chutiang Holy Bible tiat tiat anga chhah te hi a nih chang te a awm a, chung avang chuan Department te hi dem ngawt theih an ni lo a, an buaipui nasa em em a, chungte avang chuan anni tan pawhrawn tih zung zung theih a ni thin lo a. Amaherawhchu kumin hi chuan ₹ 750 crores hi hman zawh ngei theih kan tum a, tunah pawh hian financial year ala tawp loh avangin kan la kal mek zela, chuvangin ka zawhna chhanna kha, ‘la kal mek’ a ni a. Vawiinah te pawh treasury lamah pawh payment hi ala kal chho mek zel ang a, chuvangin a zawhna chhanna kha a dik chiah a, department ten an hman zawh ngei beisei a ni tih kha. Khang bak kha chuan a cheng zat chiaha zuk chhan thiam kha a har hrih a, la kal mek thil a ni a.

Tin, NEDP hi eng atan ber nge tih zawhna kha chhan ngailo hiala ngaih, mitin hriat tawhah ka lo ngai a. Amaherawhchu, kan House Leader khan chiang deuhin nichin ah pawh khan a sawi a, chuvangin NEDP hi NLUP hmangin chhungkaw rethei tam tak te, family oriented in beneficiary type in kan kal a. Mahse chung chuan sustainable economy min siam vak lo thei a, anmahni mal te te in a nih theih avangin anmahni chhungkua dinhmun alo tha hret pawh chu kan lawm em em a. Mahse ‘subsistence level’ atanga ‘Market economy’ chhuak tur hi chuan Alu quintal 30 thar chhuak thin in 300 quintal tal, chu aia tam te an lo thar chhuah a,

market economy kan tih theih nan leh chu chuan eizawna ngelnghetah lo neitu, ran vulhtute an luha, an bur char chara an tharchhuah tam a, chu an tharchhuah tam chu market lama an lo kal a, company te nen pawh inbe rema, keimahni ngei te pawhin company kan siam a, chungah chuan kan thalai, vawiina hna thawh mai tur hre lo te pawhin company te din a, entrepreneur tha tak tak te kan lo neih theih a, kan economy hi (SPEAKER : Hun a tawp a, mahse i chhan zawh tir ang aw) a lo that chhoh theihna turin NEDP hi buatsaih a ni a. Chutah chuan sorkar hian remchanna tinreng leh an mamawh intawm kawng te, a dahkhawmna tur te, khawl te, thil manto ang chi te hi kan buatsaih ang a.

Mipui lam chuan a thawh lam an tum ang a. Tin, kan mihausa leh mithiamte pawhin khatiang zawng khan hemi thil ah hian an rawn tum lut ang a. Vawiinah hian kan House Leader-in a sawi ang chiah khan, Mizoram-a industry pahnih a awm a, pakhat chu sorkar a ni a, a aia te deuh zawk chu kohhran hi a ni ringawt mai a. Mi han ruai thei khawpa industries kan neih a la awm loh avangin NEDP hian heti zawng hian i ti teh ang ti hian a thil tum ber chu chu chu ani a. Kha kha member khan min lo hriatsak kan beisei a.

Member zahawm tak Pu Lalruatkima'n a rawn zawhbelh crore 50 bak hi a tih kha, a zawhna hi ka hre lova, mahse kan zawhchian tak kha chuan ka hre ta a. Hei hi chu keima hriat leh keimahni remruatnaa kan park a ni a. A chhan chu hei hi park a ngai thin a. Kan pawisa kan 'park' kan tih hian kan Chief Minister ho in mamawh thut a awm thei a, hetiang hi impress money kan tih ang deuhin kan 'park' ve reng a ni. Entirnan kan beisei loh takin Tuirini lei a chhe phut mai a, chung ang ah te pawh chuan kha kan pawisa remchang kha tih vat theih turin nuai 210 kha kan han pe vat a. Chung ang atan te chuan 'park' kan han tih hi a ni. YMA te pawhin an neih, Kohhran te pawhin an neih ang chi ve tho, tul thuta kan hman theih tur atan, a tul apianga hman theih tur atana kan 'park' a ni e.

SPEAKER : Awle, zawhna hun kan hmang zo a. Kan zingah Minister zahawm tak pakhat Pu John Rotluangliana hian awm loh a dil a, kan phalsak a ni tih kha House kan hriattir ni se.

Vawiin hi Private Members' ni a ni a, Resolution a tam mai a. Number pakhatna atangin kan la ang a. Kan Dan 27-na clause pakhatin a phal angin business, Private Members' Business kan la ang a. Resolution hi member 16 hnen atangin 80 kan dawng tawh a. Vawiin ni 16.3.2018 ami tur hi ni 13.3.2018 Tuesday dar 1:00 p.m. ah khan ballot thum vawr a ni a, chuta tang chuan Resolution 6 thlanchhuah ani a. A in dawt dan chu Bulletin Part-II No. 2015 tahrik ni 13.3.2018 ah khan kan inhriattir tawh kha.

Tichuan resolution no. 1-na kan lak a ngai ta a. Resolution No. 1-na chu hetiang hi a ni. "Hun rei tak atanga kawng leh lei chhia avanga harsatna kan tawh sukiang turin nasa leh zuala hmalak ni rawh se." tih a ni a. Resolution neitu Pu K. Sangthuama move turin kan sawm ang a. Hemi zawh ah hian amendment form-in a lut leh a, he resolution ngai bawh hi, chu chu kan dan 129-na khan a lo phal bawh a, hei pawh hi kan move tir leh dawn a ni. Tunah hian resolution neitu Pu K. Sangthuama sawm ila, rawn move rawh se.

Pu K. SANGTHUAMA : Pu Speaker, ka lawm e. Vawiinah hian resolution move tura ka resolution a lo chhuah avang hian ka lawm hle a. Ni 21st November, 2014-ah khan Dr. Beichhua, MLA zahawm takin hetiang bawh hi resolution a rawn pulut tawh a. Tin, ni 16th October, 2015-ah khan Pu Vanlalzawma, MLA zahawmtak in Resolution a rawn thelut tawh bawh a. Mahse, heng hi kan passed thei lova, Chuvangin vawiinah tih leh a ngai ta a. Chuvangin, hei hi kan han sawiho ang a, a tha ber ah chuan kan tlu turah ngai ta ila.

Hei hi hmanah khan lo passed tawh ila chuan vawiin thleng thleng hian tih ngailo turah kei chuan ka ruat a, mahse tih leh thin a ngai a. Opposition resolution a nih avang emawa tih loh tum hrim hrim na ang thil deuh hi awm lo se tha hle in ka ngai a. Chuvangin, puitling taka kan sorkar pawh hian heng hi ngaihtuahna a siam mai kha a tha lawm ni ka ti a.

Tin, Pu Speaker, hei amendment a lo kal leh zat mai bawh a, hetiang hian hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti tih a ni a. A tawp ah hian tlem a danglam a ni mai a Pu Speaker, hei pawh hi a zahawmawm em

em a, chutihruah erawh chuan tuna kan hmalakna hi tha tawka kan ngai a nih chuan sorkar tan pawh in enchian viau pawh a ngaiin a rinawm a. A chhan chu kum 9 tun sorkar ah hian kan kal ta a ni a. Kum 9 chhung hian harsatna chi hrang hrang kawng ah te, lei ah te kan tawka a. Chuvangin, tuna kan hmalakna ang ngawta kan kal zel chuan harsatna tam tak kan la tawka zel dawna kan hriat avangin tun aia tha leh zuala hmalak hi keini chuan tha kan tih avangin he resolution hi kan han pu lut a ni a.

Chuvangin, hunrei tak atangin kan ti a, a ni leh a thla erawh chu Pu Speaker, han sawi mai a theih loh. Hun rei tak atanga kawng leh lei chhia avanga harsatna kan tawh su kiang tura nasa leh zuala hmalak ni rawh se kan ti a. Nasa leh zuala hmalak tih han pass mai kha thil harsa viau em ni dawn chu aw kan ti a. Pu Speaker, kan hmalakna kha a lo tawka lo deuh anih chuan tlema han tan leh deuha tha mai tur a nih chuan tan leh deuh a hi tih theih lohna tur ah pawh Pu Speaker, ka ngai lova. Chuti a nih loha resolution kha hetiang zawnga han her danglam ringawt pawh kha a tha ber dawn em ni.

Hmalakna kal mek hi a tha tawka tih hi keini chuan kan pawm chiah lova. Tha tawka ti ila chuan resolution hi kan pulut dawn lova. Amaherawhchu, nakinah an la rawn move ve ang a, a tawp ah vote te kan la la ang a. Tahchuan kan chak lo zawka a nih pawhin kan hmalakna pangngai a kan kal zel a nih hi chuan harsatna pawh lo thleng se, sorkar mawh a ni ang tih hi Pu Speaker, vawiinah a hmasa in kan sawi duh a.

Pu Speaker, tunah hian, nimin lawk ah kan zawhna ah pawh khan kumin kum kal lai a ni ang chu, kawngpui siamna te leh a repair nan te pawisa kan lo ngah khawp mai a. Cheng nuai 85,640.25 hi kan nei a. Tahchuan cheng nuai 32,757.07 chiah hi kan la hmang hman a. Work season hi thla nga vel dawn lai a awm tawh a. Chutih chhung chuan a chanve pawh kan la hmang hman lo a ni a. Chuvangin kan budget a awm sa ₹ 5,20,883.18 hi hman ban a awm ang tih heta tang hian a lang a. Chuvangin pawisa hi a tam tawka a, keini lo ngaihnanah chuan Pu Speaker, hetiangah hian pawisa awmlu chu ni sela kan hrethiam viau a. Mahse pawisa hi heti zat, vaibelchhe 52883.18 la awm si ah hian kan kawng hi kan thawka chaklo deuh niin kan hria a. Chuvangin,

resolution hi kan pass theih chuan heta tang hian hna pawh a kal deuh duak duak turah kan ngai a.

Mizoramah kawng hi a tam a, kan hria a, sorkar tan pawh vawikhata tih duak duak chu Pu Speaker, a har deuh te pawh a ni mai thei a. National Highway hi 11 kan nei a, a hming chu sawi veklo mai ila. Tin, State Highway hi 2 kan nei bawk a. Hei hi kan kawng neih dan a ni a. Tin, National Highway-ah hian km 14014.318 a ni a. State road-ah hian km 4615.17 a ni a, a belhkhawmin km 6029.488 a ni a. Hei hi kan kawng neih dan a ni a. Chuvangin, sum hian kan kawng neih zawng zawng hi thawklehkhatah pheih chuan a tih vek sen bik loh ang a. Mahse, kum 9 lai kan sorkar-in kawng a tihdan hi kan resolution-ah khan tun aia chak zawka hma lak theihna hi a awmlo em ni, engtizia nge, PWD-te pawh an indaih ta lo hle em ni? Chief Engineer pathum kan nei a, Engineer-in-Chief kan nei bawk a, S.E tam tak kan nei a, E.E tam tak kan nei a, SDO-te, J.E-te tam tak kan nei a. Chuvang chuan, PWD lamah hian tun aia tan lak deuh hi a ngaiin kan hria a. Chuti a nih loh chuan kan kawng hi, heti ngawt hi chuan fur a lo hnai leh tawh mai a. Vawiin hi March 16 a lo ni leh tawh a, March a ral ang a, April, May-ah te chuan kawng siam mumal theih loh in a awm leh mai dawn si a. Chuvangin, tan kan lak sauh sauh loh hi chuan harsatna nasa tak kan tawk leh ang tih kan hlau a. Chuvangin, tun aia chak zawk a hma la tur hian sorkar kan beisei a, kan han phut ve a.

He kan resolution hi kan pass theih chuan opposition nen, ruling nen theihtawp kan chhuah ang a. Vawiinah hian Pu Speaker, sorkar va beihna ngawr ngawr emaw, PWD changtu va beihna ngawr ngawr lam kha a ni hran chuang lova. Chuvangin, kum 9 chhunga an hnathawh tawh ah hian, PWD-ah hian kawng leh lei hi a chhe zing em em mai a. Chuvangin, hei hi siamthat dan kawng a awm lawm ni tih ngaihtuahna resolution vawiinah kan han pulut a ni a.

Chutihlaikarah chuan keini pawh kum 9, 1999-2007 inkara kan hnathawhte pawh hi sawi ve thain ka hria a Pu Speaker. A lehlam hnathawh that loh sawi ngawr ngawr ni lovin kum 9 chhunga Pu Speaker, kan hnathawh kalphung atangte hian khaihinnate awm ve se thain hriatna ka nei a. Chuvangin, ka lo sawi rei deuh hlek a nih pawhin vawiin chu min lo hrethiam turin ka'n ngen che a.

Niminpiyah atang khan kawthalo in min zut a, vawiin pawh hi hei hi chu ka subject ni lo se churawn kallo tur ka ni a. Tukin thleng khan kawthalo in min la zut

a, churang chuan, tui pawh ka inchhawp a Pu Speaker, kawngaihin ka dang a ro chuan tlem ka in min phalsak turin ka ngen che a. (HON'BLE SPEAKER : In rawh).

PWD hnathawh hi tunhma atang khan tlem-a-zawng han sawi ve ta ila a that ka ring a. Mizoram sorkar-in kawngpui siam leh insak lama (HON'BLE SPEAKER : Kan inthlak lawk dawn a nia aw) (DEPUTY SPEAKER : Aw le, sawi zawm rawh le) ram tan a lo siam hmalakna hi tunhnaiah a pung nasa em em a. Kum 1995 a PWD workload vbc 92 ni thin kha kum 2000-ah chuan vaibelchhe 162 ah a lo pung chho a, 2007-ah pheih chuan a let li aia tam vaibelchhe 370 lai a lo ni ta a. Hmalakna a tamin kawngpui siam leh insak lamah PWD hian hnathawh chhuanawm tak tak a ngah hle a, a tlangpui chauh han tarlang ila.

Kawngpui siam lamah tun kum 9 kalta chung khan, tun kum 9 kan han tih chu, tun kum 9 sorkar hma kum 9 kha a ni a, km 2427.81 teh meuh laih that leh siam that zawh a ni a. Heng kawng tharte hian kawng tam tak paltlangin thingtlang khaw mipui tam takin an chhawr a ni. Tunah hian km 500.17 a thui laih mek a ni a, reiloteah zawh mai tur a ni bawk. Hei hi khatihlaia he PWD-in an rawn buatsaih sawina kha a ni a.

Hemi hun chung hian lei 11 dawh zawh niin, dawh lai mek 9 a awm a, a dang 8 pawh kumin chungta tan mai tura ruahman a ni. Hei hi 2007 kum tawp lam a ni a, 2008-a dawh leh mai tura ruahman a ni a. Lei 11 dawh zawh niin 9 dawh lai mek a la awm a, a dang 8 pawh kumin chungta tan mai tur. Chu chu 2008 kum tir lama tih tura ruahman a ni a.

Heng kawngpui siam that leh siam tharte hi a bikin thingtlang lam hmasawna atan a pawimawh em em a. Tun hmaa motor lian, truck la thlen theih ngai lohna khaw tam takah truck a thlen theih tak avangin thingtlang mipuite tan hmasawna kawng a inhawngzau sauh a, thingtlang lamah pawh nasa takin sum a luanglut mek a ni.

Heng khaw inkar Rawpuichhip, West Lungdar, Kanhmun, Sabual tlangdung leh Kawkulh, Chhawrtui, Lungpho tlangdungte, Phullen, Phuaibuang, Khawlian tlangdungte, Dil tlang, Chawngte tlangdungah te pawh truck a lut thei ta a. Vaikhaw tlangte, Serkawr te, Farkawn – Khankawn te, Pang khuate pawh truck-in a thleng thei ta a ni. Hei hi 2007 chho kha a ni a. Heng bakah hian khaw tam tak, tunhma

truck la thlen ngai lohna te pawh truck kal theihna kawng hian paltlangin a pawh ve ta a ni.

Tunhnai mai 2007 khan jeep la luh ngai reng reng lohna khua Vankal te, Vanchengpui te, Ramtlang East te leh South Mualthuam te leh West Darlawnah te pawh motor a lut ve thei ta. Thla hnih khat chhung chuan heng motor luh ngailohna khua Thehleple te, Dampui te, Lungte te, Hruilian te, Hmunzawl leh Zehtet khuuah te pawh a lut ve thei tawh dawn a ni. Pu Speaker, heng kawngpui siam hian nan sum te hi hmun hrang hrang atanga hmuh a ni a, tun kum 9 a tih, 1999-2007 kha a ni a. Tun kum 9 kalta chhung khan Mizoram hmun tin chhim leh hmar, khawchhak leh khawthlangah te hma lak a ni a. Chung kawngpui sial langsar zualte chu- NEC atang khan NEC fund atangin upgradation of Saitual-Phullen road km52.40, upgradation of Mamit- Bairabi km 37, upgradation of Bairabi- Zamuang road km 30, Upgradation of Keitum-Artahkawn, km 38, upgradation of Silchar road km 9.3, construction of Tlabung - Kawrpuchhuah km 60.42, construction of Saitual - Saichal-NE Bualpui road km 34.33, construction of Vaikhawtlang - Khuangpa road km 15, construction of Chalfilh – Vanzau road km 12. Heng kawngte hi kawngpui lian, 7.5 m zeta zaua laih zawh vek tawh a ni a, black top hna kalpui mek an ni.

Tin, hei bakah hian NLCPR Scheme atangin Darlui- Sailung- Mualkhang km 16, Bawngkawn –Durtlang km 2.6, Lungpian – Mampe road km 6, Chawngte – Borapansuri road km 21.65, Bamboo road from West Serzawl – Saiplai-Saitlaw, 18 km. Saiphai – Hortoki road 27.5 km. Tuirial – Bukpui Phase-I 40 km. Tuirial – Bukpui Phase II, 44 km. Pu Speaker, NABARD Scheme atangin improvement of Rawpuchhip – Buarpui road 79 km. Hnahthial – Tarpho road, 32 km. Tarpho - kawn road 25 km. Lawipu – Tlawng Road 3 km. Muallungthu – Khumtung Road hi 2008 chhunga laih tur a ni a.

Tin, AI & ISEC, CSS atangin Rengtekawn National Highway 154, 7 km. Reiek – West Lungdar 7 km. Improvement/upgradation of Kawrthah, 40 km. Kanghmun - road. Bilkhawthlir – Saiphai – Natasura road 20.5 km.

Pu Speaker, National Highway improvement hna hi hetiang hian thawh a ni bawk a. Bilkhawthlir – Buhchang – Bairabi 50 km. National Highway standard tha taka siam tunah hian double lane turin tha taka laih zauh mek a ni. Aizawl – Lengpui road, 11.5 km. chu double lane tha taka siam zawh a ni. Lengpui – Mamit – Tripura

road, 118.5 km. National Highway kawng tha taka siam zawh a nih hnuah tunah double lane turin buatsaih mek a ni a. Kumin chhungin hna tan tum a ni. Hei hi kan sorkar tawp lama tan tura ruahman kha a ni baw a. Pu Speaker, Seling – New vervek road 140 km. chu National Highway tha taka siam zawh a ni a. Khi pawh khi Pu Speaker, vawiin thlengin a la tha a. Mizoram kawng siamah chuan a tha ber pawl, a tha ber ni hialin kei chuan ka ngai a. Kawng khi a black-top pawh a tha em em a. Tunah te pawh kawng tha pawl tak, a tha ber zing ami a la niin kei chuan ka la hria a.

Tin, heng bakah hian Champhai – Tiau kawng te, Theiriat – Lunglei kawng te, Zero point – Saiha kawng te, Lunglei – Demagiri kawngte leh Kawnpui – Sairang kawngte double lane-a siam turin estimate siam mek a ni a, rei lo teah hna tan theih beisei a ni tih a ni a, kan sorkar chhung khan. Tin, state capital tlawh turin Silchar – Aizawl kawngpui hi four lane-a siam turin ruahman mek a ni. Hetih lai hian four-lane-a Pu Deputy Speaker, siam tura ruahmanna hi a rei tawh khawp a. Four lane-a ti turin Pu Deputy Speaker, Silchar atanga hemia kal chho zel tur hi vawiin thleng hian kan la hlawhtling thei lo erawh hi chu eng nge ni central lamte hian hma laknaah hian min rawn ngaihthah deuh em ni? Heng hi a rei tawh hle mai a, chu vang chuan hei hi ngaihtuahna kan sorkar pawh hian hmang chho zel ta se a that kan ring baw a.

District Headquarters tlawh turin Seling – Champhai, Aizawl – Serchhip, Serchhip – Lunglei, Lunglei – Lawngtlai leh Lawngtlai – Saiha kawngte pawh double lane-a siam turin ruahman mek a ni tawh. Seling – Champhai hi kan sorkar lai atang pawh khan ruahmanna awm tawh a ni a. Vawiin thleng hian ruahmanna awm tawh tih kha a la ni chho zel mai hi a tha taw lo khawp mai a. Champhai kawng khi khiti khi a ni a, Pu Deputy Speaker, a te khawp mai a. Mahse a tet ang hu khian kal phei chu a sawt angreng viau a. Khi khi laih harsatna eng nge ni? Central lam atang hian BRTF nge ni? Eng nge ni lai tura ruahman tihte pawh nakinah hriat theihna a awm chuan a tha khawp ang a. Tin, Aizawl atanga Serchhip, Serchhip – Hnahthial, Hnahthial – Lunglei kawng pawh hi hman atanga survey tawh vawiin thlengin an la survey reng mai a. Hei pawh hi four lane-a kal tura tih a ni a. Compensation chungchangah hian an la buaipui deuh nge ni? Eng nge ni heng harsatna te pawh hi hriat a tha khawp mai.

Tin, World Bank funded NSRP hnuaiheng kawngte hi chei that leh enkawl hna thawh zawh a ni. Kawlkulh – Ngopa – Tuivai road, 96.6 km. Chekawn – North Vanlaiphai road, 20 km. Khawzawl – Biate Road, 58 km. Lungsen – Chawngte road, 46.67 km. Selesih – Thuampui road, 12 km. Zobawk – Haulawng road, 30 km.

World Bank funded hnuaiheng vek hian Aizawl – Lunglei road via Hmuifang, 170 km. leh Aizawl by-pass 12.5 km. te thawh mek a ni bawk a. Hei hi 2007 chho kha, la zawh chiah a ni lova khatah khan. Aizawl by-pass-ah hian enge ni, Thuampui atanga Melthum piaha chhuak hi 12.5 km. a ni a. Heng hi thawh a ni a khatih lai khan zawh vek tawh a ni a.

Tin, World Bank funded kha 230 km. kha 170-in via Thenzawlah hian tha takin tunah kan zawh thei tawh a. Tin, PMGSY hnuaiheng hian kawng tam tak laih zawh tawh niin laih mek a ni bawk a. Hengte hi black-top tura hmalak mek a ni a.

PMGSY hnuaiheng kawng laihte hi Phase 6-ah thenin 836.84 km-a thui kawng 57 chu laih zawh tawh a ni a. 39 dang 500.17-a thui laih mek a ni bawk. Heng bakah hian kawng sawmli leh paruk, 518.34 km. lai laih leh mai turin estimate siam mek a ni. Kuminah hian hna tan beisei a ni tih a ni a. Chu chu 2008-ah khan hna tan beisei a ni a.

State Plan Fund hnuai atang hian chuan sum a tam thin loh avangin project tih tham hma lak a ni ngai meuh lova. Kawngpui leh a chhehvel inkar, kawngpui cheibawl nan hman a ni deuh ber. State sumah hi chuan Pu Deputy Speaker, tam tak a awm loh avang hian kawng han laih teuh teuhna tur te, han cheina turte pawh duhthu a sam lo thin a, heng hun lai pawh hian. Chu vang chuan Hetih laiah pawh hian State sum atang chuan thui tak laih theih kha a ni em em lo a ni. Central lam atang erawh chuan pawisa tam tak a lo kal a. Khang atang khan nasa taka laih a ni.

Tin, re-surfacing-te pawh hi kum 9 chhung chuan tam tak siam a ni a. A metre zat thlengin kan hria a, mahse chu chu sawi vek kher a ngai lovang a.

Tin, bamboo link road-ah hian jeepable connectivity under PFC bamboo link road-ah hian PWD hian a lai bawk a. 133 km. lai jeep kal theihna turin Pu Deputy Speaker, laih bawk a ni a. Tin, ADB Funded Project-ah hian World Bank kawngpui ang hian heng kawngte hi siam tum a ni an ti a khatih lai khan. Serchhip, Thenzawl,

Buarpui, Champhai, Khawbung. Hemi Serchhip atanga Thenzawl leh Buarpui pawh hi tum mek a ni a, mahse duh angin hun khan a daih tak loh avangin Pu Deputy Speaker, hei hi erawh chu duh angin kan ti hman meuh ta lo a ni.

Kan rilrua awm ber leh central pawhin a rawn ngaimawh em em, Multi-modal Transport Project hi kan sorkar hun lai atanga kal chho zel, India ram hmun dang atanga hmarchhak State hrang hrang ten bungrua lak luh leh hralh chhuahna atana Kolkata lawng chawlhna hmun atangin Myanmar kaltlanga lawng kawng leh khawmual kawng sial tum a ni a. Chuta tan chuan Myanmar ramri atanga Lawngtlai inkar kawngpui chu double-lane-a laih tan mai tum a ni a, tunah hian PWD-in ngawrh takin survey a bei mek a. Kumin chung hian hna tan mai turin hma lak a ni. Khatih hunlai khan survey nasa taka beih a lo ni a. Mahse, kan hunlai khan han lai tan meuh tur chuan sorkar a inpeih thei chiah bik lova, Central sorkar pawh.

Tin, lei dawh lamah hian lei hi 11 kan dawh zo hman a. Tin, dawh mek kha 9 a awm bawk a. Tin, dawh leh zel tura ruahman kha a la awm bawk a. Chu chu Pu Deputy Speaker, kan sawi leh zar zar ang a, khawngaihin.

- 1) Bridge over R. Tuichang on Hnahthial – Thingsai road.
- 2) Bridge over R. Vanva on Haulawng – Chhipphir road.
- 3) Bridge over R. Tuisih on Zawngling – Chapui road.
- 4) Bridge over R. Chawngte ‘P’ to Chawngte ‘C’
- 5) Bridge over R Chawngte lui on LP
- 6) Bridge over R Khawchhak tuipei on CMV Road
- 7) Bridge over R Chawngte lui on Dil tlang, Chawngte Road
- 8) Bridge over R Tlawng, National Highway 44-A
- 9) Bridge over R Tuichhuah ‘N’ on Kolasib, Bairabi Road
- 10) Bridge over R Sesih on Buhchang, Bairabi Road
- 11) Bridge over R Chiahpui Aizawl, Lengpui Road

Khang kha zawh tawh a ni a, he lai kan siam hunlai hian dawh mek 9 a awm a. 1) R Lengpui LCV Road 2) Bridge over R Tlawng on Aibawk, Darlung road, 3) Bridge over Tuivai on Phullen, Khuaijuang road 4) Bridge over on Chhingchhip, Hmuntha road 5) Bridge over R Tuisa Kawlbem Khawtlang road 6) Bridge over R Lungmullui on Lengpui 'W' Serzawl road 7) Bridge over R Tlawng on Haulawng, Lunglei road 8) Bridge over R Vanva to Thenzawl, Lunglei road 9) Bridge over R Chite lui on Aizawl by pass road.

Heng te hi kum 2008 chhunga dawh tura ruahman a ni. Hei hi kan sorkar tawp hma khan ruahman a wmsa vek a ni a. Bridge over Tuichang on Keitum 'N' Vanlaiphai road hi zawhna ah pawh khan Pu Deputy Speaker, ka zawt a, engtik nge zawh hun tur, eng tik nge bul tan tih te a ni a. Helaia ti tura Tuichang leh Keitum 'N' Vanlaiphai road a siam hi beih mek ni in a lang a, an zo thei dawn tawh em tih te kha a lo chhuak ang em chu ka hre lo, Pu Deputy Speaker.

4) Bridge over R Tuipuibari on Tuipuibari road 3) RCC bridge over R Tlawng on Bairabi Zamuang road, RCC bridge over R Teirei on Bairabi Zamuang road 5) RCC bridge on R Tuivawl on Saitual, Phullen road. 6) Double lane RCC bridge over Tuirihnim on Seling, Darlawn. Hei hi kha tih lai khan RCC bridge-a tih tura ruahman a ni a, amaherawhchu peih a ni ta lo a. Kan hriat ang in vanduaithlak takin hmanni lawk ah a chim a. Tin, hei hi RCC bridge-a tih tura a hma ruahman kha a ni a.

Tin, Double lane RCC bridge over R Tlawng, Aizawl Lengpui road pawh hi Tlawng leh Aizawl Lengpui Road hi RCC Bridge a ruahman a ni a. Tunah pawh khuan (**Deputy SPEAKER** : Ngawi rawh aw, kan dan ang hian minute 30 hun i nei a, i hmang zo tep, minute 3 vel a la awm a) Pu Dy Speaker, a rei tawh lo ang. Khu pawh khu wawiiin thleng khuan RCC lam khu la tih loh a ni a, eng nge ni khu khu a kalphung zel tur? Bailey bridge a tih leh mai a ni ta a, chu chu RCC bridge a pawh khu kawng pawimawh tak a nih avangin tih zel ni se chuan a tha khawp a. Double lane RCC bridge over R Tut on Aizawl Mamit road te hi siam a ni a.

Tin, heng bakah hian building lam leh eng ilo kha chu kawng chungchang a nih avangin sawi ta lo mai ila. Pu Deputy Speaker, kan hriat theuh ang in kawng chungchang ah hian harsatna tam tak nikumah kan tawk a. Tin, nikum mai ni lo in kum hmasa lamah te pawh a ni zel a. Chuvangin tuna kan resolution kan rawn move

ang hian engpawh niselangin tun aia chak zawka hma lak theihna dan hi kan sorkar hian a nei in kan hria a. Heng hi ngaihtuahna leh rilru leh thu mai mai ni in kan hria a, chuvangin sum te pawh hi tun aia chak zawka hmang a tun aia PWD te pawh hi tan la leh zual tura tih a tha khawp mai a. Tin, khu tilai Ramrikawn atanga PTC inkar pawh hmanni ah khan duhtu a sam lo an ti a. Kan zu en a, kan en hnu lawkah khan kan kal kha eng nge ni an la duhtawk lo ni tur a ni a. Khawtlang khan kawng te kha an chhun khaw a, tichuan an inpunkhawm a, kawng te kha an khar a. Khu khu khawngaihni kan PWD Minister hian min lo enpui se kan ngen a, chuti a nih loh chuan anmahni leh anmahni khuti lai ah khuan an buai nasa mai a. Chuvangin kan PWD Minister hian Chief Engineer lamah te, a thawktu contractor lamah te theih tawk lo chhuah se buaina a chhuah zel loh nan kan ngen duh baw a ni e.

Awle, Pu Deputy Speaker, kha kha ni mai sela a tha ang e. Ka lawm e.

DEPUTY SPEAKER : Awle, resolution neitu in a rawn move a, nichina kan sawi tawh ang khan resolution chungchang ah Notice of Amendment Pu R. Vanlalvena, MLA zahawm tak hnen atangin kan hmu a, phalsak a ni a. A resolution chu, ‘hun rei tak atanga kawng leh lei chhia avanga harsatna kan tawh su kiang tura sorkar hmalakna kal mek hi tha kan ti,’ tih a ni a. Kan dan 129-na in a sawi angin, amendment rawn thehluttu hian a move ve leh phawt ang a. Tunah i lo sawm ang.

Pu R. VANLALVENA : Pu Deputy Speaker, ka lawm e. Kan senior zahawm tak Pu K. Sangthuama khan thiam takin a rawn move a, kan resolution hi a inthlau lo khawp mai a. A tawp tlem te lai chauh tih danglam hret ni se ti in ngenna ka rawn siam a ni a. A chhan chu member zahawm takin a rawn sawi ang khan pawisa PWD-ah a awm bawk nen, tuna kan hmalakna hi a tha tawk kan tih thu kan sawi a. Chu bakah department-in theihtawp chhuaha hna an thawh mek laia chak leh zualin kal se han tih ai chuan, ‘tuna an thawh mek hi a tha tawk a ni. Theihtawka chaka hna an thawh hi a tha tawk a ni,’ kan tih hian hma an sawn theih zawk kan beisei a. Chumi avang chuan private resolution kha tlem te min tih danglam sak kn rawn ngen a ni a.

A hmasain kan senior member zahawm tak thusawi a ngaihnam khawp mai a, thu sawi a thiam bakah a senior na a lang tel a. Lei kuai lo tak, tawngkam nem leh ngaihnam takin a sawi chhuak thei a, keini ang rual hi chuan kan sawi thiam lova,

kan tum loh zawk kan sawi hlauh zel mai a. Mi lei kuai zawnga sawi te hi a awl khawp mai. Member zahawm tak khan ka sawi sual a nih chuan min lo ngaidam se. A thusawi kha a ngaihnam in entawntlak a ni tih a hmasain ka sawi duh a.

Kan ram awm dan zawng zawng kan hria a. Private member resolution siam tha ila kan han tih ah pawh hian kan ram kawng hi, 'a tha e, duhthu a sam e,' kan tih avanga he resolution hi siam that rawt kan ni lo a. Kawng hi tha se tih kan duh a, lei hi tha se tih kan duh tlang vek a ni a. Chu mi a tha duh tlang vek chuan heti zawng zawk hian ti ta ila a tha ang a tih ngaihdan kan neih hran tak avanga amendment rawn buatsaih mai kan ni tih min hriatsak ka duh a ni. Kan ram dinhmun hi kan hria a, India hmar chhak kilah kan awm, kan ram hi tlawh pawh a hrehawm em em a ni tih kan hria a. Mi in min tlawhpawh tha lo khawp a, chuvangin PWD tender hi tunlai chhanah chuan E-tender vek a ni. Contractor an thlan pawh hian Mizoram leilung awm dan hre mang lo in phai lam atangin an rawn chhang thin a, a changtu an lo nih tlat thin avangin a hmuna an lo thlen hian ruahtui tla a tam bawk si a, leilung a that bawk si loh avang hian an duh angin an thawk tha lo fo thin a ni tih session hmasa lamah te pawh kan ngaithla tawh a. Chuvang te chuan kawng hi a chhe ve bawk a ni. Kan resolution move tu kan senior zahawm tak khan tun hun mai a sawi lo a, nichina a thusawi kan ngaihtlak atang pawh khan kum sawm kalta a hma lo lak tawhna zawng zawngte thiam takin a rawn sawi a. Khang hma lakna zawng zawng kha a fakawm a, a tha thlawt a ni. Amaherawhchu, kan ram dinhmun en hian kum tam tak kalta ami kha a rin reng theih loh a ni tih hi a hretu vek kan niin ka hria a. Kan ram leilung a thawl a, mithiamten an sawi danin a lei a hnip a, ruah tui a tam bawk si a. Nikumah phei kha chuan tun ang hunah hian ruah a tla viau tawh a ni. Kan hriat theuh angin lo pawh a hun taka hal thei lo khua an tam em em a, chutiang a nih avang chuan kawng pawh a min nasa a ni. Kan la hre theuhin ka ring a, thal lai chuan helaiiah hian tui a put thin a ni tih rinawm loh khawpin fur lai chuan tui a put nasa thin a, tui hi a luang dum dum thei a. Kawngpuia kalte hian pheikhawk pil hmawh hmawkin kawngah tui kan rap thin a ni tih kan la hre vek a ni. Chumi a nih avang chuan Pu Deputy Speaker, i dinglam ami te hian kan kawng hi a tha, kan lei hi a tha kan ti lo a, a that leh zel kan duh avanga he resolution pawh hi siam tha a, kan hnathawktute hnathawh kal lai mek hi a tha tawh, an thawk chak, tun kum atan chuan an thawk tha tawh a ni tih kan sawi duhna zawk a ni. Kan ramah hian nikum chauh pawh ni lo kum dang tam takah pawh ruah tlak nasat kum a lo awm fo tawh

thin a. Kan naupan lai pawhin min pui kum tihte an lo sawi fo thin khatiang kumahte kha chuan kan ram hi a lo chhe ve tak zet zet thin a ni a. Chutiang deuh thaw chuan nikumah khan kan ram kha ruahin min bawh nasa a ni. Tin, keini state chauh pawh ni loin India hmarchhak state dangte pawh hi an lo ni ve tho mai a, an kawng kha nikumah kha chuan a chhe ve em em a ni. Kan senior member zahawm takin a rawn sawi kum hmasa lama hna an thawh ang zawng zawng kha kum khat chhungin a chhe vek ti ila kan sawi uar lutuk lovin ka ring. Chutah kum danga kan la tawn ngai loh hmasawnain a ken tel motor ke sawm aia tam nei ten rit tak tak phurin kan kawng an zawh lehngal a, khatianga an kal chuan kum hmasa lama an siam kha chu a chhe zung zung a. Nikum chhung khan kan kawng a chhe nasa khawp mai. PWD leh sorkar lamin hna thawkin han siam tha dawn se ruah sur hnuaiiah chuan thawh hleih theih a ni bawk si lo a, chu chu vantlang mipui zawng zawng pawhin kan hriat vek a ni. Ruah sur hnuaiiah chuan kawng siam theih a ni lo a, siam an tumna lamah a min belhchhah a ni mai a, chumi a nih avang chuan pawisa kha an hmang zo lo a ni tih kan hre theiin ka hria a. Tunah hian January, February, March an lo in her chho a, kum hmasa lam aiin ruah tuite an tlem deuh bawk a, theihpatawp tak meuhin kan hnathawktu a bik takin kan Minister zahawm tak te, kan PWD hnathawktute hian tunah hian an thawk a ni.

Mizoram hmun hrang hrangah an thawk a. Aizawl khaw chhung kan hmuh theih ringawtah pawh hian veng kiltinah an theih tawkin a chhun a zan sawi loin, siam that tumin an bung mawlh mawlh reng a ni. Mizoram hmun hrang hranga an thawhte phei chu tam tak a ni. Nichina kan senior member zahawm takin a sawi tawh kawngte pawh kha siam that leh a ngai vek. Chutiang khawp chuan kan ram leilungin a zir loh avangin hmalakna ngaiaih hma lak a ngai fo thin. Chuvangin kan PWD te kan sorkarin leh kan Minister zahawm tak ten hna an thawha hma an lak kal mek hi a tha tawk kan ti a. Chu chu Pu Deputy Speaker nakinah sawihona zau zawk a la awm ang a, member dangte pawh hian an la sawi zau ang a. I veilam ami te pawh hian vawiina an hnathawh zawng zawng an hriat hi chuan tha an tih zawk ka ring a. Tunah Mizoramah hian lei hi PWD hian 127 an enkawl a, chungah chuan 74 hi permanent a ni a, 53 hi bailey bridge a ni. Chu chu a ni chung hian tunah hian 53 an enkawl hnuai ami ah pawh hian permanent-a siam a nih theihna turin theihtawpin an bei a. Chungte pawh chu tuna an hnathawh kal lai mek a ni. Chumai bakah khaw that lai chauha thawh, black top hi khaw that lai lo chuan thawh chi a ni lo tih hi a

hretu vek kan niin ka hria . Nikumah ruah sur nasa lutuk avangin hna an thawk hlei thei lo a, tun thla thum thla li bawr vel lek hian Lailapur to Bilkhawthlir te, Kawnpui to Khamrang tih te, Khamrang – Buichali, Buichali – Aizawl, Aizawl – Tuirial, Tuirial – Serchhip , Serchhip – Hrangchalkawn – Lawngtlai – Tuipang, saw lam thleng zawng zawngin, Lunglei, Pachang, Sihphir, Tlabung, Khawzawl, Champhai tih chho te; a tam lutuk dawn a, hun a rei loh nan kha kha chu midang pawhin an rawn sawi zau turah ngai ta ila. Khatiang zawng zawng kha tun thla li thla nga chhung vel lek hian theihpatawpin, tihtakzetin chhun zan sawi loin hna an thawk tak meuh meuh a ni a. Vawiin lam phei chu Pu Deputy Speaker, khuate hi an hniam leh deuh lehngal a, a thlaphanawm khawpin ka hria. Tun ang huna theihtawpa hna an thawk hi tha kan ti a, an hmalakna mek hi a lawmawm khawpin kan hria a ni. Chuvangin kan resolution siam danglam hret kan duh hi min pawm sak kan duh a. Tin, kawng an chhiat emaw, lei an min hian mihringte hi kan famkim lo a kan duh ang hi a ni lo fo a ni tih hi a tichiang leh zualin ka hria. Sawtah nikum lama Darzokaia lei a chim khan kan hotute hnung zuiin a hmunah kan va kal ve a, chuta ka rilru-a awm mihringten kan tih theih loh kan vanduinawm tawh a ni tih tichiangtua ka ngaih chu, khami lei an dawh kha a tluang hrui ti mai ang, a chung lama thirzai an kilh a pawt dingtu ber an kilhna-a kha a screw an lo herh tight lo deuh hlek a, khami an herh tight hmaih avang khan a khai dingtu ber thirruia kha a put a, a chim thla ta a. Darkar khat chhung lekin rei tak an lo thawh tawh leh sum cheng nuai za chuang fe an lo sen tawh kha a chhe ta vek a, keini aiin anmahni khan hreawm an ti zawkin ka ring a.

Tawngkam mawilo ni lo se Whatsapp group leh media lamahte phei chuan sorkar deusawh zawng lek lekte indemna a lo lang lehngal a, a tha lo khawpin ka hria. Keini aiin anni khan hreawm an tih zawk ka ring a. Chutiang bawkin khawthlang lam ami Tlawng-Bairabi kai ami pawh kha kan la hre vekin ka hria, an chhung dawn tep tihah chhun theih mai tura an dona-te an ruahman laiin tui lianin a dona-te a rawn len tla a, a chim ta a ni tih kan hria a. Khangahte khan keini ai chuan contractorte khan hrehawm an tih zawk ka ring a. Ngaihthlak nuamlo deuh tak taka lo dem pawlte kan han hmu bawk nen, khatiangte ngaihtuahin keini ai hian contractor te khan hrehawm an ti fe-in a rinawm zawk a ni. Chuvangin kan duh vang leh kan lo ruahman lawk ang ni lem lo hian thil hi a thleng ve fo thin a, heng zawng zawngte hi kan dan theih loh thil a ni a. Ruah sur lo rawh se kan ti ngawt thei bik si

lo a. Tui in turte kan thlai ten a lo duh ve a, kan lo mamawh ve tho bawk nen. Chuvang chuan kan ram en hian working season hi a tlem em em mai a. Thla li/thla nga chhunga hnathawh theih hi a tam bawk si lo a, Kan hnathawktute, kan department ten theihtawpa Mizoram hmun hrang hranga an theihna zawng zawng hmanga hna an thawk hi a lawmawm kan ti a. Heti zawng hian private member resolution amendment kan rawn dil pawh hi min amend saka min sawiho pui tur leh a tawp lamah pheih chuan min amend sak turin ka rawn dil a ni e. Ka lawm e.

DEPUTY SPEAKER : Tunah kan sawiho chhonzawm nghal mai ang a, memberte minute engzat nge kan in pek ang?

Pu LALRUATKIMA : Pu Deputy Speaker, minute 15 kha a tam in ti deuh em ni?

DEPUTY SPEAKER : Minute sawm a tawk em? Minute 15 maw? 15 chu a pelh theih loh a, kan danah hian minute 15 a rei berah chu chu pelh theih loh a ni.

Pu JOHN SIAMKUNGA : Pu Deputy Speaker, dar 4 bak kha a extend theih loh tih kha hre bawk ila.

DEPUTY SPEAKER : Dar 4:00 bak a extend theih loh bawk a.

Pu R. ROMAWIA, MINISTER : Pu Deputy Speaker, amendment pakhat kha a awm bawk a, a eng kha nge sawiho ang i tih kha? Kan sawi mawlh mawlh mai ang a, nakinah kan sawiho kha min chin fel sak dawn em ni?

DEPUTY SPEAKER : Tikhan an move ve ve a, pakhat in a resolution a move a, kha kha a support tu in a support zawngin an sawi ang a, pakhat in amendment a move a, amendment support tu ten a support zawng in an sawi bawk ang a, a tawp ah vote kan la ang. Tunah chuan Pu K. Lalrinthanga (PU LALRUATKIMA : Pu Deputy Speaker, khawngaih takin a tawpa vote laknaah khan a original resolution neitu tho ta kha a nih ngei ngei a ngai a ni, practice-a an hman ah hian) kha kha chu Chairman thu thu a ni. Minute 15 hun hawn a ni ang a, in chuh deuh rap rap a ngai ang, hun hi a tam vak dawn lo a ni.

Pu K. LALRINTHANGA : Pu Deputy Speaker, a hmasaa ka'n sawi duh chu resolution move tuin resolution an sawi khan an hun chhunga an hnathawh zawng zawng a sawi hman vek ang kha tun sorkar-ah hian a ni ve lo tih hi ka han

sawi duh a. A bu hi (sorkar hnathawk mek) han en ula, chhiar chhuak vek tur chuan vawiinah hian ka chhiar chhuak vek hman lovin ka ring a, hei hi tuna kan thawh mek a ni tih hi hre hmasa ta ila a tha in ka hria a. Chuvang chuan hna hi tun dinhmun ah hian PWD hian a thawk nasa hle a ni tih hi hre hmasa ta ila a thain ka hria. Bul ka han tan duh na chu 2008 kum khan kum tawp ah hotute leh Pathian duh sakna zarah MLA candidate kan lo ni ve a, Serkhan to Bagha kalkawng ah khuan kan kal a. Kan block President-in a sawi chu, 'lehlama lo kal te nen hian kan in su chawrh ang tih ka hlau,' a ti a ni. Chumi awmzia chu a hnim lutuk a, Congress sorkar 1989 leh 1998 in kara Congress party a sorkar laia kalkawng siam tawh kha a dawt leha sorkar 1998 atanga 2008 thleng sorkar khan a lo siam tha tawh mang si lova. Chuvang chuan kan block President chuan kan hmalam atanga lokal te nen hian motor hi kan in su chawrh ang tih ka hlau a ti a ni. A hnim lutuk a kan inhmu thei lo a ni. Tuna kan resolution rawn move tute sorkar laia thil awm kha a ni a. Chuvang chuan tun sorkara thil thleng reng reng hi han sawi chhe vak tur em ni an nih bik le tih hi a ni. Chutih rual rual chuan Pathian khawngaihna zarah Congress party a rawn sorkar ta a. Congress party a rawn sorkar takah chuan kan thil hriat chu Serkhan to Bagha siamthat na tur cheng nuai zaruk a bo tih kha, Mizoram PWD history-a khatih laia lar ber kha a ni a. A zawn hna kha kan thawk a, zirlai pawl ten FIR te theh lut in eng tin tin emaw hma an la a. Thenkhat service lai te chuan an tawrh phah hial kha a ni a. Chutiang te a nih avang chuan khang hun laia hnathawktute awm dan pawh kha kan thlir tel hi a ngai a ni tih ka sawi duh a.

Kan resolution move-tu khan Bilkhawthlir to Bairabi kalkawng laih te, Bilkhawthlir to Saiphai kalkawng laih te kha a rawn sawi a. Kha kha an hun chhungin an lai lo tih kha chiang takin ka hrih duh a, MLA ka nih laia kan laih a ni. Ka bial chung a ni a, Bilkhawthlir atangin Saiphai kalkawng kha laih pawh ni lovin metal na tur pawisa cheng nuai sangkhat leh panga hmu in an thawk a ni tih ka'n hrih teh ang. Chutichuan Bilkhawthlir to Bairabi tih pawh kha 2009 hnu ah khan laih a ni tih kha ka'n hrih leh teh ang, an hun chhungin an lai lo tih kha chiangkuang takin ka'n hrih leh teh ang. Lehkha puana a in ziah avanga chhiara an thawh a ni tih hi a ni lo a ni tih chiang takin i hre teh ang u.

Kum 2009-ah khan PWD kan han thlir a, chuta kan hriat tak chu PWD te khan Nation Highway engemaw zat an lo la tawh a. A tam zawk kha PWD lak turin a awm a ni tih kan hria a. Keini chuan kan dem chu sorkar kal taa Chief Minister

kha a ni. Engatinge BRTF ten kalkawng an lai a, thui tak leh tam tak an lai a. A maintenance hi a har tehluul nen Mizoram sorkar kal liam ta khan PWD lak tura thutlukna a lo siam mai le tih hi a ni pawl kan tih chu ni. PWD hian staff te an lak belh mai thei baw si lova, BRTF-in asset an neih kan hria, Bulldozer te, JCB te leh khawl chi hrang hrang tam tak an nei, Mizoram chhunga an thawhnaah an asset neih dan kan hria. Khatiang zat pui pui kha Mizoram PWD hian asset an nei ve lo tih kan hria. Nimahsela, sorkar kal liam ta khan PWD lak atan ruahmanna an lo siam fel vek tawh baw si a. Sorkar thar ah khan kan hotuten theih tawp chhuah in Mizoram PWD ten an lak loh na turin ngaihtuahna siam in an zuk tang ni te pawh in ka lo hria a, mahse tih hleihtheih a ni ta lova. Chutichuan BRTF kalkawng tam tak nichina kan mover khan National Highway Mizoram PWD-in a lak te, Mizoram PWD hnuai kalkawng a lak zatte kha a rawn sawi a. Mahse, a zat chiah chiah kha ka rawn sawi pui thei ta lova. Khang zawng zawng kha Mizoram PWD hian enkawl turin staff lak belh theihna an nei baw si lova. Mahse, an kutah dah a ni miau baw si a, an enkawl seng vak lo a ni tih hi kan hriatpui a tha lawm ni tih hi ka sawi duh a ni. Theihtawpin an thawk ve a, tun kum kalta ah phei kha chuan kan Governor-in a speech-a a sawi ang khan Mizoram-ah nasa takin khua a chhia a. Tuna kan amendment form-a mover-in a sawi ang khan, February thla ah ruah a sur tan a, March thla ah lo hal na tur hun pawh a awm lova. Chuta tang chuan khua a chhe ta ngat ngat a. Motor lian pui pui a rawn tlan a, ke sawm nei te, ke sawm paruk nei te, chutiang chuan kan kalkawng lei hnip tak an chil in kalkawng a chhia a. Khangte kha Mizoram PWD leh sorkar thil tih a ni lo. Ruah sur kha Pathian malsawmna, lehlamah chuan ei leh in kan neih theihna tura malsawmna a ni, a inchawhpawlh kha a ngai a ni. Chutiang chu thil awm dan a ni. Chuvang chuan a leh lampang ah kan kalkawng ten a tuar ta a. Siam hleihtheih lovin hun rei tak a lo awm ta a. Theihtawpa PWD ten hna an thawk chung hian kalkawng chu chhe lo thei lo dinhmun ah a ding a ni tih hi kan hriat a ngai. Chutih rual rual chuan PWD kalkawng siam a chhia a ni tih lan tir nan, chirh diak lo la khawm a buh lo phuntute kha tuna mover pawl te kha an lo ni ve leh ang reng si a. Hetianga han in chirh theh viau tur hi emaw kan nih le tih hi ka ngaihtuah a ni.

Tin, thil dang pakhat ka sawi leh duh chu Mizo te hian kan kalkawng siam hna thawk tur hian contractor tha leh sum ngah kan la nei mumal lova, chuvang chuan harsatna kan tawk a ni. Kum 2008-2013 inkar ah khan kan hotute duhsakna a

zarah PAC Committee-ah member in ka awm ve a. PWD kalkawng siam chungchang kan Chairman (tuna Opposition party lian ber atanga MLA)hovinkal kawng tam tak kan en a ni. Chuta PWD-in min hrilh chu, 'kalkawng hi metal kan tih dawnin contractor te hnenah tender kan han ko va, an rawn chhang ta a. Chuta an rawn chhannaah chuan a hniam berte kan pe lo thei lo va. Chutia kan pek loh theih loh rual chuan Mizoram pawn atangin tender te an rawn chhang ve a. Chung chhangtute chuan an hmuh theihna turin a hniam thei ang berin an rawn chhang a. Aizawl atanga 100km te chu an rawn ngaihtuahin awlsam taka thawh theih tur emaw an rawn ti a, Kolkata atanga 100km te chu anni tan chuan hnathawh nuam lutuk a ni a. Anmahni state-a awm angin an han chhut a, 100km chu thawh awlsam tak a ni. Chutichuan hniam takin an han chhang a, a hniam ber kha pek loh theih a ni bawk si lo va. Work order kan pe a, an lo kal a, hnathawh harsat zia an hria a. An thawk tha leh peih lo va, in withdraw an chak a, in withdraw theih dan kawng engtin tin emaw hian an zawng a, a tawp a tawpah chuan an thawh that theih loh avangin an work order cancel leh a ngai a. Chutiang dinhmuna kan din avang chuan kan hna hi a chak thei lo a ni a ni,' an ti a ni. Mizoram dinhmun chanchin hria, kalkawng chanchin hria leh tlangram a ni tih chanchin hria Mizo mipui ten sum leh pai kan la ngah si lo va. Kawng reng reng metal a nih dawnin bulldozer a ngai a, JCB a ngai a, road roller a ngai a, alkatra chawhna a ngai a, quarry siam a ngai a, 'chutianga kalkawng an siam chuan metal engemaw zat an siam phawt loh chuan bill kan pe ngai lo,' tiin khatih lai khan min chhang a ni. 'Metal a nih hmaa bill kan pek chuan ruah a rawn sur ang a, lung tuihawkin a len ang a, pawisa an lak tawh chuan hna har avangin an lo in withdraw leh a nga, kan hna kha a thlawn a ni mai a, metal engemaw zat an thawh phawt loh chuan sum leh pai kan pe ngai lo,' tiin min chhang. Chutiang ti thei tur chuan Mizoramah hian sum ngah, assets nei kan la nei mumal lo va, awlsam taka pek zung zung mai tur alawm kan han tih ang chi te hi a tih theih ve loh a ni. Opposition lam amite pawh hian hre chiang sela a tha in ka hria. Anni pawhin a awmzia chu an hre thei mai awm e.

Ka han sawi leh duh chu Keitum emaw Tuichang – Artahkawn tih kha kan en a ni. Chuta kan en tum chuan kan thudawn pakhat chu hei hi a ni, contractor khan harsatna namenlo a tawk a. Lehlahmah NGO te pawh hi an lo in rawlh ve thin a, hnathawktute kha an duh ang tawkin an thawk lo ang tih an hlau a, an lo vau ve thin a. Mahse, lehlahmah an hnathawh tur kha thenkhat chuan an rin aia har te pawh a lo

ni ve a. Chutichuan, mi thahnemngai zual ten an thahnem ngaih luat avangin hnathawktute an lo vau ve a. Chutia an lo vau avang chuan contractor-in in withdraw a ngaih thu Department-ah a thlen ta a. Rei tak hna thawh mumal a awm tak loh avangin departmental a thawh te a lo ngai ta. Sum leh pai hlutna a lo tlahniam a, harsatna a lo thleng a. Tender dang han ti leh dawn se, project siam a, sum hmantur ruahman lawk a lo ni bawk si a, chuvang chuan hna kha a kal chak thei lo a ni tih kha ka han sawi duh a. Tin, compensation-ah hian harsatna nasa tak kan tawk a ni. Serkhan – Bagha kalkawng khu kan mover khan an hun laia thawh angin a rawn sawi a, Pathian leh kan hotute zara MLA ka nih ve hnuah hian survey kha nasa takin an la zo lo va, 2008 kum tawp lam atangin MLA kan ni a, 2009-2010 thleng pawhin an la zo lo va. Chuta tanga project estimate NEC-ah submit a, laih a ni. An laih tak hnuah chuan project sum min pe tute khan compensation turin pawisa min pe tel bawk si lo va. A kalkawng chu kan duh, nimahsela, a kalkawng laihna tur atan khan ram chhe te te kan lo neih vete, thenkhat chuan engmah kan chin lovah te khan compensation lak kan lo duh ta bawk si a, sorkarah harsatna te an thlen ve a. PWD tan awlsam taka laih hleih theih a ni lo va, contractor-te pawhin namen lovin harsatna an tawk a, tun thlengin laih zawh lovin a la awm a ni. Chutiang te a nih avang chuan Department-in theihtawpin hna thawk mah se la, thil tih hleih theih loh hi a awm a ni. Example pakhat han sawi leh teh ang : hmanni lawkah Tahan-ah ka han kal a. Ka kalkawngah chuan Zokhawthar kawngah khian contractor pakhatin kalkawng a lo lai a ni. Hruaikawnah khian VCP-in thingpui inah min sawm a. Chuta a mangan thu a rawn sawi chu a ho ang reng khawp mai.

Pa pakhatin kawng chungah tlem te te (an sawi dan tawngkam tak chuan) ‘quntal 2/1 vel thar thei tur sawhthing an ching ve a, a cho duh tlat lo a,’ a ti. ‘Kalkawng hi neih ve thuai thuai kan duh si a, engtin nge kan tih ang, DC-ah te a va complaint a, min va sawi sak ve teh,’ an ti a. Additional DC awm lai a ni a, phone-in ka va bia a. ‘Helai sawhthing neitu hian a cho duh tlat lo va, Hruaikawn khua te hian kalkawng tha neih ve an duh tawh si a, contractor-in lei a lai thei lo, a buaithlak khawp mai, engtinng e i tih sak dawn, hma i lak sak thei em?’ tiin ka va zawt a, ‘kan lo hrilh dawn nia,’ an ti a. Chutichuan Tahan kan han kal a, kan rawn let leh lamah chuan ni khat chu a rawn cho ve ta an ti. ‘Engzatnge a chawh chhuah?’ kan ti a, ‘dawrawn khat ang vel te chu a cho ve awm e,’ an ti. Chungte chuan an kalkawng

awlsam taka an laih chhuahna tur kha a dal thin a ni. PWD hnathawhna tur daltu hi eng eng emaw hi a awm thin a ni tih hi in hriat a tha in ka hria.

Thu dang pakhat ka sawi leh duh chu, harsatna hi a awm thin a ni. Congress party sorkarah 1989-1998-ah kan hotuten World Bank Road laihna turin Aizawl atanga Lunglei inkar laihna tur pawisa an sawi chhuak a. 1998-ah sorkar a tla a, MNF an rawn sorkar a, kum 10 chhungin Congress party-a kan hotuten pawisa an sawi chhuah hmang khan kalkawng an lai zo hman lo. Theihtawp an chhuah ang khatih lai pawh khan, mahse an sorkar hun chhungin an lai zo hman lo. Chutiang em ema tuna PWD te hi muanga sawi tur em ni tih hi a ni. 2012 emaw ni kha aw, sawlaiah kan Chief Minister zahawm takin min hawn sak kha. Thil reng reng hian kalkawng pawh telin hun engemaw chen a duh a ni tih ka rawn tarlang duh a ni. Ka lawm e.

DEPUTY SPEAKER : Pu Lalthanliana ilo sawm ang.

Pu LALTHANLIANA : Pu Deputy Speaker, hun min pek avangin ka lawm e. Ka kawng ka ti na tlat mai a, ka ding tha hlei thei lo va, chuvangin kan chuh deuh a. Chawhnu lampangah phei chuan hawn ka dil mai thei a ni, a lehpek hunah tih tur kan la ngah si a, chuvang chuan kan chuh deuh a, hei ka tuai tut riau mai tukin zing chu. Engpawhnise, member zahawm tak Pu K. Sangthuama resolution kha ka thlawp a ni tih chiang takin ka sawi duh a ni.

Pu Deputy Speaker, ‘hun rei tak atanga kawng leh lei chhia avanga harsatna kan tawh sukiang turin nasa lehzuala hma lak ni rawh se’ tih hi ka rawn support duh a. Zalen Chanchinbu ni 14 ah khan ruahtui kum 10 chhunga a tlak zat kha kan lo hmu a. Tichuan, tun kum kal ta 2017-ah khan mm 2686.7 a tla a. Chu chu kan sorkar pawh hian kawng chhijatna chhana a chhuanlam nasa ber niin ka hria a. Kum 2010-ah khan mm 2650.8 a tla a, mm 35.9 in nikum khan a tla hnem hret a. Thil chhinchhiah thei mite tan chuan 2010-ah khan kan kawngte kha eng ang nge ni ang aw tih kha a hriat theih mai awm e. Tin, kum 2008-ah mm 1547.7 a tla a. Nikuma a tlak te nen chuan 1139 in a tla tlem a ni. Khang kumahte khan engnge ni kan dinhmun aw tihte kha thil chik mite ngaihtuah let atan ka’n sawilang duh a. Engpawhnise, ram pum buaiin kan buai a nih kha. Hun kal tawh chu hun kal tawh ni mai se. Nikum velte kha chuan ram pum buaiin kan buai tak meuh meuh a. Hengte avanga harsatna te sukiang turin tunah hian kan sorkar hian hna nasa takin a

thawk mek a. Nichinah kan ngaithla a, lehlam mover khan a sawi a. Khangte kha keipawh ka hriatpui a. A tha pawh ka ti a, an thawk tha pawh ka ti a. Hmanni ah Laki-ah ka va kal a, duhthu sam chiah lo mahse, a kawng chu a lo ziaawm ang reng viau tawh a. Amaherawhchu, Pu Deputy Speaker, vawiina kan han sawi, ka rilrua a awm dan chuan hei hi a tha e, mahse nasa lehzualin hma lak a tulin ka hria a. Chuvangin he resolution hi ka rawn thlawp a ni. Nikum March thla tantirh atangin Favang thlengin ruah tui a tla a, chuvang chuan kan buai a, ram pumin harsatna nasa tak kan tawk a ni tih kan hria a. September ni 16-ah khan kan Chief Minister zahawm takin Bhavan-a a thusawi kha chanchinbu ah ka lo hmu a, PWD report atanga a sawi a ni a. June thla atang khan lei tawlh leh lei tlahniam i ti mai ang, leimin kha hmun 984 ah a awm a; tin, kawngpui bal hi hmun 81 ah a awm bawk a. Retaining Wall chim ringawt hi 94 a ni a, culvert chhia hi 83 a ni a. Chu chu nikum June thla thleng kha a ni. June thla report dawn atanga December thla thleng khan engzat tak chhe leh ang maw tih kha kei chuan report ka nei lova. Tam tak a chhiat belh a ni tih kha chu a chiang reng mai a. Hetiang hi a nih avangin khang kha engchen nge siamthat a lo nih tawh tih vawiinah hian ka rilruah a awm a, a zawt bawk a. Kan chhiat dan kha a nasa em em a ni. Engpawhnise, hma kan lo la tawh nain siamthat zel kha a ngai a ni tih kha ka'n sawi duh a. Nasa takin hma an la tih nichinah kan ngaithla a.

Tin, Pu Deputy Speaker, kan kawngte hi, nia, BRTF in tunhma deuh kha chuan an chang deuh vek a ni mai a. PWD ten an chang ta a. Kei, PWD Mizo engineer rual hi an tha ka ti a, an fit for in ka hria a, an thiam a ni. Chuvang chuan BRTF ai hian an thiam lohna tur hi ka hre miah lo. Amaherawhchu, staff an ni emaw engineer-ah pawhin shortage an neih pawn sumah pawh thawk theia siam theitu tura mawhphurtu chu sorkar hi a ni. PWD in an ti thei lo, an afford lo, tih vel hi chu a dik lo chu ka tichuang lo a, ka hriatna a tawi a. Mahse chutiang hna thawk thei tura siam tur chuan sorkar a awm a, kan push ang a, an mamawh kan pe tur a ni lawm ni? Chumi tur chuan kan thawk tur a ni lawm ni tih hi ka ngaih dan a ni a. Vawiin thlengin PWD-a kan engineer thiam tak takten kawng an enkawl a, mawh an phur a ni tih hi kei chuan ka la support reng a ni, tha ka ti. Mizopa in ama ram hmangaih taka a enkawl hi a tha a ni. A nihna takah chuan BRTF te pawh hi an corrupt ve tho. 'An corrupt lo deuh ang a,' kan ti pawh a ni maithei a, an corrupt. Vawikhat chu ka thawk ve tawh a, ka hre tlat a ni. Kan ram hi kan hria a, kan

leilungte kan hria a, a nghet lo a, a tha lo a ni. A loose em a ni tih kan hria a ni. Tun hunah te pawh hian ka rilrua lian chu inhmakhuana hi a pawimawh ka ti a. Tunah te pawh mithiam ten khawi khawiah nge leimin leh tur awm, fur lo thleng ta se khawi lai hi nge chim tur tih te, kawng bal tur te, retaining wall bal mai turte leh culvert chhe mai thei laite hi engzat nge kan la neih mek? Nakumah ruah a sur ang a, kum dang angin a chhe leh ang a, kan siam leh ang a, khati ringawt khan em ni kan kal dawn? Vawiinah hian eng chenin nge Department hian hma an lak chu ka hre miah lo a, mahse khatiang te kha kan ti a nih chuan a lawmawm ka ti a. Lo inhmakhua hi a tulin ka hria, a chhan chu nikum March thla tan tirah ruah a sur a. Tun kumah hian ni 13 emaw ni khan ruah a sur, a'n tla lehngal a, kha khan min ti phu deuh dup dup tan, thenkhat chuan lo kan hal hman si lova, khatiang te kha a nia. Tun kumah hian eng angin nge ruah a sur leh dawn tih hi kan hre si lova. Chu chu lo inhmakhawsuihna kha eng chenin nge a kal tih kha ka hre lo nain a pawimawh khawp mai a. Kawng te, culvert te, retaining wall chhe mai tur engzat nge kan neih tih hi hriata, a tam thei ang ber siam hi a thain ka hria a. Chumi a nih chuan hetia a chhiat tawh hnua siam kha a hautak duh em mi a, ruah sur, khawchhia kan ti leh ang a. Hmanni ah Shimla-ah kan kal a, ruah sur laiin kawng an siam a, an tithei viau a ni. Kan thlen ni pawhin ruah a sur a, khawlai kan kal pawhin kan kalna turah kan kal hleithe i lova, ruah a sur reng a, mahse, kawng chu an siam reng a, a hnua kan tlan pur pur ve mai bawk chu a ni a. Tin, sum hrim hrimah hian a chhiat hmaa ven hna thawk ila a chhiat tawh hnua siam leh zel chu a hautak zawk daih a ni.

Chuvang chuan sum leh pai kan ngah lo kan tihna laiah hian saving kan neih theih phah zawk ang tih hi Pu Deputy Speaker, ka ngaihtuah a. Vawiinah hian nikuma kawng chhia te, lei chhia avanga kan tawrhna kha ka ngaihtuah a, thlalakah te pawh kan hmu a. Motor ke zawng zawng inphum bo tawhte kha Lifetime Tax kum 15 pe tawh tan khan kum khat vel lek Sumo service in a chhe siam ngai bawk si, Lifetime Tax sing chuang daih pe laklawh tawh bawk si, a chhe siamnaa an senso te; tin, loan-a lo la te tan phei chuan a va buaithlak awm ve aw, ka ti a. Kawng chhiat avangin sum tam tak an sen phah a. An eizawna tur atana an lo tih ve reuh reuh khan engmah a chan lovin thenkhat chuan sumte an sen belh a. Chu mai a ni lo, hna atana interview tur koh ni si, kawngchhia avanga kal thei lo te; tin, damlo damdawiin pan pui ngai, kawngchhiat avanga a nih loh tur ni ta te pawh kha a awm theiin a rinawm a. Chumai chu a ni lova, kawngchhiat avanga sum leh pai kan sen

kha a tam em em a ni. Tin, chumai ni lovin bungrua phai atangin a lo kal a, anhnah te, thlai te a to nghal ringawt mai a. Khatiang deuh khan Aizawl thlentir tum si, motor kal that theihloh avanga tawih chhe ta mai, a nih ang anga a ngai tal kan hmuh let leh takin ti a beng liam ta mai mai khatiang tur pawh awmlo te kha kawngchhia vang khan a thleng nasa tih kan hre vek a ni.

Tin, motor accident phah tam tak a awm a, mihring nunna te pawh chan a ni a. Thil dang, leimin satliah ina a vur te, in min in a vur te kha chu kan la sawi phalo zawk a nia, Pu Deputy Speaker, harsatna sawi tur hi a tam em em mai a. Ka sawithiamlo a, amaherawhchu ka sawi chhun chhun hi uar takin ka sawi a ni tih erawh hi chu min han hriatpui ula ka duh a.

Pu Deputy Speaker, a nihna takah chuan hun a tlem tawh si a. Vawiin hi March ni 16 a ni a, naktuk atangin ruah a sur mai thei. Khua a dur kan ti a ni maw kha. lehngal a! A hmanhmawhthlakzia chu. Chuvang chuan kan thawklo a ni lo a, wawiina kan thawh chin hi a tawk zo lo, nasa lehzualin tan i la teh ang u. Sum a awm tih kan hria a PWD ah pawh, khang te kha vawm chhuak tawp tawp mai ila. A tawngkam a mawilo mai thei a, hmang ila, labour pawh chhawr belh ila thain ka hria.

Tin, NGO te pawh hi fuihpawrh ila. Vai contractor te pawh hi keinin kan nawr ngamlo a nih pawhin NGO te hi nawr tir ila, pawisa pe mai ila a tha mai lawm ni kan ti deuh a, sum kan nei tho tho bawk si a. A nihna takah chuan Pu Deputy Speaker, he House atang hian nasa lehzualin hma lak ni rawh se tih hi kan pass chuan, he House zahawm tak, rorelna sang bera kan pass chuan vai contractor pawhin an pawisa deuh dawn lawm ni tih te ka ngaihtuahna ah a awm a ni.

Chuvangin i dinglam leh veilam ami te hi tangrual ila, nasa lehzualin hma i la ang u tih hi i pass rup mai ang u. Tichuan nasa lehzualin hma an la dawn alawm! Keinin PWD-ah sum kan lo nei tawh bawk si, kan pe bawk ang a, mihring kan chhawr belh bawk ang a. Kan va nawr a phone in, 'tha deuhin ti rawh u,' kan ti a, 'aw' an ti a, an ti leh chuang si lo mai mai anglo deuh hlek khan. Hei hi ka thahnemngaihna a ni a. Chuvangin he House atang meuh hian kan ti anih chuanin kan ti thei dawn a ni, thu an awih dawn a ni tih te hi ka ngaihtuahnaah a awm a.

Rilru a hmanhmawh tawh a ni. Chuvang chuan nakinah fur a ni ang a, ruah a sur tlat a, kan ti leh thei si lo a, tih tih leh ai chuan tunah hian kan thlen chin atang hian hma i sawn ang u kan ti a ni Pu Deputy Speaker. Chuvang chuan hun rei tak atanga kawng leh lei chhia avanga harsatna kan tawh sukiang turin nasa lehzuala hma lak ni rawh se tih hi ka thlawp e. Ka lawm e.

DEPUTY SPEAKER : Aw, ngawi rawh u aw lawk. Phar an awm a, Pu P.C. Zoram Sangliana. Kan chhun chawlh hi dar 1:00 PM a nia, khi mi hun khi, chawhnu lamah a tih theih mai nge kha kha, a zo thei ang maw?

Aw, a phar tlat si a, khimi hun chhunga zawh khi i tum a ni ang chu. Pu P.C. Zoram Sangliana.

Pu P.C. ZORAM SANGLIANA : Pu Deputy Speaker, Aizawl West-I MLA zahawm takin, 'Hun reitak atanga kawng leh lei chhia avanga harsatna kan tawh sukiang turin nasa lehzuala hma lak ni rawh se' tih resolution a rawn pulut a. Chutih rualin Aizawl South-I MLA atangin 'Hun rei tak atanga kawng leh leichhia avanga harsatna kan tawh sukiang tura sorkar hmalakna kal mek hi tha kan ti,' tia amended form-a a rawn tih sawihonaah a mover te ve ve in an han move kha uluk takin kan lo ngaithla a. Original resolution neitu kha chuan a tawp thlang khan hmalakna tura thahnemngai ni si kha sukiang tura hmalakna tur kha pakhatmah a rawn rawt baw si lo a. I dinglama thute tan hian zawm ngaihna hi a awmlo reng reng a ni.

Hmalakna tur kha rawn rawt ni sela, kan lo enpui ang a, amendment siamtu ngei pawh kha hmalakna a rawt tha alawm, heti chen minute 30 dawn thu a sawi a, sawipui pawh a ngaih loh hi te pawh kan lo tihpui tur hi a ni a. Kum 20 dawn kalta vela an tih, leivung leh tlangsam velin a bawh vek tawh tih vel bawr kha a rawn chhiar chhuak keuh keuh kha a ni mai a. Chuvangin han zawmpui ngaihna hi a awmlo a. Chutihrual chuan he kawng Mizorama enkawltu ber PWD ten an hmalakna chi hrang hrang atanga hria in Aizawl South-I bialtu MLA zahawm tak khan chumi an hmalakna kal mek hi tha kan ti a ni tia amendment rawn siam hi a mover awka hriat hmaa kan lo ngaihtuahna kha a mover awka han hriat hian min nemnghehsak a. Chuvang chuan amended form hi nasa takin ka rawn support ani tih kan sawi hmasa duh a ni.

Uluk takin ka lo ngaithla a, kawng hi kan zavai atana pawimawh a ni a. Kawng hi kan nunna hnar a ni tawh a. A bik takin keini kan bial te pheih chu Mizoram lifeline a ni ti hial ten kan insawi thin a. Chung avangte chuan hma an laknaah pawh company lam an ni emaw, department leh a enkawltute hnenah ngei ngei pawh theihpatawpa tan la turin rawtna te kan lo thlenin a bik takin tuna PWD Minister zahawm takina Zero Point – Rengtekawn inkar kawnga Mizo tlangval ngei mai thawk tura an han thlangchhuak a, hma an han lakna te khuan hmanni lawka Bairabi kal tura Kolasib atang pawha darkar 2 dawn kan thangna thinah te khan darkar 1 tlinglo ah te kan thleng thla leh tawh a ni.

Chung chu a ngaihna hriatna atangin kawng chhia siamthatna kal mek han hmuh hian Aizawl South-I MLA zahawm takin amended a rawn siam hi ka support em em a ni. Kan hmu a, an hmalakna kal mekah hian PWD ten kawng 4615 kms anmahni enkawl bakah National Highway-ah 1418 kms chuang, a vaiin Mizoram chhungah hian 6025.67 kms lai hi a kal mek a. Chutianga kal mekah chuan, khang karah khan lei 127 lai an enkawl bawk a. A hrang hrang atang te pawhin chung lei te chu helaia keimahni state fund bak atangte pawhin an ti a.

Tin, an hmalakna ropui ka tih em em chu Training Cell an han din te hi a ni. Training a pawimawhzia khawvel kal zelah chuan kan officer lian ber ber, kan sorkara inchherchhuana hna thawktute hi i ti mai ang, hengte pawh hian an training hnem poh leh thil thar an hmuhchhuah belh a. Kan ram leh kan hnam tan an department ah malsawmna an thlen a ni tih hi an inhria a.

Chungte a nih avang chuan PWD pawh hian Mizoram kawng an enkawl na kawngah pawh hian training a pawimawh em em a ni tih hria in training-na te hi uar takin an kalpui a. Chu chuan technology thar mamawh an ni tih an inhria a. State chhung leh state pawnah training mai bakah workshop te uar em em a an han kalpui te hian Mizoram chhunga kawng an enkawl na ah hian kan Minister, a enkawltu ho hian sorkar lu berin a kaihhruaina atangte hian anni hian mipuite tana thawk an ni tih hi an inchiang em em mai a. Chulai point pakhat te chauh pawh chu lawmthu sawina tlak a tling a ni, kawng an enkawl na ah hian.

Tin, chumi bakah chuan Road Fund Board te hi an la din lehngal mawle! Road Fund Board-ah te chuan 2016 a amended, 2017-a rules an han neih tawh hmang te chuan kan kawng te hi awmze neiin min han kalpui ta a. Tin, chumi lo

lehah chuan Road Sector Maintenance Plan an la nei leh ta nghal! Lawmthu sawina tur hi a va tam hemi ah ringawt pawh hian.

Chumi ah chuan Secretariat te, IT Cell te, Information Cell te, Traffic Engineer Cell te leh PWD Internal Library Cell te nen lam an nei. Chumi hmang chuan mi ram tih dan tha zawng zawng en khan an han inbuatsaih ta a. Chumi ngei mai chuan vawiinah hian kan kawngpui hi min enkawl chho mek a ni a. Chuvangin engvanginng maw Aizawl South-I bialtu MLA in a rawn move hi kan thlawp mai loh ang le.

A original resolution neitu lahin ka sawi ang khan sukiang tura nasa lehzuala hmalakna tur kha pakhat pawh a rawn sawi si lo a. A sawi loh miau avangin va support ngaihna hi a awm bawk si lo a ni. Tin, chumi bakah chuan IT Cell la din a la ni a. Chu chuan PWD Division tin te kha hemi hmang hian an local area, internal leh local area te kha internet hmangin an inbepawh zung zung ta a. Hna kal dan tur te, a lu ber atangin an invil ta tak zet zet mai. Heng han hmuh te hian contractor singhnih ka mamawh a ni tih rikngawt lai ang mai ai kha chuan a dan a dang ta deuh a ni. Chu pawh mite lo sawi chhuah fel sa kha an hun nen chuan vawiinah chuan dang tawh deuh mai a ni a. Chuvangin vawiinah chuan lawmthu sawi tur a awm ta a. Hei mai a la ni lo, Construction Material Test na an la nei ta nghal tunah hian. (Deputy Speaker : Ngawirawh aw, lawk, kan chhunchawlh a hun a, tunah hian dar khat a ni a. Kan tawp tir hmak mai dawn nge kan sawi zawh tir dawn? Awle, sawi zawh in phal maw, awle sawi zawm leh rawh le.)

Ka lawm e, Pu Deputy Speaker, chu Construction Material Test na ah chuan cement tha te, lung tha te mai bakah thir test na nen lam an han nei ta a, chung chuan hun kal tawha a ngaihna hrelo ten an lo kaihhruai lai khan thil tam tak chumi rah chu kan seng mek lai hian a ngaihna hria in kaihhruai a nih lai chuan hengte hi kan police te an in thumna a ni ta. Kan police te 303 (Three knot three) rifle ringawt a tawh tawh lo. AK 47 nen chute khati kan tih ang hian anni pawhin he kan ram kawngpui enkawlna tur atan hian heng mamawh te hi hriain anni pawhin vawiinah hian an lo kalpui ta ni. Chutiang atan chuan thil tam tak an tia. Tin, ropui ka tih em em mai chu Pu Deputy Speaker, kan ramah hi chuan hna kan thawka, kan hlawhtling dawn tak tak anih chuan pawl zawng zawng huapzo YMA te thawhpui thiam hi, thawhpui nachang hriat hi a hlawhtling thin a ni.

Vawiina PWD ten an hmalakna mekah chuan Central YMA te nen hian thawhhona an han tihah hian kan hmuh ang hian Samtlang to Lungleng Community Based Maintenance Contract hna te an han thawk tan ta a ni a. Chung ang, kan rama thalai rualte zawng zawng min hum khawmtu te nena an fund neih ang ang te leh an hmalakna te chumite pawh chuan enpui huama hma an han laknaah hian lawmthu sawi hi kan va ba nasa em! Anmahni ti phur zel tur pawhin kan tih tur a ni dawn lawm ni tih pawh hi kan sawi leh duh a.

Tin, heng kawng te, lei te a ni emaw, contractor hnena an han pek dawn reng reng hian terms and condition fel tak nen an tih tir a, engineer an neih zat te; tin, an khawl neih zat te, laboratory equipment an neih zat te leh thil dang pawimawh te nen agreement sign pui vekin an kalpui ta, hetiang te hi a ni. Tin, hetih rual hian an kalna chinah hian thil dang tam tak sawi tur a awm bakah point hnih khat lek Pu Deputy Speaker, kan sawi belh duh chu, khawpuia kawng an siamnaah hian Session hmasa lamah te pawh kan lo sawi angin remchanna kan lak duha chu, a theihna hmun hmunah hi chuan ruahtui in a ngeih ber cement hi hmang tangkai ta sela. Cement kawng hi siam uar deuh deuh sela, tunah pawh cement an hmanna ah te hi chuan a that zia kan hmu a nih hi! Heihi hmang uar deuh deuh sela tih kan rawt duh a.

Chumai bakah chuan kan sawi leh duh chu, pipe an phum dawn hian anmahni chang ni lovin kawng an siam dawn emaw, pipe an siam dawn emaw kan ram kawng a la zim si a, an hah hle tih chu kan hriat rualin mipuite hi tax payer kan nih anga kan awlsamna zawng tur te hian a theih hram chuan zan lamah te hian chhunzawm tam zawk se tihte pawh kan sawi tel duh a. Tin, a bik takin District khawpui hrang hranga hma an lakna ah hian an hmachhawp chhoh zelah pawh kan khawpui ber Aizawl bakah pawh by pass road te hi chak taka kalpui ni sela. Chungte chuan mipui te tana an hmalakna hi a tichhuanawm lehzuang ang tih hi a chiang a.

A theih chin chin ah chuan an hmalakna hi ka hmuh ve phak chinah Mizo tlangval thawk thei ngei in an han thawh hian Pu Deputy Speaker, department hian kan hlawkpui in ka hria. Entirnan, kan bial Kolasib khawpui ah chuan Kolasib tlangval ngeiin a khawpui min han chei sak chu, kan va han that pui em! Ka sawi sual ka ring lo, Pu Deputy Speaker, Mizoram District khawpui ah hian Kolasib khawpui hi tun thlengin internal road tha ber kan la ni rengin ka hria. Chumi ngei mai chu kan Minister zahawm takin Zero point atanga Rengtekawn kawng ti turin an

han thlang lehngal a, chu chuan thiltih tur zawng zawng te mahni khua, mahni ta nihna nen an han thawk ta a, chumi ngei mai te chuan harsa tak tur nia kan hriat te kha kawng min han khawih chhoh sak zel mai te hi a lawmawm ka ti a. Chuvang chuan Pu Deputy Speaker, Pu R.Vanlalvena, Aizawl South I bialtu MLA hian PWD te hi tunge an nih ? Mizorama kan kawngpui enkawltu te hi tute nge an nih tih a hria a, amended form-a a rawn siam ang ngei hian pass ni se tih hi nasa takin ka rawn thlawp a ni e. Ka lawm e.

DEPUTY SPEAKER : Awle, kan chhun chawlh a hun a, phar lawk te chu in awm naa, kan luh leh hunah kan chhunzawm mai dawn nia. Tunah chuan kan chawl rih ang.

RECESS TILL 2:00 PM

DEPUTY SPEAKER : Kan sawihona kan chhunzawm ang a. Chawhma lam khan a move-tu nen member 5 in kan sawi hman a. Pu K.S. Thanga ilo sawm ang.

Pu K. S. THANGA, MINISTER : Pu Deputy Speaker, vawiina private member resolution, member zahawm tak tak Pu K. Sangthuama leh Pu R. Vanlalvena te rawn put luhah hian Pu R. Vanlalvena rawn putluh ‘Hun rei tak atanga kawng leh lei chhia avanga harsatna kan tawh sukiang tur a sorkar hmalakna kal mek hi tha kan ti,’ tih hi rawn support ka duh a. Vawiin hi private member resolution sawiho ni a nih angin resolution tha tak mai a lo lut a, chutih rual chuan kan MNF legislature lam atang pawhin resolution put luh a ni tho a, amaherawhchu a theih angin ka’n sawi kawp ang a.

A hmasa berah chuan Pu Deputy Speaker, kan ram dinhmun hi nichinah khan MNF atanga mover khan thil eng eng emaw lo thleng te leh kan rama thil thleng chi hrang hrangte a rawn sawi a, chutih rual chuan member zahawm takin a rawn sawi zauna ah a rawn sawi ang khan thenkhat mahni sorkar hunlaia tih miah loh te an thawh anga rawn sawi te kha information a dawng chiang lo nge, a bialtu MLA ngei ten khang kha kan sorkar huna kan khawih a ni a, kan hmalakna vek a ni a rawn tih te kha he House-ah hian resolution te kan move a, thil hi ram pum mipui te hriata kan sawi dawn a nih chuan tlema thil zirchiana inbuatsaihna tha zawk neih hi a

fin thlak hle ang tih ka ring a, chu chu ka'n sawi hmasa duh a. Chuvangchuan MNF Member zahawm takin khang thil hrang hrang a sawi leh a rawn move tam tak kha lo chhinchhiah seng vek lo mah ila, a tirinleh awm a, a sawi dan kha heti laiah hian gallery ah hian ram pum mipui te hriat ah an rawn hmu pha ve tawh chuang lova tia mipui te a dik lo zawnga kaihhruai tumna a awm ang em aw tih te pawh kha min ngaihtuah tir a, kha kha pawl ka ti hle a, chu chu ka'n sawi duh a. Helaiiah member zahawm tak kan ni tlang a, ani phe chu MLA senior, sorkar-ah pawh Minister te pawh lo ni tawh a nih avangin nidangah kan fimkhur tawh nan ka'n sawi ve duh hrim hrim a ni. A chhan chu a bialtu MLA ngeiin thil a rawn sawite kha MNF hunlaia khawih reng reng loh Congress sorkar a lo din hnua kan kutthlak ang te kha MNF sorkar laia an thawh anga an sawi tlat kha, a bialtu MLA-in thudiklo a ni a rawn tih khan a dang tam tak kha a dik lo ang, sawi fuh loh tam tak a awm ang tih kha a rinawm ta zo a, chuvangin a thil rawn move pawh kha a tuipei awm lo mange tih kha ka'n sawifiah ve duh hrim hrim a ni.

Pu Deputy Speaker, kan ram chu kan hriat angin tropical area ah kan awm a, monsoon a nat dan hi India ram rau rau ah pawh Mizoram anga monsoon natna hi a awm lo reng reng a ni. Hmanni lawk khan India ram mai pawh ni lo khawvela ruah tui tlak tamna ber Cherapunjee khu chhungkuua holiday kan hmanin 'i kal ve teh reng reng ang u, khawvela hmun hmingthang a nih khu,' ka ti a, ka kalpui a. Cherapunjee-ah te kan va kal a, an chanchin te kan han zir Chiang a, Mizoram ai hian ruah tui kha a lo tam bik tawh chuang lo a ni. An lo khawro mah mah tawh zawk a ni tih te kan zuk hria a, mak ka ti viau a.

Tin, a hrim hrim thu ah khung Khasi ram te khu kan hria a, lei upat dan leh leilung ngheh dan ah te, lung chang thu ah te leh a lei awm dan ah te khuan Mizoram nen hian a in that hleih em em a. Lung an han haichhuak a, khawvel ah a aia rawra tha a awm chuang lo va; tin, an lung dang chu cement atan a tha em em mai a ni a. Tin, an lung dang chu lungalhthei atan a tha em em a ni. Kopang an rit vak a, tah chuan khawvela balu tha ber an rit chhuak leh ringawt mai a. Khatiang khan phul mai mai pawh an han hai a thlai chitin in a lo ngeih leh a. Khutiang anga ram tha an nei chung

pawhin khang Cherapunjee kawng ka zuk kalna kha Mizoram kawng ai hian a tha bik reng reng lo a ni tih ka hria a ni. Chutiang chuan monsoon-in min bei a, ram nghet lo, in hmun te Aizawl khawpui ah ngei te pawh kan han lai a; tin, thingtlang ah te pawh a ni a, kawng kan han lai a, lei a lo min nghal, lei insawh nghet lo em em mai karah hian Mizoram PWD hian harsa tak chungin he ram harsatna hre chung hian nasa takin hna an thawk a. Chuvang chuan an harsatna tawh hi vawiin ah hian kan hriatpui a tha in ka hria a.

Hmanni khan anmahni PWD hotute zinga officer senior pakhat phe chu phone-ah, 'kan sorkar leh ang a, sorkar tharah pawh ngaihtuahna thar kan hman ngai ni a ka hriat chu concrete kawngpui siam a ni, chuti zawnga strategy hi siam dan a awm em? Hei hi ngaihtuahna hmang ula,' ka ti nghe nghe a ni. Mizoramah hian ruahtui tlak nasat avang hian, ruahtui leh alkatra hi a inkawmngaih lo em em mai a, kum 3 hi maintenance awm lovin black topping hi a tha thei reng reng lo a ni. PWD-in Mizorama kawng an laih thui zia hi a buin kan nei a, Pu Deputy Speaker, hetah hian a awm vek mai a ni. Hetiang enkawl tur hian bitumen kan tih alkatra hi a hautak em em mai a. Ka bial ah phe chuan PMGSY tuna kawng an rawn siam leh turah pawh black top tura ruahmanna vek kha PMGSY-a hotute, 'tlemin to deuh mahse maintenance hi a hautak lutuk a, Mizoram ah kawng in ngah tawh si a, chuvang chuan ka bial bika kawng atan chuan alkatra black topping ni lovin cement concrete rigid pavement an tih ang hian estimate min siamthat sak leh rawh u,' ka ti a; tunah pawh chutiang chuan ka bialah an thawk dawn a. Tuna PMGSY chhuak leh ah phe chuan chutiang chuan an rawn duang tan ta nualin ka hria a, he hi hmasawna chikhat niin ka hria a. Term hmasa khan ka bialah Engineer - in - Chief chhuak ta kha ka bia a, 'pawisa special-in min lo dah sak ve ula, kan inhriat ve rengna tur te pawh a ni ang a. Cheng nuai 150 vel estimate a ni a, Sialsuk World Bank Road atanga Samlukhai panna hi min siam sak rawh u,' ka ti a. Contractor-in tha takin black topping an ti a, engkim hna a that lohna pakhat mah ka hmu lo. Mahse ruah in an nan tak tak a, kum 3 ah chuan a tam ber kha a kawwi chhe leh vek a ni. Chu chu tu tih dik loh mah a ni lo va, nature, kan rama ruahtui kan dawn hi a ni mai. A leh lamah chuan Pathian malsawmna a ni a, India ram hmun thenkhatah te ruahtui hmu

phaloo an awm laiin. Amaherawhchu, heng atan pawh hian kan inbuatsaih erawh chu a tul a. Chuvang chuan tunah pawh chu lai kawng vek chu siam tha turin kan inbuatsaih leh a, rigid pavement turah ka ngai a, engtin chiah nge Department an in buatsaih ka hre lo a ni.

Pu Deputy Speaker, helai ka'n sawi lai hian khawvel ram dang te han sawi ve ila. Kan thenawm khawvel ram ropui bik vaka kan ngaih loh Myanmar-ah hian ni 16 chhung vel a rukin hmanni deuh lawk khan ka han kal a. Rangoon te, Mandalay te ka han kal ru a ni. Dan anga kal dawn chuan a harsa ve deuh a chuvang chuanin ka han kal a, an ram dinhmun te ka han zir ru ve deuh a. Chuta ka thil han hmuh chu World Bank tanpuinain Mandalay leh Rangoon inkar kha concrete kawng vek mai khan an lo ti a, kan motor hman kha maxi cab kan tih ang chi air condition hi a ni a (khing laiah chuan anmahnin an siam loh avang khian engkim khi a awlsam angreng zawk a) kan hire a, 15 seater vel a nia. Darkar khatah 120 km velin kan tlan a ni, public carrier pawh kha. Mahse khang aia motor tha SUV kan tih ang chi hi chu 150 speed-in an tlan deuh vek a, an bus te pawh 120 aia hniamin an tlan lo a ni. Chutiang khawp chuan khing laiah te pawh khian ruah sur nasatna ramah te chuan an lo ti tho a.

Tin, hman deuh lawk khan Taiwan te kan han kal ve a, an ram kawng khi black top aiin concrete hi a tam zawk awm mang e aw ka ti a, an ram chhim leh hmar khi kan kal chhuak vek a, a lailiah te pawh kan kal a ni. Chung ang chu nakina kan ngaihtuahnaah pawh kan hriat atan a tha in ka hria, chu chu ka'n sawi ve duh a.

Khawvel ram dang atangin emaw, India ram atangin a ni emaw project kan siamah pawh khatiang zawnga kalpui theih hi chu kan ram hian a mamawh a ni tih kha ka sawi duh a.

Alkatra hrim hrim hi chuan fur a ngam thlawt lo, hei hi chu thudik a ni, tute pawhin kan hmu, a mawl pawhin kan hmu a, a fing pawhin an hmu a, a thiam pawhin an hmu a, a thiamlo pawhin kan hmu a ni. Chuvang chuan, hei hi kan ram harsatna a ni e tih hi vawiinah hian ka sawi duh a.

Chutih lai chuan PWD hian bridge ringawt pawh hi 127 an enkawl a, state road te leh National Highway-ah te an ni. Bridge pakhat enkawl pawh a hautak tehlu nen, bridge 127 kha uluk tak, tha taka han ti reng tur chuan hnathawktute tan

pawh harsatna a nasa hle dawn a ni tih hi a hriat a. Khang laiah khan vanduai avanga khawi laiah emaw bridge lo chim palh te, a hlui vangte emaw, engemaw chhiatna dang vang emawa a lo awm a nih pawhin an enkawl atang hian a percentage-a lak hian a tlem hle a ni tih a chiang a.

Tin, nimin lawkah news te kan en chuan khawvela ram ropui ber America USA kan tih meuhah pawh state changkang Florida-ah te lei metric ton tam tak mai khatiang anga rit kha a chim ve a, ni rei pawh an la hmang lo an ti ve leh zel a. Mihring engemaw zatin nunna an chan a ni. Chu chu a nih avangin Pu Deputy Speaker, vawiinah hian mawhphurhna kan han chan loh lai hian thil hi kan han sawi a, mahse kan kuta a awm hi chuan a tak ram leh hetia hmuia kan sawi ram hi a inang lo em em a ni.

America ram te chu kum 250 chuang independence nei tawh a ni a, chutiang ang atanga keini kan pi pute atanga han chhut a kum 250 kaltaa kan dinhmun te, vawiina kan san tawh zia leh kan hmasawn tawh zia hi, hetia internet leh engkim mai kan han access ve theih chinah hian khawvel hi kan sawi ve ringawt a. Keini hi kan kristianna Centenary kan lawmna pawh hi a la rei lo em em a, kan pi pute kristianna pawh kha a la rei lo. Chuvang chuan kan duhthawh a, thahnem kan ngai, hmasawnte kan tum tur a ni, hmasawn kan duhna lama chintawk awm lova rak vak vak hi chu a mipuitlinglo zia a ni tih hi ka sawi chhuak ve duh a.

Pu Deputy Speaker, a tawp ber atan chuan PWD hian kawng hrang hranga hma an laknaah hian Mizoram puma an hnathawhte lei te, kawng chi hrang hrang mai an rawn zia chhuak a, Mizoram mipui hmuh turin lang tlangin an rawn pho chhuak a, hei hi kan opposition MLA zahawm tak tak ten an hmu lo a nih chuan nakinah a copy te pawh an la pe ve ang a. Heng atang hian kan sorkar inbuatsaihna hi a tha em em a ni, hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti tih rawn move hi vawiinah hian support tlak a. Chuvangin, mover in a rawn move ang khan hun rei tak atanga kawng chhia leh lei chhia avanga harsatna kan tawh sukiang tura sorkar hmalakna kal mek hi tha kan ti tih hi lungsi takin ka rawn support a ni. Ka lawm e.

DEPUTY SPEAKER : Pu Lalrobiaka a phar hmasa a.

Pu LALROBIAKA : Pu Deputy Speaker, thusawina hun min pek avangin ka lawm a. He House zahawm takah hian thu chi hrang hrang kan sawi thin a, record-in a awm thin a. Vawiinah pawh hian kan member resolution hi a tlangpui thu chuan a tha viauin ka hria a, thahnemngaihna thu leh kan ram, kan hnam kan din chhuahna tur leh hma kan sawnna tur atana ngaihtuahna thuk tak nei vek te kan nih avangin a tha ka ti hle a. Chutih rual erawh chuan amended form kan tih ang chi a Pu R. Vanlalvena'n, 'hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti,' tia a rawn thehluh kha ka support a ni tih ka sawi hmasa duh a ni.

Sawi tur a tam khawp a, kan sawi seng lovang a, vawiinah hian nature avanga chhiatna te, inthlahdahna avanga chhiatna hrim hrim hrim te pawh a awm thin a ni. Governor zahawm tak khan a speech-ah khan a sawi tawh a, nikumah nasa taka ruah leh thil chhiatna a lo thlen avangin Mizoramah harsatna kan tawh a ni tih a speech-ah khan kan hmu a ni, kan hria a ni. Chutiang chuan a sawitu te leh thil chhinchhiah mite chuan an sawi danin February ni 14 atangin kum tawp thlengin ruah a sur a ni, an ti a ni. Chutiang karah chuan PWD te an ni emaw, a thawktu Department a ni emaw, sum nei mahse engtingge ruah sur karah black top an khawih ang tihte pawh kha a hrethiam te kan nih vek rualin kan au nasa hle a, kan indem nasa hle a. Heng hian hmasawinna min thlen lovang tih ka ring a, a then duhthawh deuhthe phei chuan kan CM zahawm tak leh kan PWD Minister zahawm tak te 'bang rawh se' an ti a ni.

Amaherawhchu, ka sawi duh tak chu vawiinah hian kan climatic condition te, kan hun tawngte hian min permit em tih hi kan ngaihtuah fo a pawimawh a ni. Chumi ni lova, a theih loh tih hrereng chung a kan kaltlang a, kan tih fo hian miten kan zahawmna te, kan nih dan te min hrechiang a. A hmaa sang taka awm thin kha hniam takah kan awm fo thin a ni, chutiangte chu kan opposition te pawh hi an ni em aw tih hi ka ngaihtuahna ah a awm a ni. Mi tinrengin kan hmu a, ruah sur nasat zia te, chumi piah lamah chuan vanduaina kan ti dawn nge, vanneihna kan ti dawn nge, tuna kan opposition party te an sorkar lai khan BRTF te kut atangin kawng tam tak, kawng thui tak kan kutah lak luhin a awm a, staff kan neih belh leh bawh si lo. Chuti chung chuan engtingge kan Department te leh kan sorkar hian heti khawpa a maintain theih zawk hi aw tih hi ngaihtuahnaah a awm a ni. Vawiinah hian Mizoram PWD-in a National Highway tel lova kawng a enkawl hi 4615.17 km lai

mai, uihum zat lek staff an duhzat staff, pawh nei theilo chung hian an enkawl a ni a, an fakawm hlein ka hria a. Chutih rual chuan kan sawi ang khan kan deal dan te, a hun leh hmun hi kan thliar thiam fo hi a tha hlein ka hria tih lai kha kan sawi duh a. Chutih rual chuan kan insiamrem chhoh zel danah hian a lunglawi thlak hlein ka hria a. Tun dinhmun takah hian harsatna tawh mah ila he harsatna hian hun tha leh he ram tana thil tha zawk pawh a rawn thlen dawn niin a hriat a ni.

Tin, leilawn chungchangah te pawh hian leihlawn 127 lai mai kan Mizoram PWD hian an enkawl a ni a, National Highway-ah hian 52 a awm a, chutih rual chuan kan leihlawnte hi 1973 tih te, 1975 tih vel chho a siam te tam tak a la awm bawh a, tam tak siamthat a ni tawh bawh a ni. Chuti chung chuan chhiatna a lo tawh changte a lo awm a, mihring hi famkim kan nih loh avangin tihsual changte pawh kan lo nei ang chuvang chu a niang sapho pawhin human error an ti a, chutiang te pawh chu kan nei thei a ni. Amaherawhchu chuti lai kara kan sawi leh duh hram chu chhiatna kan tawh laia vanneihna lo zawn tlat tum hi a vanduaithlak ka ti. Mi chiatna tawh lai leh mittui, hnaptui kara lungngaihna tawp an tawh lai pawha he mite atang hian engtinngae vanneihna kan neih ang lo tih ve tlat mai hi kristian ten kan tih loh tawp tur niin ka hria a. Chuvang chuan hmanni lawkah Tuirini lei a chim tih kan hria a, a pawh khawp a ni, mitthi te pawh kan tuarpui a kan tawngtai sak a ni.

Amaherawhchu, chutih lai karah chuan khami lo tangkaipui tum leh khami avanga advantage lo lak tum tlat mai ang chi te hi kan tih loh tawp tur niin kan hria a. He laiah hian kan chhiat tawhna te leh kan hmabak zelah kan hmasawanna tur atana department-in hma an han laknate a ropui ka ti khawp mai. A bik takin ka lo ngaihtuah ve fo thin chu tun hma khan PWD kawng enkawltute ah hian Mechanical Division te a awm thin a, amaherawhchu hun engemaw chen a awm tawh lova, a hminga kan bial ve te angah hi chuan kawng engemaw an tlak hlek hi chuan khawi ami emaw JCB ngaihtuah a ngai, Aizawl amite kohthlak te a lo ngai a, Aizawl atangin an han charge tan a, senso a sang duh hle a ni. Chutih lai chuan kan houten rem hre takin Division atan pawisa cheng vaibelchhe 13 leh nuai 68 lai mai JCB te leh Tripper te leh Roadroller leh concrete mixture te lei na tur atana sum an han dah te hi a ropui ka ti khawp mai a. Hetiang a nih chuan hmun chengker zawka kawngte pawhin a lo that phah ang a, tiang chuan chak zawkin hma kan la thei ang tih a rinawm a ni. Chumai piah lamah chuan YMA te leh PWD thawh hona tur duan a

han ni te hi a lawmawm ka ti a. Han sawi duai ila, lal lal lai chuan an ti, kei nin kan hre phak ve lo na chungin ‘Lalin feh kawng sah tur a ti a, an sat mai a, kawnglakah engemaw thli thawh leh thlipui ten a lo nuai deuha kawng a chhiat leh kawng laka thingtlukar te a lo awm chuan khalai pa ho leh a hmu apiang an hnatlang a, an khawih nghal mai a ni.

Tunah chuan kan mentality hi a buaithlak kan ti dawn nge, kan kawmchhak a lo min a, PWD te kut kan han nghak tlat mai te hi a buaithlak khawp mai a, henge hi he House kaltlang hian, ‘hawh u, hmanlai rilru kha khati zawnga tlawmngaihna kha i renew leh teh ang u,’ kan ti duh a ni. Kan ta a ni a PWD pawh kan ta, mipuite ta, sorkar pawh mipuite ta, chumi a nih laia tute tih bik tur emawa kan dah tlat mai ang chi te hi Mizoram leh kan mipuite hian khatiang zawnga kan kal tawh loh kha ka duh a ni.

Chutih rual chuan nichina kan sawi ang khan Central YMA te nena inthlunna MoU ziah tur an buatsaih te hi kaltlang pui ngei se kan duh a. Thil reng reng participation kan neihna hian nasa takin min control a, chutiang chuan kan participate loh chuan kan ta lo riau thin bawk a ni. Tin, advantage kan lak duh chu March ni 1-4 Mizoram puma Kristian Thalai Pawl khawmpui lian ber kan ti ang chu, Central KTP khawmpui Phailengah kan thleng a, a bik takin sorkar leh PWD te, department hrang hrang te chungah lawmthu kan sawi duh a, min thuammawi a, in hriat angin West Phaileng te chu kan hmun hma ten a zir lova. Tichung chuan mawi takin kawng chungchangah te, ei leh in chungchangah te, thil chi hrang hrangah sorkar-in min tuamhlawm a, a bialtu nihna ang pawhin lawmthu kan sawi duh a ni. Mipui ten min tinsan hnuah pawh khulai West Phaileng mipui te chu an lawm dawn chauh a ni, chutiang te chu kan sawi lang duh hrim hrim a ni. Sawi tur tam tak a awm a, PMGSY atang te, hmun chi hrang hrang atang ten hma kan han la leh dawn mek a, chung kawngah te pawh chuan nichina Agriculture Minister sawi kha tawmpui kan duh a, a hmun a zir a kan in adopt thiam hi a pawimawh khawpin ka hria a. Entirnan : Aibawk to Darlung kawngah chuan PMGSY tho ah hmun dam em em mai, thalvaekcharah pawh ro lo ah khan kan han black top tlat mai a, a tlo lo teh a nia aw! Khatiang chi kha hmun hrang hrangah pawh hian a awm a ni. Chu chu department te pawhin lo chhinchhiah a, a hmun leh a hun ang zela kan tih thiam hi a pawimawh hle a ni. Tin, hmasawna te hi tehna hrang hrang a awm a, chung tehna ah chuan tuna kalkawng kan han sawi takte kha tehna pawimawh tak a nih avangin

vawiinah hian kan department thawktu te, a sorkar ang pawhin kan ring tawk che u a, chu mai piah lamah chuan in thawhnaah in inpek zawh zia te kan hria a. Division pathum hian kan bial hi min bial a, Mamit Division te, Aibawk Division te leh Aizawl Road South ten min bial a ni. An thawh hah zia hi mita hmutu ka ni. Chawlhni ah pawh an kal mai a, zanah pawh an thawk mai a ni, chuti khawp chuan hma an la a. Chuvang chuan kan ngen tlat a ni la tih fo ai chuan hmalakna kal mek hi tha kan ti tih hi a tawk viau a ni. Chuvangin Pu Deputy Speaker, kan member zahawm tak Pu R.Vanlalvena resolution amended form-a a rawn thehluh ang kha ka support a ni tih ka sawi a ni. Ka lawm e.

DEPUTY SPEAKER : Pu John Siamkunga, tichuan Pu Ruatkima leh Er. Lalrinawma leh Pu Hmingdailova an phar lawk tawh bawk a. Pu John Siamkunga i lo sawm ang .

Pu JOHN SIAMKUNGA : Pu Deputy Speaker, ka lawm e. Vawiina kan resolution hi tukinah khan a move-tu khan tha deuhin a rawn move a. Amaherawhchu, he resolution hi kan hmasawn zawkna tur atana rawn move ni thei se, tanrualna siamtu ni thei se a duhawm hle a. Chutiang ni tur chuan tuna thawh mawlh mawlh lai duh khawp lo em em mai a ‘nasa lehzual a’ tih an han hmannaah hian, a thawk lai leh hetiang kan beih lai mek hi an la duh khawp lo hle tih a lang a. Tin, kan hriat angin kan hotu dang dang ten an rawn sawi tawh a, monsoon area kan nih te, ruahtui tam thin zia te. Vawiina kan siam, kha zan lama a rawn tleuh leh mai thin dan te. A mangang chu Mizoram chhunga mipui zawng zawng kan nih dan te kan hre vek a ni. Opposition chauh an mangang lo va, ruling pawh kan mangang a, kan phek buai a ni. Kan duh dan ni se kawng tha tak tak hian hnum hlerh hlurh se kan duh dan vek a ni. Mahse kan control theih loh thil lo kal thin hian min tibuai a, kan mang hi a ang thin a. Heng kan manganna karah hian engtinngge kan tan khawm theih ang? Tuna kan harsatna sukiang tur hian tan ho dan i ngaihtuah ang u, ti zawk ta se chuan finna te kan han thawhkhawm ang a, tha leh zual zawka rawtna te lo chhuak thei turah ka ngai a.

Vawiinah hian a mover ten an rawn move-naah khan rawtna emaw, kan kal dan hi chuti zawk chuan emaw, machineries & equipments chungchangah a ni emaw, man power a ni emaw, road quality leh road pavement chungchangah te rawtna engmah a awm lo va. Hun kal tawha an thil lo tih tawh te PMGSY kha 2000

atanga rawn tan a ni a. An hun chhunga an kawng laih te mipui hriata rawn puanzar an tumna mai em ni aw tih hi ka ngaihtuah a ni. Mipuite hian kan sorkar hnathawh te hi a lo rei Chumi an hriatchhuah lehna tur atan kawngte hi chu a tha tak tak chuang lovang a, khangho kan hnathawh tawh ho laihlanna atan khan i hmang ang u, an rawn ti niin a lang a. A vang chu an rawn move dan atang khan a langin ka hria a.

Dik tak chuan national level a kan thlir chuan metal road kan tih alkatra hmanga kan han luan hi, ram leilung nghet leh lung tha awmna hmunah chuan kum 10 atanga kum 15 tha tura beisei a ni. Mahse Mizoram context atang erawh chuan kum 3 atang kum 5 tha tura ngaih a ni. Chumi atang ringawt pawh chuan kan ram leilung in a zir loh dan te, kan lung chang kan han tih ve pawh a chan tak tak loh dan te, kan leilung a ngheh loh zia te a tilang hle in ka hria. State danga nuai 100 an sennaah khan keini chuan kum 15 chhung khan nuai 400/500 kan sen a ngai daih mai a ni. Chutiang karah chuan sorkar in theihtawp chhuah in kawng tha a kan kal theihna tur hian a bei nasa a ni. A nihna dik takah chuan PWD hian theihtawp a chhuah tak meuh a, an staff, man power lamah hian an tha nge tha lo chu ka hre lo. Amaherawhchu, National Highway hnuai a ni emaw state road a ni emaw, PMGSY hnuai a ni emaw tender hi an float mawlh mawlh a ni. E-tender-ah ngat pheih hi chuan tumah ve control theih a ni lo va, an ngam tawkin an lo chhang thin si a. PWD office a an kal a ngai tawh lo, mahni in lum atangte in an rawn chhang tawh a. Mizoramah hian ka hmuh dan pheih chuan hnathawh kal hmang leh experience nei tehchiam lo ten hmuh loh hlau in hniam tak tak in an chhang a ni.

Kan bial S.Vanlaiphai leh Muallianpui inkar 13.5 kms ah khian mipakhatin hniam takin a chhang a ni. March thla 2014 atang khan a thawk tawh a, a zawh hun turah pawh zo thei lovin sub-contract in midang a pe a. Sub-contractor khan sub-contract leh chhawngin a pe a, a chhawng thui tawh khawp. Chuvangin, khang contractor te mawh kha sorkar mawh a ni reng reng lo. Kan contractor ten an ngam tawka an lo chhan kha tuma zuk control theih a ni lo. Agreement an sign a, 'ka ti thei ang,' an ti a ni. Khami hnuai vekah khan a ni heng kan lei dawh te, alkatra luana kawng kan siam zawng zawng te hi awm ni. An ngamna tawkin an chhang a, heti zat hian ka thawk thei ang, khawl ka nei tha. An tender document en ila a awm vek a ni. Sorkarin tah khan mawh a phur lo reng reng, contractor te kha a ni mawhphur zawk. Chuvangin, sorkar hi chuan a tih tur a ti a ni. Khawilai hmunah pawh, khawilai kawngah pawh tender float lo a awm hi a awm mang lo, rei an rial lo, kan

department ten. A theih anga hma in tender an float mawlh mawlh a. Competent contractor inti ho in an chhang a. Tha deuh maia thawk tura an ngaih laiin thawk thei lo te an awm thin hian a ni min tibuai zawk. He sorkar hian alkatra kha a va pawlh lo, hot mix lamah a kal lo, kawng mix-ah pawh a kal lo, a tih tur pawh a ni lo. A tih tur chu sum ngaihtuah chhuah a ni. Sum kan ngaihtuah chhuak a, kan rama kawngte, leite tha deuhin i siam ang u, kan ti. Department in chu chu an lo take up a. Annin keimahni workload hian a zo si lo va departmental in kan thawk thei lo contractor fit tak tak ho, hi rawn in rawlh se la, Tichuan kawng thapui pui, Lei thapui pui kan nei ang tih a ni. Chuvangin, vawiinniah hian E-tender hmang a ni emaw, tender hmang vek a koh a ni a, a mawh dik taka chu contractor te koki-ah a awm vek. Sorkar hi in mawhpuh tur kan niloin ka hria a.

Anihna dik takah chuan kan hmuh loh hlau atalangan hniam takin kan chhang a, hei hian pawh hi a sawithui em em zawk a ni. ‘As per’ ten lo chhang ta ni se, a nihna dik takah chuan khilai ka bialah pawh nuai 908 (cheng vaibelchhe kua leh tih) a kha vaibelchhe 9 khan chhang mai se la. Rilru na lovin a thawkzo mai tur a ni a. Mahse a lo chhang hniam ta si a, nuai 80 dawn a hniam in a chhang a, an rilru a na leh si a, an thawh hnuah tui lohna a rawn pe a. Chu chuan sub-standard khan hna kha a siam ta mai zawk a ni. Chuvangin, keimahni a ram neitute zawk pawh hian ngaihtuahna i seng ang u. Heng tender float te hi departmen-in tender amount an dah ang zat tal hian chhan ni se. A rate hniam lampang zawng hian chuan i kal lovang u, kawngtha kan neihna turin kan ti zawk tur a ni. Chuvangin, vawiinniah hian sorkar kan mawhpuh a, sorkar kan thlir a, sorkar chuan sum ngaihtuahin, kawngtha siam turin theihtawp a chhuah a, vaibelchhe za tel sang tel kan hmang tawh. Chung a thawk tha lo a vawiinni a min la chhuahute hi chu a contractor ho a ni, company anni emaw mimal anni emaw khangho kha anni.

Hei, lei chungchangah pawh hian PWD hian lei hi a enkawl hnem em em a. Temporary bridge pawh 18 lai NH-ah pawh hian a awm a, permanent hian 34 lai a awm bawh a ni. A dik tak chuan chhiatna lo thlen te hian a ram mipuite kan mangang thin. Ka bialah pawh Darzokai lei kan han dawh a. Kan lo mitthla danah chuan tha te te in kan dawh chhuak ang a, tui lian in a dan thin te, Lawng timing tlai dar 4 a an khar, zing dar 7 a an hawn chauh te saw zan lamah te an tlan tlang ve thei tawh ang a, tiin kan lo suangtuah ve thin a ni. Mahse, kan rin phak bak leh kan rin reng reng loh in a rawn chim ta tlat mai a ni. Tuipuirala kan bial mipui tam tak chu

an tap zawih zawih a ni. Heng chhiatna lo thleng te hi kan dem. Avoid theih ni se chu kan duh vek. Mahse, kan pumpelh theih loh chhiatna lo thleng ve hrim hrim hi a awm a ni. Chung avangte chuan sawlaih te pawh lei a lo chim tawh a. A dik tak chuan kan thiante, kan opposition member ten an han fang a, an han enkual a. A thalo lai ni awm an han sawikual/enkual vel te hi, hetiang tur a ni lo. Anihna dik tak zawkah chuan thurawn in pe ila, tha tak tak duh kan nih chuan heti zawng hian, chuti zawng chuan ti ta ila a tha lo maw tih te pawh hi kan tih zawk tur niin a lang a ni.

Tichuan, kan sawiduh leh dang a chu State in hemi lei kan han enkawl hi bridge 127 lai an enkawl a. Tin, National Highway-in 52, State Road hian 75 Bridge an enkawl baw a, kum 2030 vision sn siam a. PWD hian kum 2030 ah chuan heng lei zawng zawng tuna temporary a la awm zawng zawng hi permanent bridge in kan siam kai vek ang an ti a ni. Chutiang tur chuan hma an la a, vision tha tak mai an lo duang chuak hi a pawimawh a, vawiin ni ah hian kan tih tur a chu, technology a sang zela, mihring hian training kan ngai a ni. Kan training loh chuan kan outdated thuaia kan hriatna kha a hlui thuai zel a ni. Chumi a nih avang chuan PWD pawh hian training hi technology lam a lo san zel takah chuan chutiang mila kan ram a kal theih nan leh Road Construction a ni emaw thil dang dang ah hian training kan ngai a ni tiin an mahni pawhin tih an tum dan te an rawn ziak chhuaka, chung te pawh chu thil lawmawm tak niin ka hria a.

Tin, ka sawi leh duh pakhat chu vawiin ni a kan harsatna em em pakhat chu machineries nei tha ni a kan hriat te, equipments te pawh an hnathawhna hmun ah dah ni a kan hriat te, dah tha silo te a dik tak chuanin Pavement an han khawih dawn a, machineries/equipment tha tak tak nei niin an ziak a, amaherawhchu, a hmunah han en ila, an lo nei leh si lova. Chung avang chuan a ni kan hna te hian an tawrh thin ni tih hi a pawimawh zawkin ka hria a, Quality management lam a tang pawh hian theihtawp hi han chhuah a, khawl tha zawk an neih chuan contractors leh company te hian an hnathawhna ah hian tha leh zualin an thawk theih ka ring. Chuvangin vawiina kan resolution hi, “Hun rei tak atanga kawng leh leichhia avanga harsatna kan tawh sukiang turin” tih laiah hian, Tang tlang ila, ti zawng hi chuan rawn ti se dik turah ka ngaia, amaherawhchu an rawn tih si loh avangin tuna sorkar hmalak mekna, tender te chhuah a, tender an float a, contractor hnenah an hlan zawih zawih te, sorkar chuan a tih tur ang chi zawng zawng agreement te pawh sign

in, contractors te nen a, an tih tur zawng zawng te ti in, contractors te kutah an hlan vek a, contractor ho khan tha taka an tih chuan kawng tha kan nei ang. Sorkar hi chuan a tih tur a tih takzet avangin vawiin ni ah hian sorkar hmalak mek na hi chu a tha tawh ni hian a lang a. Tunah hian departmental work in thawk nise, manpower nei tha lo in thawk tha lo nise kan dem tur a ni. Mahse vawiin ni ah chutiang chu nilo in engkim kan ti a, tin, a thenah te pheii chuan turn-key project ten an ti nge ka hrelo a, turn-key project te hi a that hmel ang reng a. Sumdawnaah chuan turn-key project hmangin manufacturing emaw business firm an ti thin a. Kan ramah te pawh hian an ti tawh nge ka hrelo, chungah te chuan a mawhphurtu chu department an ni ngailova, department-in sum leh pai an pe a, an tih tur zawng zawng te agreement te sign in thil engkim an ti a, an zawh thlarh hunah an rawn return thin a ni. Khatiang ang te khan sawi te pawh a awm thin a ni, chutianga turn-key project an tih chuan mawhphurhna chu sorkar mawh a nilo, sum chiah a tum a ni. Khatiang ang te kha a ni a, chuvangin vawiin ni a kan sorkarin hma a lakna contractors te hnena hna zawng zawng hlana a theih ang tawka contractors te pawn khawthat lai a theih tawpa an beih chhohna hi kawng tha kan duh zia ti lang tu leh hma kan lakna ropui tak ti langtu a nih avangin, hun rei tak atanga kawng leh lei chhia avanga harsatna kan lo thawh te sukiang tura sorkar hmalakna hi a tha tawh a ni tih hi ka rawn thlawp e. Ka lawm e.

DEPUTY SPEAKER : Pu Lalruatkima.

Pu LALRUATKIMA : Pu Deputy Speaker, ka lawm e. MLA zahawm tak Pu K.Sangthuama private resolution, 'Hun rei tak atanga kawng leh lei chhia avanga harsatna kan tawh sukiang turin nasa leh zuala hmalak ni rawh se,' tih sawihona hun tha tak min pek avangin ka lawm hle mai a. Kan hriat angin tun ministry hian kum 10 na kan hmang mek a ni a. Mizoramah chutih lai chuan a fur a thalin kawngpui zawh tlak mumal a awm loh avangin mipuiten harsatna nasa tak kan tawh a. PWD hian kawngpui National Highway 1414.318 kms leh state road 4615.17 kms kan neih thu nimin lamah te, nimin piah lamah te session-ah kan Minister zahawm tak chhanna atangin kan hre tawh bawh a. Chutih lai chuan kan kawngpui te a chhiat avangin kan mangang a, khawtlang kan rum a, motor neitu, lirthei neitu te an mangang a, a siamthat hnatlang te kan ko a, chutiang chuan theih ang angin kan bei a ni. Kawng chhia avanga khualzin phur maxi cab te, bus te, motor lirthei dang dang te service mumal thei lovin hun kalta ah khan an nuar a, an

chawl bawk a. Chakkhai lam kawngah pawh kan kawngpui ber Silchar road te a that tawk loh vangin harsatna namenlo kan tawk a nih kha kan hre theuh awm e. Chutiang a nih avang chuan nasa lehzualin furpui lo thleng tur kan hma lawka a awm avang hian theihtawp chhuahin hma la ila. Chutiang chuan nasa lehzualin i tang teh ang u, kum 10 chhung zet mai harsatna kan tawk a nih chuan a dik dawn lo e, tiin ngaihtuahna kan han hmang a ni a. Kan resolution puluttu putluhna pawh hi a awm ka ti khawp mai a, ka support tlat a. Chutilai chuan kan Dan bua awm tho amended form-in MLA zahawm tak Pu R.Vanlalvena, Aizawl, South I bialtu khan a rawn ti a.

‘Hun rei tak atang kawng leh lei chhia avanga harsatna kan tawh sukiang tura sorkar hmalakna hi tha kan ti,’ tih kha a ni a. Engatinge tha kan tih si laiah khan 21st Nov, 2014-a kan member zahawm tak Dr.K Beichhua’n Mizoram chhunga inkalpawhna kawngpui leh leihlawn chhe ta lutuk hi tun aia chak zawkin siam that hna thawh ni rawh se,’ ti a alo sawi daih tawh kha support thei kan awm bawk si lo a, min pass pui duhlo a nih kha. Chutihlai chuanin 2015 October ni 16 ah kan MLA zahawm tak Pu Vanlalzawma resolution, “Mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak leh zualin hma lak ni rawh se,” tih pawh kha he House zahawm takah hian kan pass leh theilo bawk a. Pu Deputy Speaker, election kum a lo nih tak avanga hetia sorkar-in hma a la ta vak mai, hma lak a tum ta chiam mai a nih chuan mipuite hian mipui court-ah an la ngaihtuah dawn a ni a, chutah chuan heng zawng zawng hi, wawinah hian chhuanlam hrang hrang kan nei a, chung kan chuanlam te chu a dik a ni maithei e, harsatna kan tawh sukiang tur hian eng ber hi nge tangkai ber ang te kan han tih karah khan member zahawm tak ten an sawi tlanglawn berah chuan ruah tui tlak tam chungchang kha a ni.

Hemi ah hian kum 20 chhunga ruahtui tlak dan sorkar tihchhuah hi ka nei a, chutah chuan nikum kha ruahtui tlak tam ber kum a lo ni hauh lo mai a Pu Deputy Speaker, kum 20 chhung hian annual rainfall Mizorama a tlak danah hian chuan ang chu kan ni a. Chutiang ah chuan he House zahawm tak leh mipui te hi nikum kha ruahtui tlak tam ber kum a ni, ti ti mah ila, statistics sorkar tih chhuahah hian a lo ni reng reng lo a ni. Chu aia tlak tam kum chu a lo tam mai a ni. Khang zawng zawng kha kan ngaihtuahin chutiang dinhmuna awm si chuan, kum 2014-ah pheih kha chuan 3506.1 mm a tla a, 2010-ah khan 2974.9 mm a tla a, 2017-ah pheih chuan nikum aia

tam, 2962.9 mm a tla leh a ni. Chuti a nih chuan nikumah khan 2700.3 a tla a. Chuvangin kum 20 chhung ruahtui tlak tam dan a teh ah khan a 4-na chauh a ni nikum kha, kan statistics hi a dik turah ka ngai a, sorkar tih chhuah a ni miau a, chutiang te chu kan ni a, ruahtui tlak tlem kum pawh kan lo hmachhawn reng mai a. Kum 2014-ah khan 1821.2mm a tla a, 2008-ah khan 1892 mm a tla bawk a ni. Tichuan kum 10 chhunga han khaikhin khan ruahtui tlak tam chungchangah MNF sorkar lai ai khan tuna kan Ministry-ah hian ruahtui kan hmu tlem daih zawk a ni. Chu chu hetah hian annual rainfall meteorological data of Mizoram ah hian chiang taka tarlan a ni. Chuvangin chhuanlam tlinglo hi kan chhuanlam em ni chu aw ka ti a, ngaihtuahna a kal thui khawp mai a. Chuvangin heng zawng zawng hi kan tan tlan a, kan siamthat a ngai a ni.

Working season a liam leh tep tawh a, sum kan ngah mai, kan Finance Minister zahawm tak khan a rawn tarlang tawh a. Kan Minister zahawm tak pawhin a rawn sawi tawh a. Sum ringawt hian kawngpui kan siam a, sum kan neih a mihringte kan in nawr chak lo a, tha kan in tih tho si loh chuan a buaithlak a ni. Tunah hian contractor te leh sorkar hnathawkte kan han mawh puh a, a dik ang, mahse kei chuan kan engineer te hi an fel tawk a ni, kawng tha siam tur hian in an tling a ni.

Amaherawhchu Ministry hian kan ti phur tawk lova, an phurna turin ngaihtuahpuina kan nei lova. Monitoring chungchangah te tha kan thawhtlem niin ka hria a. A bik tak in PWD enkawltute a ngai deuh ngar ngar, kum 10 chhung kan ni a, chutah chuan tan kan lak leh zual kha a ngai a. Tun hunah hian theihtawp chhuaha tan kan la chung pawhin kan dinhmun chu a tha vak lovang tih hi a rinawm a ni. Chung zawng zawng ah chuan mi ramah chuanin sum hmangin kawng an siam a, kan ramah chuan kawng hmangin sum kan siam emaw tih turin revised estimates a tam em em a. Chutiang chuan hnam dang contractor te kan lalut lo thei si lova. Chungah chuan revised estimates tam tak kan lo siam a, contractor kan lo ngam leh thei si lova. Chutiang chu kan dinhmun ni ta te pawh hian mipui chuan ngaihndan kan nei a.

Chumi tur chuan work quality tha te, monitoring tha te kan mamawh thin a ni. Kawng chhe hma em em hi a chhan kan hre lo. A material pawh

BRTF-in an thawh lai chuan state pawn atangin an lalut a. Keini chuan state pawnlam atangin material lakluh kha a awm lo a ni. Kan lung a no kan tih chuan a chang ami kan la mai tur a ni. Schedule of rate kan ni, chumi tlin vek chu kan revised thin a, kan siamthar thin a nih kha. Chutiang tur work quality maintain chungchangah tan kan lak a tul khawp mai. Tin, entirnan Kawnpui to Buichali Lei-ah ringawt pawh hian original estimates vaibelchhe 124.13 a nih laiin original estimates aia tam vaibelchhe 87.46 zet mai khan kan revised sak a ni. Chuti zata kan revised sak si kha chuan Buichali leh Kawnpui inkar kawng chu tha mai awm tak! Amaherawhchu, 2015-a kan hawn kha nikum chhung zawng khan khualzin motor te kan tlan thei lo a nih kha kan hre vek mai. Chung ang chu tunge a mawhphurtu, contractor kan ti dawn em ni? Kan sorkar hian responsibility, accountability kan la ngam tur a ni dawn lawm ni?

Kawngpui a lo chhia a, mipui an phunnawi a, lei a lo chim a, tunge responsibility kan fix tawh? Tumah kan la fix lo a ni. Chu chuan contractor te a ti ngampa ta mai emaw chu aw tih tur a ni. Chuvang chuan, heng ang zawng zawng ah hian kawng hawn tur a lo awm a, kan sorkar chak tak hmalakna a ni kan ti a, chutah chhiatna kan lo tawk a, kawng a lo chim a, contractor te a ni, PWD Engineer te an ni kan ti leh daih si a. Heng zawng zawngah hian keimahni'n mawh la ngam ila, kan mawhphurhna a ni, keimahni'n kan en tha tur a ni, kan in siam tha ang tiin kan infuih phur tur a ni dawn lawm ni!

Tunhnaiah Thorang bialah hna chhiat vangin black topping an khaw uak uak a kan hmu a, Tuirial kawngah te pawh kan hmu a. Ramrikawn to PTC kawngah te, Lunglei thalai ten kan Minister zahawmtak te programme an tibuai a nih kha. Khang te kha han ngaihtuah chuan kawng tha hi kan duh, kan mamawh a ni kan ti a. Chutih lai chuan KDZK Hachhek tlangdung pawh 33.35% -a sangin kan chhang a, a chhang sangtu kha kan pe leh tho mai a ni. Engatinge hetiana sanga in hmuh theih kan tih chuan election campaign nan pawisa kan pe vek tawh alawm tiin mipui hma ah zuk uang ngam a mawle!

Tin, Serkhan – Bhaga road te pawh kan hria, formation cutting leh pavement kha a rual deuhthaw in hna kan han pe a. Kawng laih hma in bitumen kan han dah a, kawng sir ah a luang kawng ngiai nguai mai a ni tunah khuan kan hmu vek mai. Khang te kha kan ni a. Ruahmanna mumal kan nei thin lo a ni. Chungah chuan keimahni hian mawh la ngam theuh ila, opposition kan ni emaw, sorkar lam kan ni emaw, kawngpui a chhiat chuan kan tuar vek a ni. Chuvanginn heng Serkhan to Bhaga road nichin te khan in sawi a, thawkkhat lai khan MLA zahawmtak mithenkhat ten hlawkna an lo tel ve a ni te an ti a ka zu kal tum pawhin. Chung pheih chu ka hre lova, khang te kha tak tak nge ni, chutiangte chu kan ni a.

Hnam dang contractor tam tak kan la lut a, an thawh sen loh hna kan pe a ni. Cheng vaibelchhe sang tel kan pe a, chung ang chuan hna hi an zo lo a ni. Chuvang chuan ngaihtuahna thar kan hman hi tul ka ti khawp mai a. Chuvangin kawng tha duh in kan tuihal a, kawng tha min pe rawh u, kawng tha i nei ang u, chu chu mipuiten sorkar kan beisei dan pawh a ni. Chumi tur chuan sorkar hian mawh a phur a ni. Contractor te mawhphurhna a nilo, kan engineer te mawhphurh a ni lo, sorkar kan ni miau mai a, chutiang chuan ngaihtuahna kan hman a tul in ka hria a.

Tin, Mizo te hi hnatlang hnam kan ni, kawngchhe siam hi mipui mawhphurhna a ni ti ringawt lo ang u, ngaihtuahna i hmang ang u. Mamit kawngchhe lutuk hi ka chau tih Sumo-a tar mai mai pawhin kan rilru a ti hrehawm a, kan hrem a nih kha, khatiangte kha kan ni a. Chuvangin khang kha pumpelh a ngai, tun hun hi a ni dawn lawm ni. Fur ruahtui tlak tam avang te, sum sanction kan hmu lova, contractor hnathawh muan vang te, fur ruahtui tlak rei vang te tiin chhuanlam kan siam a, ka rawn sawi vek tawh a ni. Tunlai ah pata fel tak a awm, miin thudik kan hriat duh chuan hmuh mai theih kha a awm thin a ni. Chuvang chuan ngaihtuahna kan hman a ngai a.

Mizoram leilung hrechianglo state pawnlam mite'n Pu Deputy Speaker, tender an rawn chhang thin tih fo hi thudik hrula mipui hmin an tumna ang lek lek hian ka hre thin a. Construction Company lian leh experience nei tha, changtlung zawk te hian a vaibelchhe tel investment rawn ti tur leh hnathawh tur hian tender an rawn chhang a. Heng mite hian a pawng a takin an rawn

mitdel tender chhan mai mai hi ka ring tawp lo a ni. An rawn zir ang, a google theih vek engkim mai hi, khang zawng zawng kha an rawn hre sa vek ang. Chutiang a nih si kar ah chuan in duhsak zawngte phei chuan thawh sen loh kan nei, an nei a ni lawm ni! An cham hlen mai te hlauhawm khawp hian hnamdang contractor tlatlum laklawh ho phei hi chu PWD-ah hian kan tlatlum ta lutuk mai em ni tih mai tur a ni a. Vawiinah hian work quality maintain a ngai a, lung tha zawk, material tha zawk te hi i ngaihtuah ang u. Tin, work load bak hna hi pe lo ngam ang u. Contract hna lei a tam kan ti a nih pawhin, kan House Leader zahawm tak pawh khan contract hna hi lei chi a ni lo, kan hrem ang a tih kha pakhat hrem awm ta hlauh se chuan kan hralh ngam lovang. Thawk theilo chuan tender pawh kan chhang lo ngam mai, kan chhang ngam lovang. Chuvang chuan a hun taka zo thei tur hian sorkar mawh zel a ni a.

Lei chungchangah tum 6 lai mai lei a chim tawh, heng zawng zawng hi khawthlang lamah phei chuan Dialdawk, Dapchhuah, Teirei lei zawng zawng khu PWD-in kan veng vek mai, maintain ang u, chhiatna zawk a thlen loh nan. Tuman chhiatna thleng se kan duh lo Pu Deputy Speaker. Chuvangin heng zawng zawng ah hian kan sorkar hian ngaihtuahna hmangin, hengte hi a thlen tawh lohna turin hun harsa tak tak pawh kan lo paltlang tawh. Vawiinah hian ka lawmna em em chu Pu Deputy Speaker, hunrei tak atanga kawng leh lei chhia avanga harsatna kan tawh tih hi i dinglam amite pawhin an lo pawm ve thei ta hi a lawmawm ka va han ti em! Pawm lovin kha chen kha hun an lo hmang tawh. Vawiinah hian election kum te ni lo se chuan an pawm pawh ka ring chiah lo. Amaherawhchu, vawiinah hian baptist-in an lo awm ta hi a lawmawm ka ti takzet a. Chuvang chuan engpawh lo thleng se kan ram kan kaihhruaina ah hian a chhe ber pawh lo thleng se, a tha ber pawh lo thleng sela sorkar hi mawhphurtu kan ni tih hi pawm ngam ila. Chumi tur chuan theihtawp chhuaha, tan la a, kan resolution ‘hun rei tak atanga kawng leh lei chhia avanga harsatna kan tawh sukiang turin nasa leh zuala hma lak ni rawh se’ tih kan member zahawm tak Pu K. Sangthuama resolution hi ka thlawp a ni tih kan sawi a ni e. Ka lawm e.

DEPUTY SPEAKER : Midang in din leh hmang ngenna. Tunah hian a phar kan lo ziah lawk ringawt hi panga an ni a. Darkar khat pawhin min daih lova, in

la phar belh zel lehngal a. Chuvangin hun kha hman zawh kher tumlo ula, thiantie kian deuhin, sawi ngai kan sawi zing deuh mah mah a. A chian tawh kha chuan hun hman zawh kher kher tumlo deuh ila, phar tawh indawtin ka lo ziaak a. Er. Lalrinawma i lo sawm ang.

Er. LALRINAWMA: Pu Deputy Speaker, ka lawm e. Vawiinah member zahawm tak Pu K. Sangthuama resolution, “Hun rei tak atanga kawng leh lei chhia avanga harsatna kan tawh sukianng turin nasa lehzuala hma lak ni rawh se”, tih sawiho a ni tur hi a lawmawm hle in ka hria a. Chutihlaiin South I MLA zahawm takin amendment a rawn submit, “Hun rei tak atanga kawng leh lei chhia avanga harsatna kan tawh sukianng tura sorkar hmalakna kal mek hi tha kan ti” tih hi keima mimal ngaihnanah chuan vawiini a kan member zahawm tak Pu K. Sangthuama resolution hi a tha ka ti khawp mai a. A chhan chu, a rawn ziah ah hian, “Nasa lehzuala hma lak ni rawh se” tih mai a ni a. Tuna an thawhlai mek leh hma an lak mek hi a thalo a ti a ni lova, nasa lehzuala hma lak a ngai a ni a rawn tihna mai a ni a, ka thlawp a ni tih ka’n sawi duh a ni. A chhan chu, tunhuna kan dinhmun, kan kawng awm dante leh kan ram mipui sukthlek leh kan khawsak phung hi tuna kan kawng enkawl dan mek hian min dawlzo em tih hi kan ngaihtuah a ngaiin ka hria a.

Nikum lamah kan buai khawp mai a, a chhan chu khang harsatna zawng zawngte kha tuna kawng kan enkawl dan leh hma kan lak danin hmasawn a ngaihzia ti lang tu a ni tih hi Pu Deputy Speaker, ka rawn sawi duh a. A chhan chu, ka hmaa member zahawm tak tak te pawhin an sawi a, vawiinah hi chuan black top hi chu a tha tawh lo ve, concrete pavement a ngai zawk a ni te an han ti a. Khangte pawh kha tuna hmalakna kan duhkhawp loh zawk zia sawi lanna zel a ni tih ka sawi duh a.

Tin, heng harsatna kan tawh te hi a manganthlak khawp mai a. Vawikhat chu damdawiinah ka kal a, District Headquarter ami, nu pakhat raipuar hi chhak lamah hian a lo mu a, a thawkte khan, “E, Pu Rinawm, hei an harsa ve khawp mai a, mahse helicopter an rawn hmang a” an ti. An hmel en kha chuan helicopter han hman chu a huphurhawmpui ve khawpin ka hria a, amaherawhchu, an rawn kal miau si a, motor-in an rawn kal ngam tawh si lova, an ti a ni. Chungte pawh chu a bulpui berah chuan, vawiina kan kawng enkawl dan hian mipui min dawl zawh tawh loh avangin ngaihtuahna thar leh thinslung thar nen hmalakna thar kan mamawh a ni tih lantirtu zel a ni tih ka’n sawi duh a.

Tin, heng kan hmalaknaah hian engtinge hma kan lak ang, tu hian nge mawhphurh ang a, engtinge ke kan pen ang tih lai chu kan rilruah a awm tlangin ka hria a. Tunah hian contractor kan enkawl dan te pawh hi ngaihtuah ta ila, contract hnathawk reng reng te hi hna an thawh that avanga hna pek belh hi an awm em aw tih te pawh hi ngaihtuah tham a tling a ni! Hnathawh zawh hun taka zova lawmman pek tawh te pawh an awm em tih te pawh hi ngaihtuah tham a tling a ni. Tumah khatianga pek a, hna pek belh an awm pawh ka la hre lova. A thawk rei rei leh a thawk muang muang hian lawmman an la emaw ni tih mai tur a ni, Pu Deputy Speaker. A chhan chu an thawk rei a, time extension a awm a, contract a lo pung a, a hmaa nuai 100 man te kha nuai 150/200-ah te a chho thei dawn dawn mai a ni. A awmzia chu, an thawh muan khan contract an hmuh belh zel tihna a ni a. Hei pawh hi a awmzia chu, sorkarin hetah hian ngaihtuahna thar seng se, heng contractor, a hun taka zo leh hna thate hi lawmman pe ni se chuan hma kan sawn ngei ngei ang. Chu pawh chu hma kan sawnna tur. Vawiina kan project, road construction bika nasa lehzuala ke kan penna tur lai a ni tih kha ka'n sawi duh a.

Tin, a dawt leha ka sawi duh chu, hei hi World Bank-in India rama road construction industry-te a zirchianna lehkhabu a ni. Hetah hian chianguang takin contractor-ten enge harsatna an tawh tih chu Chiang takin arawn lang a, ka'n chhiar ang e, Pu Deputy Speaker, i phalna in. A hmasa berah hian, an harsatna tawh hrang hrangte a percentage arawn tarlang a; a hmasaberah hian, 'delaying and handling over of site' arawn ti, chu chu 15% an harsatna a ni. Tichuan, a dawt leh hi, cash flow a ti, 12%; delaying decision by the employer, 12%; inadequate design and drawing, 12%; inadequate of experienced man power, 11%; immigration of experienced person, 11%; delay in payment, 10%; inadequacy of modern plan equipment, 9%; procurement of critical equipment, 8%.

Heta ka sawi duh lai chu, hei hi India ram World Bank-in a zirchianna a nih avangin keini kan hnathawh pawh hi a ni ve ngei ngei ang tih hi a langchiang a ni. A chhan chu, vawiin hian contractor kan han thlang a, hna kan han pe a, a hmasa berin sawi ta ila, handling over of site tih lai hi, contractor engzat nge hna a thawh dawn a hnathawk hleitheilo hi awm ang le? Nichin lawkah MLA zahawm tak pakhatin khilai Zokhawthar lampang arawn sawi pawh kha sorkarin contractor hnenah site a pek theih loh avangin contractor-in a thawk theilo a ni. Chutiang zelin, Multi Modal lamah pawh sorkarin site a pe thei lova, contractor-in hna a thawk theilo a ni.

Chutiang zelin Serkhan-Baga-ah pawh a ni. Hei hi World Bank zirchianna hian 15% a tih avangin Mizoramah pawh hian thil thleng mek a ni. Hei pawh hi sorkar hian kan ngaihtuah a va ngai em! Contractor tender ten an chhan hmain ngun taka ngaihtuahin kan site pek tur hi 50%/75% tal hi chu clearance an pe thei dawn lo em ni tih hi ka sawi duh a ni. Chutiang kan tih loh avangin contractor-ten hna an thawhnaah harsatna an tawh mek a ni tih hi ka sawi duh a ni.

A dawt leha ka sawi duh chu delaying decision by the employer tih hi. Employer, sorkar leh a mi rawihten thuthlukna a siam mai loh avangin eng harsatna nge kan tawh mek? Vawiinah pawh working season a kal mek a, tender tam tak chu thuthlukna a la awm lo mai thei. Tender kan chhang a, biding kan chhang a, chutihlaiin contractor selection chungchangah rei tak tak kan inhnial a ni lo em ni? Biding validity pawh 90 days kan ti a, ni 90-ah pawh contractor kan thlang hlei theilo a ni lo em ni? Chu chuan hna a delay a, tahchuan lo kal zelin kan working season tur zawng zawngah contractor thlan nan leh tender biding buaipui nan kan hmang a, hun kan hmangral thin a nih hi! Hei pawh hi vawiina sorkar mawh bawh, kan than lehzelna tur, kan resolution-in a ken tel vek a ni tih ka sawi duh a ni.

Tin, pawisa pek chungchangte pawh hi sawi ta ila vawiinah hian nimin lawkah member zahawm tak zawhna chhannaah khan, kumin 2017-18 chhunga pawisa kan neih zat kha kan hria a, vaibelchhe nuai 85,640 kan nei a, hetah hian kan hman tawh hi vaibelchhe nuai 3,27,507 vel a ni a, 38% pawisa kan hmang a nih chu maw le! Hei hi a tha tawh kan ti em le? tih hi ka zawt duh a ni. Ka fapa in exam ta sela, 38% hmu ta sela tha tawh kan ti ang em le? Tha tawh kan ti dawn lo em ni? Tha tawh chu 78% tal , 80% tal hi tha tawh kan ti. Exam-naah pawh 70%/80% kan hmuh chuan tha tawh kan ti a ni, kan faten exam-naa 38% an hmuh hian tha an tih ka ringlo. Chuvang chuan, vawiina kan sum hman dan pawh kan endik a ngai a ni tih ka sawi duh a ni.

Chumai a ni lo, contractor payment chungchangah pawh, contractor reng rengte bar chart, anmahni hna kalphung ang turin bar chart, work programme nei vek an ni. Amaherawhchu, vawiinah hian contractor tu hian nge ama barchart ang uma bei hi awm ang le tih hi ka ngaihtuah thin a ni. Site tam tak, a hmingin Assembly Committee-a kan telnaah te kan va tlawh a, chungah pawh chuan an bar chart leh work programme-te chu an file-ah an dah mai mai a, kan lakchhuah chawp

tir a ni, keimahni va kal velnaah te pawh! An bar chart pawh a awm hek lova, bar chart an tih loh avanga penalty an pek tur pawh chu pek hleih theih pawh ni lovin chutiang chuan thil a kal a. Khatiang khan time extension lo ni zelin, a thawk rei rei khan lawmman an la emaw tih mai tur a ni, kan ram dinhmunah hian. Chungte pawh chu vawiina kan sorkarin hma a lak dan tur zel a ni tih lai kha ka sawi duh a. Chumai piahlamah, inadequate designs and drawings tih te pawh hi ka sawi duh a. Inadequate design and drawing tihte pawh hi zaa sawmpahnih a ti a ni, helai lehkhabu hian. Chumi a nih chuan heng hna kan va thawhna kawngah hian khawiah emaw miin hna a va thawk a. A design chungchangah harsatna a awm ang. Khatiang zel khan thutlukna kan siam zung zung thei lova.

Tin, chu mai piah lamah nichinah ruah tui kan sawi a. A nihna takah chuan tunah chuan University pawh kan nei tawh, heng zawng zawngte pawh hi sorkar hian hma lain kan ram mil tur kawngte pawh hi design a hun ve dawn lawm ni? Vawiina kan tih theih ber black top chu ruahin a ngeih lo, concrete pavement a tha kan ti a. Tichuan concrete pavement kan rawt a. Chu pawh kan ti thei lo a nih pawhin heng ang ngaihtuahna thar, design tha zawk hi kan ngaihtuah a ngai a ni tih hi ka sawi duh a ni. Chumi a nih loh chuan kan kawngte a chhe zung zung mai ang a, rei a daih si lova. Chuvang chuanin ruahmanna tha kan mamawh a ni tih ka sawi lang duh a ni.

Chutiang zel chuan heng contractor thlan chungchangah te pawh, contractor tha duh angin kan ngah lo pawh a ni mai thei, India ramina a harsatna tho tho a nih rualin heng contractor te pawh hi kan chher a ngai a ni. A nihna takah chuan political background a nasa lutuk a. A nihna takah chuan kan sawi ngam lo mai mai a ni. Vawinah hian Engineer-te kutte hi kan phuar em a tih theih a ni. Kei ngei pawh hi DISHA meeting-ah vawi tam tak kan tel tawh. Kan bial chhung ngeiah pawh entir nan, Hmuntha – Khawbel chu rei lutuk kan thawk tawh, Chhingchhip – Hualtu pawh rei lutuk kan thawk tawh. DISHA meeting-ah pawh kan sawi fo mai. Tha takin min chhang department-te pawhin. Mahse, vawinah hian official tu hian nge contractor ngam kan ti a ni.

A chhan chu, zep thu pawh a awm lo. Engineer-te kut hi phuar ni lo se chuan tun aia nasa zawk hian hma kan la thei ngei ang. Amaherawhchu chu chu a ni lova, kan va sawi kan va sawi pawhin a tihngaihna tak a awm lo. Kan beidawng deuh a ni

ber mai, official te hnena thil sawi hi. A nihna takah chuan anni pawhin thutlukna dik tak an siam ngam bik lo a ni, zep thu pawh a awm lo. Heng zawng zawng pawh hi sorkar tan chuan kan inenlet a ngai ve a ni lawm ni! Kawng tha, tha zawk kan duh a nih chuan. Quality control chungchangah te pawh chutiang zel chuan mawhphurhna kan nei a ni. Amaherawhchu chung zawng zawng pawh chu a nihna takah chuan thil hi sawi a harsa a. Engpawh nise kan sawi duh lai zawk chu heng zawng zawngah hian (agreement kan ti a, nichinah member zahawm takte pawhin an sawi a) agreement kan tih pawh hi, agreement ang tak taka kal tur hi chuan official te hian an ngam bik lo a ni, zep thu pawh a awm lo! An va tih turte kha a phenah lian tak a lo awm zel! An chaih te ah, an chaih thui tial tial a, lian deuh a lo awm zel. Chutiang chuan thil hi a buaithlak a ni, hengte pawh hi i pawmpui ngam ang u.

Engineer-te pawh hi, officer te pawh hi a nihna agreement anga hma la turin i thlahthlam ve ngam ang u. Chu mi a nih chuan hma kan sawn ngei ngei ang. A hun takah hna te pawh an zo thei ang. Hna a hun takah te pawh zawh a awm thei ang. Vawiina kan project zawng zawng hi zaa za ka hre vek lo, amaherawhchu, a hun taka zawh hi chu a vang khawpin ka ring. A chhan chu hremna a awm tak tak hlei thei lo.

Rate chhiat lutuk avanga contractor ama thua a bang thak a nih loh chuan tute mah hi terminate pawh kan ngam mang lo chu a nih hi.! Chutiang vel chu kan dinhmun a nih avangin a thawk rei rei an vannei tih ang deuh tak tak kha a nih avangin hengte hi a buaithlak em em a ni.

Tin, helaia harsatna ve tho inadequate experienced manpower tihte pawh hi ngaihtuah tham a tling a. Helaiah hian skill development te pawh kan sawi thin a. A nihna takah chuan kan ramah hian labour an vang khawp mai. Kawng thawk tur tam tak pawh ti dawn ila khu tah, ram pawn atanga rawn lak chhuah a ngai a, a group groupin- khatiang te kha a ni a. Hengahte pawh hian kan tual chhungte hnathawktu chungchangte pawh hi keimahni rilru put hmangte pawh siam vein heng hna thawk thei turte pawhin helai engineer te emaw, sang tak kha a han ni kher lem lo, helaia tual chhunga hna han tih ve theih mai tur ang chi, khatiang chite pawh khan ngaihtuahna seng ila. Sorkar pawh hian hengah te pawh hian tih theih a ngah ang tih kha a sawi theih a. Tunah erawh chuan khatianga hmalakna kha a awm lem lova. Contractor pawhin a duh ang hunah manpower a hmu thei lova. Hlawhfa an haw, a

nih loh leh eng emaw thil thleng a lo awmin an inphur thla sup sup a. Khatiang chi eng emaw a lo thlen khan a vaiin contractor-te nen kan pheik buai zel thin a ni.

Tin, ka'n sawi leh duh bawk chu hei 2007 kum hian Road Fund Act hi kan lo pass tawh a, hman lohin a awm char char a. Nikum lawkah Road Fund Rules kan siam a. Tuna kan Finance Minister zahawm takin a rawn pharh takah erawh hi chuan a lawmawm hlein ka hria a. Mizoram Road Fund Act, 2006 a ti a, 2007 tur a nih kan ring a. Hetah hian rawn ziak langin State Road Fund atan pawh 50 crore dah a ni tihte pawh hi a rawn sawi tawh a. Hengte hi lawmawm ka ti a ni kan hmasawmna ve hrim hrimah chuan.

Tin, kan sawi leh duh chu hemi kan work planning hrim hrim kalphung pawh hi hetia khawiah emaw pothole a lo awm a, te takte a nih laiin kan ngaihthah a. A lo lian zel a, cheng zanga man leka siam theih tur kha cheng sing a nih hun hi kan nghak thin em mawni tih mai tur a ni. Financial power, Pu Deputy Speaker (tlem te) thuneihna sang zawk kan nei tawh a. Chutah chuan NEDP hnuai atang pawhin kawng siamte pawh kan dah tih a ni a, kan hmang zung zung thei tawh. Chuvangin kawng chhiate pawh hi dap chak ila, bei chak ila. Vaimim fang ang deuh hi a ni, vaimim fang pawh hi a inrem dik thap lai chuan pakhat pawh mal thlak a harsa a. Amaherawhchu pakhat kan mal thlak chuan a dang pawh a mal thlak vek theih tawh a ni. Khatiang deuh khan ka ngaihtuah thin a. Kawng pawh hi te takte a kuak lai hian siam vat vat ila. Hei state-ah pawisa kan nei reng a. Tunah chuan cheng zanga man tur kha cheng sing man i nghak ang aw ti ang vel kan ni. A chhiat zauh tawh hnuah an siam thin a. Hengte pawh hi planning thar chu kan mamawh a ni lawm ni, Pu Deputy Speaker.

A tawpa kan sawi duh chu South I MLA zahawm takin a rawn tih 'tuna an hmalakna hi a tha tawk a ni' tih kha tha tawk viau mah se ramin a kham khawp miau loh avangin MLA zahawm tak Pu K. Sangthuama resolution 'nasa leh zual zawka hma lak,' tih lai hi an tih mek hi tha lo kan ti a ni lo. Amaherawhchu, ramin hma a sawn dawn chuan tuna policy zawng zawngte pawh hi tha tawk kan ti lova, hmasawn leh kan duh avanga MLA te pawh hi ni kan ni lawm ni? Chuvangin Pu K. Sangthuama resolution hi ka thlawp a ni tih Pu Deputy Speaker, ka sawi e. Ka lawm e.

DEPUTY SPEAKER : A lawmawm e, Pu Hmingdailova Khatiangte.

Pu HMINGDAILOVA KHIANGTE : Pu Deputy Speaker, ka lawm e. Kan resolution original hun rei tak atanga kawng leh lei chhia avanga harsatna kan tawh su kiang turin nasa leh zuala hma lak ni rawh se tih rawn move-tu Aizawl West-I MLA zahawm tak kha a inbuatsaih nasa hle in ka hria a. Amaherawhchu a inbuatsaih nasat luat ah khan a resolution hi a mangnghilh deuh niin ka hria a. An sorkar laia an hnathawh leh an hnathawh tur an thawh hman tak loh kha a chhiar chhuak teuh mai a, a resolution tak kha chu a theihnghilh niin ka hria Pu Deputy Speaker. Chutih laiin Aizawl South-I MLA zahawm tak Pu R. Vanlalvena khan resolution a kha uluk takin a lo en a, a lo chhiar a, he ti zawk hian kal tur a ni tih an buatsaih a. Hun rei tak atanga kawng leh lei chhia avanga harsatna kan tawh su kiang tur a sorkar hmalak na kal mek hi tha kan tih an ti hi a ni awm reng a lo ni zawk a.

Tin, Pu Deputy Speaker, i vei lam in a he amended form-a resolution lo lang hi tha an ti lo niin a lang a, a chhan chu sorkar hmalakna kal mek hi tha kan tih hian i chawl tawh ang u le, i thu thluang duai ang u hmiang, kan ti a ni lo tih kha min lo hriatpui phawt sela Pu Deputy Speaker.

Tin, hun rei tak atanga han tih hian engtik atanga tan nge a nih a, eng chen nge ni ang tih kha a ngaihtuah theih a. Engpawhnise Mizoram in kan rilrua lo lang ni ber leh mover ten an sawi dan leh an han tan dan atang khan calendar year nikum 2017 kum chhung kha a ni berin a lang a, chuti zawng chuan rilru te lo nei ta ila, ani taka a, nikum kha Monsoon rei ber kum a tih theih a; tin, a rapthalk bawk a. Tin, monsoon kha a intan hma a, February thla 1st week vel atangin a in tan ringawt mai kha a ni a. Mizorama khaw tinin lo pawh an hal hlei theilo a ni tih kha tlang hriat a ni tih kha han sawi nawn leh ta ila.

Tin, a tlangpuiin monsoon hian favang te a thlen hi chuan October thla ah chuan lei hi a lo nem tawh a, Zoram hi leimin in a ti buai mek a ni. Nikum erawh kha chu favang chu sawi loh November/December thlengin ruah a sur mai a. Chuvang chuan kawng siam tura kan PWD hotu te leh an hnathawktu te zawng zawng tan chuan hnathawhna tur hun tha, khaw tha avang em em a ni tih kha kan hriat phawt a ngai a ni. An fel leh fel loh lam a buk vak chi pawh a ni loin ka hria Pu Deputy Speaker.

Tin, session kan tan hma lawk kar khan Congress Bhawan ah khan party dang atanga lawmluh (a bik takin ZNP ti mai ang atanga lo lut) pa fel takin tiang hian thu a sawi a- “Chanchinbu ah te ka lo chhiar a, mi ti ti te ka lo ngaithla a, lei engemawzat a chhia tih ri kan hria a, ka rilrua lo lang chu (an la pawm luh loh avangin ‘in’ ti hlir in a address a) in Congress sorkar hian hna hi in lo thawk nasa em mai a, kawng te hi in lo siam nasa a, lei te pawh in lo dawh hnem tawh zozai a, tlem azawng te chu vanduai vangin chhia te pawh a lo awm thei a, a kawh ber chu in Congress sorkar hian hna in lo thawk nasa em a ni tih hi ka ngaituah a ni,” a ti. Chuti zawng chuan Pu Deputy Speaker, i vei lam ami te pawh khan han ngaituah ve se la chuan vawiih hian ngaituahna thalo lam hi chu an dah that mai ka ring deuh a ni.

Engpawhnise, ka sawi zel duh chu kan Governor zahawm tak khan a thusawiah khan kan state PWD ten nasa taka kalkawng an enkawl te arawn sawi a. National Highway pawh tunhmaa kan neih ngai loh 11 zet mai kan lo enkawl ta a, km 1500 dawn lai an ni a. Tin, chu bakah state Highway te leh khawpui kar kawng tam tak enkawl tur an ni bawka, chung zinga a lar deuh deuh kha chu kan sawi tawh a, Kaladan Multi Model Transit Transport Project te, National Highway 44-A te leh Bhaga Road upgradation te an ni a. Bhaga Road upgradation hi han sawi ve ta ila, ka hma ami te khan an sawi nual tawh a. Kum 2008-a Pathian khawngaihna azara Tuirial bial MLA te kan lo nih ve takah chuan mahni bial te kha chu kan han zir ve a, Bhaga atanga km 75 kha kum 3 chhung in (2006-2008 chhungin) metal vek a ni e tih hi Finance Dept atangin report ka la a. Amaherawhchu, a takah erawh chuan 2009 kum tir ah lawmthu sawi tura bial kan han fan chuan km 14 Lungmuat dai pawh hi an thleng mek chauh a lo ni a, a pan em em mai a. Kan haw lam chuan kan chawl a, JE pakhat chuan, ‘ka pu, nichin lawk khan kan CE a ti nge kan SE a ti nge ka hre reng tawh lo, a lo kal a, ‘in ti chhah lutuk, kha ai khan ti pan deuh rawh u,’ min ti a, a hrehawm ka ti hle mai,” a ti. Km 75 metal zo vek tawh an tih sum kha khawiah nge a awm aw. Nichina kan member zahawm takin arawn sawi ang khan hotu lian tak tak te pawh case nei in an awm a nih kha.

Vawiih hian chu kawng chu nikum khan a fur a thal in kumtluan khan khu kawng khu Mizorama kawng tha ber a ni awm e. Car a kal thei tluan chhuak thak a ni tih kha kan sawi duh a. Tin, Hortoki kha tlem han sawi ka duh a. Kawnpui atanga Hortoki inkar hi km 18 a ni a, 2008 a pawl dang ti mai ang, MNF atanga mi 200 zet lawmlut tur khan vawiih kan CM zahawm tak, kha tih laia kan party President Pu

Lal Thanhawla hnung ka zui ve a. Hortoki kawng siam tum ni awm takin alkatra bur te chu a khat tawkin an hung thla thluah a. Amaherawhchu reilote ah kan siam zo ta e ti niawm takin an seng zo leh vek a, tichuan kawng chu siam zawh veka report a ni a, Bhaga Road ang khan. Amaherawhchu Kawnpui atanga a dai km 3 chiah an metal a ni. A bak zawng pawisa kha chu report-ah chuan Finance-ah a awm vek a, vawiin hian karawn keng chhuak ang ka ti a kan theihngihl hlah a. Amaherawhchu term hmasa te kha chuan Junior takin thiam leh thiamlo takin kan han puang chhuak ve tawh kha a ni tih in ngaihtuah chhuak thei in ka ring a ni.

Inbuatsaih a thui tak sawi ka tum lo a, vawiinah hian kan PWD te hian hna tam tak nei in thawhna hun tur nei si loin vawiina heti zozai kawng an lo maintain an lo enkawl hi kan han ngaihtuah chian hian fak loh rual an ni lo a. Kan Minister changtu leh a hote'n a theihtawpa hun awm lo chung chung a hna an thawk a, he ram tana hna an thawhna hi Pu Deputy Speaker haider chi chu nilo in ka hria. Tin, a chianna em em pakhat leh chu term hmasa khan Hrangturzo bialtu MLA zahawm tak khan Artahkawn kawng chhia kha a tlangau pui thin a. Chutiang bawkin Aizawl West I bialtu MLA zahawm tak khatihlai ami khan khulalah khuan Ropaiabaw kawng chhiat thu kha ring tawkin he House-ah hian a tlangau pui baw thin a. Pu DeputySpeaker, vawiinah erawh chuan khatiang tlangau pui kha a tul ta lo a niang! Chung lai kawng leh a dangte pawh chu a tha tawh a ni ang a, a va reh rei ta ve tih hi ka ngaihtuah deuh a ni. Chuvangin Pu Deputy Speaker, vawiinah hian amendmend form-a kan resolution Pu R.Vanlalvena'n a rawn put chhuah hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti tih hi a tha lo a ni tih sawi theihna a awm reng reng lo a. Chuvang chuan a tha tawh a ni tih hi ka'n support duh a, he House zahawm tak hian pass ngei tur pawhin ka duh bawh a ni tih ka rawn sawi a ni, ka lawm e.

DEPUTY SPEAKER : A lawmawm e, hun tlem i kian a, Dr.H.Ngurdingliana.

Dr. H.NGURDINGLIANA : Pu Deputy Speaker ka lawm e, Aizawl South I MLA zahawm tak Pu R.Vanlalvena amended motion rawn putluh 'hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti' tih hi ka thlawp a. He private resolution thehluh theih hun chhung khan ka zin bo avangin ka rawn nang hman lo a. Rawn nang hman pheii chuan tiang hian resolution rawn thehluh hial ka tum a ni. 'Hun rei tak atanga kawng leh

chhia avanga harsatna sut kian a ni mek zel hi a thlamuan thlak kan ti,' ti a rawn thehluh ka tum nghe nghe a ni.

Chungah chuan ka'n sawi duh Pu Deputy Speaker, Finance Minister zahawm takin Budget-ah a rawn pharh ang khan kawng siam nan ₹ 66,764 lakhs a awm a, chumi bakah additional fund ₹ 19,153.25 lakhs min pek belh bawk a, a zavai hian kawng siam nan ₹ 85,640.25 lakhs a awm a. Tin, kan Minister PWD changtu zahawm takin a chhan ang khan hman tawh hi ₹ 32,757 lakhs a ni tawh a. Tunah hman loh ₹ 52,838 lakhs balance hi a la awm a. Chutah chuan nichina kan ngaihthlak ang khan Aizawl West II bialtu member zahawm tak Pu Ruatkima khan nikumah khan ruah sur tam ber a ni lo ve a rawn ti a, a dik ang a chhan chu D card pawh a nei. Amaherawhchu keini chuan a tam ber kum kan ti lo a, a rei kum ber kan ti a ni. Kan Governor meuhin longest monsoon season a tih kha. Hengte avang hian kan PWD te pawhin pawisa nei mahse khua-in min bumro tlat avangin hma an la thei lo a. Tuna ka zeldin dan mai mai chuan PWD Minister leh PWD E-in-C atanga kawng siam labour thleng hian kumin chhung hian ruah sur miah lo mahse pawh an tih ka ring lo. Chuti khawp chuan an thahnem ngaihna a sang a, chu chu mit ngeia hmutu ka ni.

Chuvangin keini kan bial Chalhfihl chhunga kan Minister leh PWD ten hma min lak sak khi wawinah member zahawm tak takte hnenah kan puangzar duh a ni. Kan hria a, kan bial chu bial hnufual kan ni, 'hmar thimpui, zangkhaw bungbut hnan' min ti thin. Amaherawhchu Pathian leh PWD Minister leh PWD Engineer-te zarah tunah chuan hmar eng pui hmasawnain a hual bial kan ni. Chumi tur chuan tunah hian tun kum li chhung lek hian tun thlenga pawisa kawng siamna tura Chalhfihl biala lut tawh hi ₹18,567 lakhs a lut tawh a ni. Tunah hian Phullen atanga Khawlian black top kan zo tawh a, Khawlian atanga Daido tunah hian kan thawk mup mup, Phullen atanga Suangpuilawn tunah hian kan thawk mup mup, Dilkhan atanga Tualbung, Dilkhan atanga N.Lungpher, N.Lungpher atanga Buhban tunah hian kan thawk mek. Chumi piah lamah kan zawh tawh bawk Zero point atanga Khawruhlian kawng mam em em te khi periodical repair atangin PWD hotute'n min tih sak tawh a ni.

Chumai a la ni lo va, Tuirini lei vanduaithlaktakin a chim, chumi kawngah chuan bialtu ka nihna angin kan sawi duh chu, (kan Minister PWD changtu sawi

awm tak) a pawl kan ti amaherawhchu chhan a awm a, tunah kar leh maiah Enquiry Committee DC ho-in an chho dawn, chung kan harsatnate hria-in kan PWD Minister-te leh kan Finance Minister zahawm takte'n sum ₹ 210 lakhs min han pe nghal a. Tunah hian SLT Company-in a foundation (a technical term chu ka hre lova) Abutment chu chu siam turin engineer te nimin minleh khan an han tlawh a. Karleh khian arang aranga siam turin kan Minister-te leh kan PWD Engineer ten an vil reng a ni. Chumai chu duhtawk loin khaw chin a hriat loh a, ruah vawikhat rawn baw hawk se tuna thal lei kan siam khi a la mai dawn. Chung avang chuan member zahawm tak Tuivawl bialtu Pu R.L Pianmawia bial tlang dungte leh kan bial khaw li nga-te tana kawng, bye pass tun ami hmang lova kawng hnuk tawi zawk siam turin Finance Minister zahawm tak hnenah kar hmasa khan kan va leng a. Tahchuan Khanpui atanga Vanzau, Vanzau atanga Buhban mipuiten kan chhawr theih tur kawng Highway division ten DPR min siam sak kan thehlut a, kan finance minister zahawm takin tunah hian chak takin min bawh zui sak a ni. Chutiang chuan Tuirini lei chungchangah pawh PWD, kan Minister leh Engineer ten vil rengin chak takin hma min lak pui a.

Tin, hemi piah lamah lei hlauhawm a nih avangin tunah Tuirini lei min siam sak a, chutiang baw chuan kan report a Saitual leh Phullen inkarah Tuivawl lei a awm a, khi lei pawh khi Tuirini lei aimaha hlauhawm zawk a ni. Chung chu thlenin tunah hian Overseas Company-in ₹ 982 lakhs-in a foundation an siam mek a. Chutiang chuan PWD hian kan bial chhungah nasa taka hma min lak sak avangin 'hawh u, lawmthu i sawi let ve ang u,' tiin kan bial mipui te nen nikum October ni 11 khan Dilkhanah kan Chief Minister ho-in PWD day hial kan hmang a ni. Kan lawm em avangin ran pawh sawmpahnih chuang a tlu, chutiang tak chuan hma min lak sak a. Tunah hian kan hma lawkah Inter state connectivity scheme hmangin Manipur sorkar-in kan inrina Vawngkawh thleng an rawn lai thleng tawh a, keini Mizoram lamin i ti ve ang tiin PWD hotute'n duhsak takin Daido to Vawngkawh 7 kms, ₹ 3,500 lakhs hi tunah DPR min thehluh sakin NEC leh DoNER -ah min bawhzui sak mek a ni.

Heng zawng zawng Daido-Vawngkawh hi Pathian leh an zarah lo hlawhtling ta ila tun kum li chhung hian Chalhfilh bial mipui chuan kan kawng siam nan ₹ 22,067.6 lakhs kan dawng dawn tihna a ni. Chuvang chuan keini chuan vawiina resolution Pu K.Sangthuama member zahawm tak, kan senior ni bawh rawn putluh

hi kan haider lui a ni, a naka zen tu kan nih tlat avangin! Member zahawm tak Pu R. Vanlalvena resolution pawh kan thlawp piah lamah a aia nasa zawka uar deuha resolution a putlulh ngei pawh kan duh, khang zawng zawngah khan PWD hi he kum li chhung hian an muhil lo a ni. Taima takin an thawk a ni, chumi karah khua in a bumro a ni tih hi i chiang ang u tih hi ka sawi duh a. Pu Speaker, hun rei ka la lovang a, thu sawi tur te an la awm avangin. Chalfilh tlang mipuiin kan chang thlan hian ka'n ti tawp ang e, "Keini Chalfilh bial mipui leh MLA tan erawh zawng PWD hnaih hi a tha a ni". Ka lawm e.

DEPUTY SPEAKER : Awle, Dr. K Beichhua.

Dr. K. BEICHHUA : Pu Deputy Speaker, ka lawm e. Vawiina he resolution tha tak sawihona hun kan nei thei hi lawmawm ka ti a. He resolution thehlul hun chhung hian i ding lama member 34 te chuan pakhat mah an thehlut lo a ni, i vei lama member 4 te chuan panga deuh theuh kan thehlut a ni. Chutiang chuan mak ka ti ang reng viau a. He resolution kan ballot ni khan pakhatnaah member zahawm tak Pu Sangthuama hi vawi li lai pawh chhuah a ni. Chuvangin he resolution hi Pathianin rem a tih avanga min pawh chhuah tir a ni tihna rilru kha a hmasa in ka nei a, chutiang chuan vawiinah sawiho theia kan awm hi a lawmawm hle a, he resolution hi tha ka tiin ka pawmpui baw a. He resolution hi Zoram mipui pawh hian min pawmpui in ka ring a, tha an tih pawh ka ring a. Engvang nge kan tih chuan kan tuihal na ber leh vawiina kan rualawhna ber chu kawng tha hi a ni tlat a ni. Chutih rual chuan he sorkar hi in chak lovin hma in la lo ve kan tihna a ni lo, vawiin kan ram leh kan kalkawng dinhmun ngaihtuah chuan, 'hawh u, kan kut tha ti chak ila, tun aia chak zawk in hma i la teh ang u,' ti a rawtna a ni mai in ka hria a, Ruling lam tan pawh thil huatthlala a awm pawhin ka hre lova. Tin, mak deuh maiin a hunah thehlulh miah loh vawina amendment rawn siamtu kan member zahawm tak pawh khan engatinge a hunah khan a lo thehlulh loh? Heng hi kan sawi dawn takah chuan opposition ho hian an han sawi vak ang a, kan mualpho palh ang tih hlau ni awm taka zing atanga amendment rawn putlulh nghal ringawt kha mak ka ti a ni Pu Deputy Speaker. Chuvang chuan he resolution hi i dinglam ami te pawh hian a va tha ve tih hi an tih tur ni mai in ka hria a ni. Rilru fim takin ngaihtuah ila, kan ram tan, kan hnam tan leh kan ram hmasawn zelna tur a ni tih hi kan rilruah awm se tha hle in ka hria.

Pu Deputy Speaker, vawiina sorkar na chelh mek hi kum sawm a ni dawn tawh a, chumi chhung chuan thil tha tih tam tak in nei tih pawh kan hria a, in tih fuh loh lai te pawh a awm tih pawh hmuh theihin a awm a ni. Chung zinga tha lo leh fuh lo zual deuh lai ami leh mipui vantlang mit hmuha tha lo lai bera ka hriat chu kan kalkawng leh leihlawn dinhmun hi a ni. A mimal ang tak pawh hian ka vei a, mipui pawh hian an vei a, kum 2014 Nov, 21-ah khan keimah ngei hian he resolution hi ka rawn pulut tawh a ni. Chutah chuan member zahawm tak tak tam tak in kan sawiho a, khatihlaia kan tawngkam kha ka beng ah hian ala cham reng thin a ni, “vawiina kan kawng dinhmun hi North East-a kawng tha ber a ni” tiin member tam takin an sawi, Vawiina kan leihlawn te hi hei aia tha leh zual tur chuan air-condition kan vuah a ngai tih tawngkam te a chhuak a nih kha, Pu Deputy Speaker. Chutiang chuan kan kal chhova, amaherawhchu, vanduaithlak takin kan leihlawn chu chumi hnuah chuan vawi nga lai a chim a ni, a pawh hle! Vanduaina hi tu chungah pawh a thleng thei, mimal chungah pawh a thleng thei, ram chungah pawh a thleng thei a ni, kan sawi lawk theih loh leh kan control theih loh thil a ni. Chutih lai chuan vanduaina a thlen chhan tam ber hi chu khawvelah fimkhur loh vang leh inthlahdah vang hi a ni duh chawk a ni tih hi vawiinah ka sawi duh a. Chutiang dinhmun ah chuan kan awm a, khatihlai khan kan resolution kha min hnawl sak ta a nih kha, 2014 kha a ni a. Vawiin hi 2018 a ni tawh a chumi hnuah pawh kan kalkawng dinhmun ah hmasawna engmah a awm lova, mipui kan rum a, ram in harsatna namenlo a tawk a ni. Chuvang chuan kan awm hle hle thei lova, i veilama awm te hian, ‘hawh u, ngaih loh lamah ngai lo ila,’ tiin kan member zahawm tak Pu Vanlalzawma’n resolution 16th Oct, 2015-ah khan a rawn luh pui leh a ni, chutah pawh chuan kan member tam zawk te khan kan kawng kha a la tha in ti tlat a sorkar hmalakna kha a tawk in ti tlat a, chutiang chuan kan kal chhova, mahse, vawiinah erawh chuan tun ang dinhmun hi kan thleng chho ta a ni. Chuvang chuan kan senior member zahawm tak Pu K. Sangthuama’n a vei ve viau in ka hria a, ‘hawh u tun aia chak zawk hian hma i la teh ang u,’ tiin rawtna a rawn siam leh a ni. Chu a rawtna siam chu rawtna tha tak a ni in ka hria a, vawiina kan dinhmun aia sang zawka kan thlen chhohna tur te leh hma kan sawn leh zual theih na tur chuan vawiina kan tih chin leh vawiina kan thawh chin aia chak zawk leh nasa zawka kan thawh hi a ngai tlat a ni. Chutih lai chuan vawiina member tam tak thu sawi te kha kan hre theuh a, vawiinah hian kan kal ngai tea kan kal hi a tha thawkhat e tih amendment nen danglamna awm in ka hre lo kei chuan, Pu Deputy Speaker, he House zahawm tak ah hian (Speaker-in

Chair arawn la). Chuvang chuan Pu Speaker, he House zahawm takah hian lungruak tak in he resolution hi pass pui mai ila, chak zawk in hma i la teh ang u tih hi sorkar pawh hian pawm mai se thil tlawm thlak a niin ka hre lo a ni.

Vawiina member tam takin an rawn sawi ah kha chuan kan kalkawng chhia leh kan contractor ten an thawh that loh hi sorkar mawhphurhna a ni lo tih tawngkam te kha pawl ka ti hle a ni. Vawiinah hian fur ruahtui tam vang kan ti a, dik pawh a dik, fur ruahtui tam hi 1998 atanga 2008 thleng khan 28415.2 mm-a tam a ni. Kum 2009-2018 ah khan 21210.7mm-a tam a ni, a inthlauhna hi 7205.7mm a ni a, 1998 atanga 2008 chhung khan a tla tam zawk a ni.

Tin, Pu Speaker, state dang ah te pawh hian ruahtui hi a tamna hmun tam tak a awm ve a ni. Nikum lamah Arunachal-ah kan zuk kal a, nichina member zahawm takin a sawi tawh ang khan fur laiin an kawng a min ve nasa a ni, chutih laia an thil tih kha video record ka la dah tha vek a, chuta an thil tih chu thal nghah dawn pawhin a thlamuan thlak hle in ka hria a, lung leh hmanrua tam tak fur ah khan an chhek khawl a ni, khang ho tan khan thal an nih chuan hna an thawk nghal mawp mawp thei in ka ring a. Chutiang chuan keini pawh hian fur chhung hian lung te emaw, thil dang fur chhunga lak theih ang ang hi chu lo chhek khawl thei ta ila, tih tak takah chuan fanghmir te pawn in hmakhua nachang an hria alawm maw le! Keini pawh hi inhmakhua ve ang u, chutiang a nih chuan thal reilote hi kan hmang tangkai thei ang tih hi ka hmuh dan a ni. Tin, thal ah lah chuan contractor te, Mizoram dinhmun hre lo leh hmu ngai lo ten e-tender-in an rawn chhang a, a leilung dinhmun hre si lovin kan control thei lo a ni an ti leh bawk si, fur khaw chhiat avanga kan thawh theih loh hnu thalah contractor te kan control thei leh bawk si lo. Pu Speaker, engtikah hian nge maw kawng tha hi kan neih ang le tih hi vawiinah hian member zawng zawng ten ngaihtuah ila, mawhphurhna pawh hi sorkar hian la ngam se, keini pawh hian opposition in ti lovin ram leh hnam tana pen chhuak ve tho kan ni, thil tha turah chuan lungruak takin pen ho ila a va tha awm em tih kha vawiinah hian ka sawi duh a. He resolution hi ka pawmpui a, amendment tura rawn lut erawh hi chu a ngai te in la kal ang tihna angah ka ngai a, Pu Speaker, ka pawm lo a ni. Ka lawm e, Pu Speaker.

SPEAKER : Pu T. Sangkunga i lo sawm ang u.

Pu T. SANGKUNGA : Pu Speaker, hun tha tak min pe a, ka lawm e. Vawiinah hian kawng leh lei chhiat chungchanga kan harsatna thu resolution leh amendment form-a kan sorkar hmalakna kal mek tha kan tih thu in a rawn zui a. Pu Speaker, chhia tih hi a inang lo khawpin ka hria a, Vanzau kan awm lai chuan motor te hi khilamah a lo la kal lo a, 3ft kawng hi kan kawng zau pawl a ni a. Ka pa nen hian motor kawng laih tur an ti a, kan han inhlawh ve thin a, 10ft lai maiin kan han lai a, a vung thing phela kan han hrut chuh tha hi ka ti em em mai a. Tunah chuan black top pawh hi tha kan ti mang lo va, tha kan tih te hi a inang tawh lova, in sak te pawh hi kum 5 kal taa tha kan tih em em kha a aia tha in an rawn ti leh a, tha kan ti leh tawh lo va. Chuvangin chhia tih te, tha tih te hi a inang lo a. Pu F. Sapbawiha, Cooperation Department-a thawk thin khan a ziak ka chhiar chu buai lai khan Khawhai tlang dung khian hmarcha thar tam an in ti lutuk a, kan Bawrhshap hnenah, ‘min rawn phurh sak teh u a tam ropui si a, tihngaihna a awm lo,’ an ti a, Bawrhshapin min tir a Jonga motor pakhat phur hi a lo tling lo deuh hlek a a ti a. Khatiang khan a teh dan azir hian tha tih te, chhia tih te, tam tih te hi a inang lo em em mai a. Hmanniah khan nu pakhatin an pa ngaihawng neih leh miin an lo duh ve mai thu kan sawi a. ‘Kan pa hi chu a hmeltha em a ni’ a ti a, kan en a, chhia hi ka lo ti em em baw si a. Chuvangin, a mihring azir te, a awm dan a zir te hi ni mai mai ta hian ka hria a. Vawiinah hian tha kan tih leh chhia kan tih hi kan mit azir leh kan hmuh zau dan azir te pawh hi a ni thei a. Mi tilreh pawh kha a hriat miao loh avangin hrilhfiaktu a ngai a, Bible-ah pawh ziak tam tak a awm a, tha chu eng nge ni tih te kha a awm a, hriat hi a har riau a, Chuvangin chhia leh tha ringawt pawh hi a hrilhfiah tham hle in ka hria.

Kan sorkar hmalakna hi (PWD hmalakna) a bu kan nei a, kawng chhia hi an siam tha chak hle dawnin ka hria a. Kan tum a ni tia va au va au thu a awm si lo va, ka hmel a tha tia sawi miin an nuhzat ang deuh hlek nih te pawh an hlau ve ang. Chuvangin i vei lam ami te pawh hian Pu Speaker, lo han zawt se, heng hi lo nei se chuan “nasa lehzuala hmalak” tih hi an telh ka ring lo va, heng zawng zawng hi chu hria se, hei bak chu tihngaihna a awm lo a, an tih ve tho ka ring a, an hriat lohnaah hian ngaihdam an ngai niin ka hria. PWD-in heti khawpa kan Minister zahawm tak hova hmalak an tum dan leh an pawisa neih dan hi an hre lo, chuvangin an thiam loh pawh a ni lo, kan lo hrilh lo te pawh keimahni thiam loh te pawh niin ka hria. Nikum Budget Session khan ka sawi a, a amount, kan state fund baka road leh bridges-a

A/A an sanctioned amount ringawt hi kan budget aiin a tam a ni, Amaherawhchu, kha kha expenditure amount sanctioned a ni lo a, A/A amount a ni a, A/A a awm tawh chuan thawhna U/C zuk pek a, installment ang rawn release mai tur a nia. Amaherawhchu, fur nasa kan tih pawh kha a inang lo a, Pu Ruatkima te kha chuan a quantum-ah an rawn teh ta a ni, mahse, kawng siam theih lohna chhan tak zawk kha chu ruah tam lutuk lova February thla atang khan a sur reng mai a, a quantity a zuk teh dawn kha chuan a aia a tam kum te pawh a lo awm si a, chuvangin, a tlak tam vang leh a tlak rei vang te pawh a lo ni a ni tih hi in han sawi atang khan ka fiah deuh a, tla reng mai kha chu alkatra leh ruah hi an in kawm ngeih lo em em a ni. Chuvangin, khatia a tlak reng avang khan nikuma kan pawisa tam tak kha kan hmang hman ta lo va, chu chu kawng in a tuar a, kawng chhak atanga rawn min mai a ni lo, a chhuat tla hawk te a tam a ni. Thingtlang kawngah te pawh khian 407 Truck kal theih tawhna kan tih te pawh a chhuat pumin an tla hlawk hlawk mai a, tihngaihna a awm lo. ‘Hma lo la ringawt mai ula, kan pute hnenah kan lo sawi ang,’ kan ti a. Kawng chhak lam an laih belh a, thlang lamah lung te an dawh a, an kal leh thei hram a ni. Fur laia lei khawih hi a tha lo khawp mai a, PWD-a Pu Robula nen kan thawh dun laia Engineer ho review meeting-a a sawi fo chu thala lei laih hi a tlo a, fura in laih aiin kum thumin a min rei lo a ni a ti thin a ni. Chuvangin, thingtlanga ka kal pawh in inhmun emaw in feh kawng pawh thalah lai rawh u, December leh January a laih a tha, a thal rei a, fura khawih hi chu a chi loh ka ti thin a. Fura khawih hi a chi loh mai ni lovin a tlo lo bik tih kan hre theuh a. Kan Engineer te leh kan Minister te an felin theihtawp chhuah mahse khua in a zir ngang lo a ni tih hi kan pawm tlan a ngaiin ka hria a.

Tin, PWD hmalakna tur te hi ropui ka ti a, laboratory testing equipment an han lei tur ringawt mai pawh hi a rura ka ti a, hei hi a pawimawhna chu kawng an laih, an han black top te, alkatra tak tawk lo leh cement tak tawk lo te tehna kan nei lo hi kan mangang a ni a. Hmanniah pawh ka biala PMGSY kawng blac top chhe deuha an hriat avangin E.E. ka sawm a, Aizawl lam atangin kan chho a, Sasih kawng siamnaah laboratory testing equipment kha a lo awm chuang si lo va, a test theih miah lo a ni. Khawl an han lei teuh mai tur hi lawmawm ka ti a. Tunah hian engemaw zah an lei dawn a, heng te hi kan thatpui khawpin ka ring a, an hmalakna mek hi i veilam ami te hian an hre lo ka tihna a ni a. Tin, Central YMA-ah te a hminga kan awm laiin, PWD-ah Pu Ramhluna kha Engineer-in-Chief anih laiin

‘PWD leh YMA hi i thawk ho ang u, a neituah YMA te hi tang ve ilangin, kawnga insukna sahbawn tui leihbuak leh side drain hai fai ringawt pawh hi kan lo en deuh chuan harsa lo deuhin YMA-in neitu chan changin in ti thei ang,’ a ti a, kan phur khawp mai a, mahse engtikah nge MoU kan sign dawn?’ ka ti a, ka zawt thin a, mahse a tluantling ta lova. Tunah YMA leh PWD-in MoU kan sign tep a ni tih tuna kan PWD hotuten an rawn ti hi keini hun lakah chuan hma an va sawn e, tih ka ngaihtuah a. Hei rigawt pawh hi thlamuanawm ka ti a ni.

Tin, chubakah JCB te, Bolero, UTM, Bolero Pick-up, Honmix C Plan tih te, Tipper te chi, Mini Tandem Roller tih te, Concrete mixture tih te 20 theuh an han lei turte hian tuna an tih theih loh ang kha anmahnin khawl tha tak nena Company ta ringawt ring lova an rawn nei turte phei hi chu hria se, hei hi an rawn move ka ring miah lova. ‘E khai, hma an la nasa em mai,’ an tih ka ring a. Chuvangin heng kan lo hrilh lo te pawh hi kan thiam loh pawh a ni ang tih te ka ngaihtuah let a. An hmalakna tur hi a tha em em a ni.

Tin, kan bialah ringawt pawh khian Khuangleng to Sesih leh Lianpui lam pawh an black top zo tawh a. Thinghrangkawn to Bungzung an zo tep a. Khuangleng atanga Leisenzo an tan dawn a. Thinghrangkawn atanga Sazep-Vangchhia tunah khian an tan ti tih tawh bawk a. Khatiang khan an kawng laihsa tun hmaa a pavement work chu a hlawk lo em mai tia an bansan thin, kawng hlui em em kha tunah chuan an black top zo tep tawh, a expenditure sanctioned, AA mai ni lovin a rawn awm ta vek mai a ni. An bung sup sup mai a. Road Roller hmu lo tam tak kan la awm a, ropui hi an ti hle. Fresh Cutting-ah pawh hetah Mualkawi atanga New Hruaikawn, tunah Hruaikawn atangin Bulfekzawl an ti leh dawn a. Tin, Khuangthing atanga Thekpui inkal pawhna hnai a awm theih loh avanga hetia let kual vak vak ngai te kha tunah vaibelchhe tam tak sengin PMGSY-ah min rawn laih sak nuk nuk mai a. PMGSY kawng zawng zawng hi reilo teah Prime Minister Programme ang a nih chuan kum 2019 ah zawh vek tur a ni bawk si a. Khawmpui apiangah YMA leh MHIP te, Tuipuiral Games te, Upa Area ringawt pawh wawi 5 ka han tel pui a. Chunga kan kawng that dan turzia ka’n sawi te chu ngaihnawm hi an ti ve lutuk a, ‘hetiang hian engtingge in tihchhuah theih?’ an ti a, ka tihchhuah theih phei hi chu a ni hran lo. Ropui an ti em em mai a, a then phei chuan, hmeh keuh hunah lawmthu sawi nan hriatreng tur te an han ti fiam a, ka lo inthlahrung lek lek thin a. Khatiang khawp khan kan kawng khi tha dawnin an hria a ni. ‘Ngawi teh u,

heng tuna a awm sa hi an zawh vek chuan Zoram pumah kawng tha ber pawl aniang,' te ka'n ti a, an hlim em em a ni. Tiau lui ami rora tha tak tak te, balu tha tak takte an thiar chho zut zut mai bawk si a. Hmannia ka han kal phei chuan a tehna awm lo, laboratory testing tel lo chuan bill an pe tawh miah dawn lo, an ti lehngal a. Khati a nih phei kha chuan a estimate anga kawngtha tawk neih mai loh chu hmabak kan nei lo reng reng!

Tin, tunah NABARD loan-in Keitum-Tuipui-Khawbung-Champhai Road pavement work atan cheng vaibelchhe 48 an rawn sanctioned lehngal a. Hei phei hi chu kum 20 chhunga kan kawngpui ber la khawih reng reng loh, a uar deuh chuan, 'engtunge i tih theih? Campaign a ngai lovang', te an han ti a. Khatiang kha chu a hrehawm loh angreng khawp mai a, NGO function-a tel te hi a lo manhla ber zawk a nih hi, kan thusawi ngaithla ngai reng reng lo, party-a kan tiha lo kal ngai lo khan kan sorkar thiltih that zia hi an han hria a, an lawm em me a ni. Kan Minister zahawm tak hi hmanni ah a room-ah ka lut a, 'in kawng laih zawh turte hi in khawih chuan nakinah furah ruah a rawn sur ang a, kan kawng tha sa i black top sa hi a chhe vek ang, chuvangin opposition lam an rawn au ang a, election-ah kan tha lo ang a, lai lo mai teh a, a tha sa black top zur zur hi a tha lo maw?' te ka va ti a. 'A contractor hi central lam appoint a ni si a, an rawn appoint tawh bawk si a, an sanctioned tawh bawk si a' te a tia. A lo chhia a nih pawhin a that dawn vang a ni. Chuvangin vanram kai tur chuan thih phawt a ngai ang deuh hi a ni a. Mamit leh Kawrthah kawng zawng zawngte pawh hi a that dawn vanga chhia a ni a. An rawn sanctioned teuh mai a. Chuvangin a chhe lai in hmuhte pawh hi a thatna tur, buhchi a thih phawt loh chuan a to thei lo ang hi a ni tih lo hria ila thain ka hria a. Kan kawng hi chuan that mai loh chu hmabak a nei lo reng reng. Kan phun kan phun chuan fur lai pawhin black top tlut tlut tur a ni mai a.

A nih loh leh cement-a tih mai tur a ni a, furah a pawl lo kan tih si kha chuan. A tlo leh zual duh vanga nikum fur kan insum te kha a lo pawl ta hnuhnawh mang e aw, ka ti a. CLP ngaihtuah te hi Leader-in a pawm phawt chuan a valid a. Zawngtetui YMA resolution pawh kha kan Chief Minister-in a pawm hi chuan thu puitling a ni em em mai a. Hmanni ah te khan CLP resolution te kha kan ngainep lek lekin ka hria a. Kan kawng hian that lam a pan dawn, kan Engineer te lah hi an han thiam em em a. Kawng siam dan te, lei dawh dante min han hrilh hi ngaihnam ka ti a, a mawl mi hi ka lo ni bawk a. Chuvangin vawinah hian he resolution hi kan

hriat loh vang mai maia move kan ni. Kan sorkar hian hma ropui takin a la mek a. Hmanni Champhai kawng kan han kalte chu Saitual thleng khi a lo tha em em mai a, Kawlkulh chho te, Khawzawl leh Champhai chho ah khian an siam mek hi kan hmu thluah mai bawk si a, ‘e khai! a lungngaih awm loh tawp hi’ ka ti a, a tlan pawh hi kan tlan rei lo ta em em mai a ni. Tin, Serchhip lamah Saidankawn lam Khawbung lama lo kal lahin

SPEAKER : Dar 4 a ri amaw? Hei kan zo law law dawn nge? Dar 4 hi kan pel zen zen lova, Private Member’s ni ah chuan. House thu thu ni rawh se. Zawh law law kan duh maw? Awle, i hun chu a tawp tep hrim hrim.

Pu T. SANGKUNGA : Ka lawm e, Pu Speaker. Biate leh Tuipui inkar te hi crore 8 in an rawn black top zur mai a. A bialtu Pi Awmpui ai mah hian keini hian kan chhawr a. Kan kal tlangna a ni a, anni chu Biate atanga balu zu lak dawn loh chuan an kal mang lo a nia. Keini chuan zin nan kha kawng kha kan chhawr viau a ni. Heng Keitum- Lungdar te pawh khi tha leh se kan bial lam hi a chhawr ber tur kha kan ni zel a ni. Chuvangin Pu Speaker, ka’n ngen duh chu opposition MLA zahawm tak te hi PWD hmalakna tur a bu hi pe theuh ta sela, an chhiar peih phawt chuan an hlim ve ngawt ang, kawng an vei em mai! Keini aiin an vei zawk tlat. Chuvangin PWD ho hi, Pu Speaker, ka’n ngen duh che chu, an hmalakna tur zawng zawng kumina sanctioned amount awm leh AA amount awm zawng zawngte nen hian pe sela, ‘Amended form hi a lo dik a nih hi,’ an ti em em ang. Chuvangin keini a hmute kha chuan amended form-a kawng leh lei chungchanga resolution hi, Pu R.Vanlalvena putluh amended form ami hi kan support em em a ni tih kha kan sawi ve a ni. Ka lawm e.

SPEAKER : Le, Pu Pianmawia.

Pu R.L.PIANMAWIA : Pu Speaker, ka lawm e.

Vawiinah kan senior member Pu Sangthuama resolution putluh hi Pu R.Vanlalvena’n amended a rawn siam te hi a lawmawm ka ti a. An mualphona tur khuh tur hian Congress hi pa chan kan lo la chang zel mai a ni tih hi a tichiang khawp maiin ka hria a. Engnge a chhan kan tih chuan, a bulthumah sawiloha helaia kan tih vak vak ai hian a bulthum sawi law law mai ila tha in ka hria a.

Kan sorkar kalta ah khan tuna kan veilama awm te hi a tuihang hawp pha ve lo te kha an nia. Chuvang chuan thil hi an hre thuilo ve si a. An mualpho tawhna puhruk tur hian tu ten emaw an fuih a a ni. Kawng leh lei vel te resolution-ah an pulut tlut tlut mai a ni. Heng hi an hriatloh vang a ni a, ngaidam ila a tha in ka hria a. A chhan chu heng zawng zawng lo chhuahna chhan chu, kan ramin kawng chhia, lei chhia, thil chi hrang hrang chhia kan sawi hi a bul ber chu kan sorkar kalta MNF ministry-ah khan sum duhna, 3% it avangin, sum duhna avang khan BRTF-in an enkawl that hle hle lai te pawh kha kan chhuhsak ta a. Contractor sing rual te ruai a 3% pawh kan lo it lutuk avang khan kan ram thatna tur hi kan lo hralh tawh a ni tih kha kan thiante hian an hre si lo a ni.

Khalai kha han thup mawi leh turin resolution-in an ti thin a. An hriatloh vanga an tih hi a awm ve tho tih chu ka chhut ve na ramah chuan a ni a. A chhan chu sum itnaa an kal nat lutuk avangin kan ram hi a chhe zo mek a. Entirnan, Congress khan 2008-ah khan sorkarna changlo phei se chuan kan rama RGGVY electric hnathawh zawng zawng te pawh hi a puitlin ka ring lo. A chhan chu 80% contractor te hnena an lo pek lawk avang khan keini khan 20% la inawh der der khan Zorama electric la en lohna khua zawng zawngte ti eng turin hma kan han la a nia.

Fuih bawk, hau bawk, fak bawka kan tih avangin tunah chuan electric en lohna khua tam tak thingtlang te pawh hi an lo en theih phah ta a ni tih hi vawiinah ram mipui hriatah pawh hian sawi a tha in ka hria a. Chuvang chuan kan bial atan te phei chuan a dik tak chuan Congress hi a sorkar lo ang tih a hlauhawm khawp mai. MNF sorkarah khan kan Highway awm mek kha East Phaileng ah reh bun a, khawchhak lam Zawngin-ah kaltir a, a piah lampang zawng kha chu Highway kha min hnutchhiaha min tlansan an tum a ni. Kan sorkar takah khan kan hotute hnenah kan thlen a. Highway kha khitah tan tlang lo in min kal tlangtir leh ta a. Tunah phei chuan New Vervek – Vairengte thlengin, Highway No. 306A min tihchhuah sak a. Tiang hian hma min laksak a ni.

An hunlaih khan chuan New Vervek leh Sakawrdai inkar te pawh kha black top kha head hrang pahnih in (kan hriatsualloh chuan) sanction a awm a ni. Mahse head pakhat chauha thawh a ni a, mahse pawisa chu a ral vek tho a. Chuvangin an thawh dan ah pawh khan a tha lo a. Labour ho inzirtirna ber pawh, mi

hriatlar loha an inzirtirna ber pawh ‘black top hna ah khan pan deuhin, pan deuhin’ tih kha a ni mai a. Chuvang chuan khami atang khan chhiatna kan ramah hian a lo thleng niin ka hria. Hei hi a pawh ka ti a. A bulthumah kan hriat si loh chuan ram mipuiten heng kawngchhia te, lei chhia te hi Congress tihchhiat emaw an ti mai ang tih te a hlauhawm ve a. Chuvangin bulthuma thil sawi hi a tha in ka hria a.

Tin, Pu Sangthuama, a puluttu in hmanlai thil a sawi ang deuh khan waviinah Pu Vanlalvena’n a siamthatna ti mai ang, a siam marna thu arawn siam te kha a tangkaizia tur chu ka ti a, thil kal tawh sawi tak rau rau ah chuan. Kan bial ah khian bus nei hmasa ka ni a. Kawng a tha lo em em a, a neitu kan ni tih kan chianna ah hian thil chu a kal tluang thin a ni tih kan hriat a tha a. Sawi ringawt lo a a tak ram titu kan nih hi a pawimawh a.

Kawng zauhlai mek Tuirini atanga Mualmam inkarah ringawt pawh leimin hmun sawm (10) velah keimahniin kan siam chawp thin; leimin te, PWD kan phut lo. Chutiang chuan a thawktute kan phut em em lo. Suahdur leh bawngtuthlawh leh lungral te, thirtiing te kan pai mai a ni. Chutiang chuan a neitun kan thawh kan thawh chuan kan michhawrte khan mi an zah a, engemaw hlekah pawh, zanah pawh engemaw harsatna kan tawh a nih pawhin anrawn tlankhawm a, an ti mai. JCB a ngai a nih pawhin zanah pawh, zan dar 8 ah pawh hei kan laklawh si a, chutiang khatiing, thihna avangin kal tlang a ngai si a ti a minrawn tlawmngaih sak thei em kan tih khan zan dar 8 hnuah pawh light thalo chung pawhin mi anrawn tihsak mai a ni.

Chuvang chuan a sawia sawi ringawt ni lo hian a neitu kan nihna hi a tak ram chantir zel ila. Chuvang chu a ni mai thei a ni, PWD hian kan bial kawng khi model road ah pawh siam an tumna chhan ni. Chuvang chu a ni BRTF kut atanga chhuhsakin sum duh vanga khatianga contract peka 3% pawh kan duh avanga kawng a lo chhiat tak mai.

Chumi hnuah kan PWD ten neitu nihna changin theihpatawpin hma an han la a, sanction an han nawrchhuak tak tak a. Lehlamah chuan an nawrchhuak tam lutuk hi, ram tana an thahnemngaihna hi tun dinhmunah chuan hmanrua te duh angin engkim kan lo nei tha si lo a. Hmanraw chah dawnin hla tak ami chah a ngai a. Vaivakawn-a siamtur Dawrpui ami lak mai a, lei mai theih a lo nih loh laiah khan khuta mi chah te a ngai a.

Alkatra te pawh entirnan no.1 hman ve kan duh a, no.1 kan hmu hlei thei si lo a. Kan hauh kan hauh pawhin, a sorkar ang pawhin duh angin kan hmu thei si lo a nih hi. Chuvang chuan thil tha kan duh, amaherawhchu kan dinhmunin a la tlin tawk loh avang hian vawiina Pu R.Vanlalvena'n he resolution siamremna a rawn tih hi lawmawm ka ti a. Chuvangin a puluttu lam te pawh ram puma an mualpho lutuk na tur a rawn humhim a, a rawn chhan niin ka hria a. Chu chu a hlu pawh ka ti a.

Khami ang khan tuna rorelnaa member kalkhawm te pawh hian pawm tlang mai ila a tha in ka hria. Chutilochuan miin thil tak tak kha an rawn ngaihtuah chhuak zel ang a, Pu Vena tih anga kan tih khan kan mawi tlang vek a ni mai. Thil hlui sawi sawi a ngai tawh lo tikhan. Tiang chuan kal ta ila a that ka ring a. Chutiang tur chuan memberte ka sawmin ka ngen ve a ni e. Ka lawm e.

Pu LAL THANHAWLA, CHIEF MINISTER : Deputy Speaker, Speaker a rawn lut a, 'dar 4:00 pm ah kan bang ang' a ti a, nang pawhin dar 4:00 pm ban tur i rawn ti leh a. Mahse dar 4:00 hnu ah khan i sawi tir tho zel a. A lehlam lehlam in kan sawi tawk tawh a, kan ngaihdan a hriat tawh a. Chuvang chuan in thu ah khanding ula a tawp thei tawh mai lawm ni tih kha ka rawn rawt duh a.

Tin, vawiina kan sawi hi nia, Pu K.Sangthuama, member zahawm tak resolution pawh kha thahnemngaihna thil a ni a. Tin, a wording ah erawh chuan ti zawng hian ni se a mawihnai zawk e tiin member zahawm tak Pu R.Vanlalvena'n a rawn ti a, khami pahnih kha kan sawi kha a ni a. Chu chu i buk tura kha a ni mai a, tin, he problem lo chhuahna hi pakhat ah chuan ruah sur tam vang nilovin ruah sur rei vang a ni, kawng chhia hi.

Aw, a sur rei em a ni, kan Governor pawh khan a sur rei em a ni a ti ve chiah a, chuvangin a sur rei em a ni. December thla, Christmas hma, Christmas decoration te pawh kan phawrh tan tawh ang tih ah pawh khan a la sur a ni. Tin, nichina member zahawm tak Pu T.Sangkunga'n a sawi ang khan alkatra (bitumen) leh ruah hi inngeih lo tak an ni. An inthian tha vak lo.

Tin, inchhung atangin kan puan sukna al pet puat te kawng ah kan theh thla a, tuihawk luankawr ni lo te tuihawk luankawr ah kan siam a, kawngah kan luan tir a, in sa tam takin an iron rod te chhut ngil nan leh chhut kawih nan kan kawng hi an hmang a. Tin, motor silfai tam ber hian motor kawnga luangin an sil bawk a. Hengte

hi a tlo lohna a ni a, hengte hi kan sim a ngai a. Sorkar ang pawhin hengte hi engtinng e kan ngaihtuah ang tih hi keima mimal rilru ah chuan ka ngaihtuahna a ni.

Tin, a tawi nan, 3 % hi 2008 kuma sorkar khan an la thin a, hlawk an ti hle a ni, sum pawh an neih ngah phah a. Khang 3 % an lakna kha nuaih 50,60,100,200, 300 te lek lek a ni a, khati chung pawh khan a hlawk a ni. Chuvangin National Highway contract amount vaibelchhe sang tel hi zuk dil ila, zuk la ila, khami 3 % kha a hlawk dawn em mai tih ngaihtuahna a ni ngei tur a ni a.

Defence Ministry-ah state PWD kuta hlan turin kha sorkar khan an zuk dil a, ka hriat veleh kan state PWD tih tur rual a nih ka ring lova; tin, chubakah a kalphung hrim hrim ah thu kan nei tak tak dawn si lo tih kha ka hria a, chuvangin Defence Minister ka zuk bia a, lehkha ka thawn baw k a. Mahse kar hnih khat hnu lek ah khan, ‘decision siam fel tawh a ni a, heti hian lo awm rih rawh u, a paw khawp mai,’ a rawn ti a ni. A chhan chu tender te hi a amount hi ti te rawh u, kan tih pawhin an ti te thei lova, Mizoram kan contractor, tualchhung kan contractor te thawh theih bak (capacity) piah lam kha a ni.

Tin, Delhi-ah tender hi an float daih a. A thlanna ah kan engineer te hi an tel ve miah lo. Tin, Mizoram hi khawiahnge a awm tih pawh hre mang lo ho khan hmuh loh hlau in hniam te te in an chhang a, chu chu Mizoram an han hrechiang a, an rawn chhuak leh duh lawk thinlo a ni. Chuvangin, anmahni ngei ka zuk biak hi a tam a ni. Kan zuk vau te pawh an tam a, ‘kan plug list ang che u’, kan tih te pawh hi an tam a ni. Chutiang chuan rei deuh hnu ah vau avang te in an rawn chhuak a, contractor thenkhat pheih hi chuan hralh leh an duh a, a dawr tute ngeiin min hrihl a, 12% below a chhang tawh pawh khan 12% pawha hralh leh a tum a, lei rual a ni lo ve an ti a ni. Chuvangin a chhan ber chu 3% awh vang hi niin a lang a.

Tin, a hlawk hle a niang, tuten emaw an hek a, an dap dawn in Magistrate in a lo hrihl ru a, a in chhep relh vek chung pawhin passbook-a la awm ngei an han man sak te kha vaibelchhe 8 leh nuaih 89 emaw lek kha a la ni! A hlawk zia chu khata tang khan a hriat in ka hria a, phat rual a ni lo, tunah hian khawiah nge, CBI nge, khawiah nge a tang ran a ni. Chuvangin a bulpui ber chu 3% kan awh vang hi a ni lawm ni ka ti a, Pu R.Vanlalvena, member zahawm tak resolution support pahin chu chu ka rawn sawi ve duh a ni, 3% lak kha a chhan leh vang ber a ni e.

SPEAKER : Awle, dan naranin private ni hi chu dar 4:00 pm kan pel ngai lova, chu chu dan nghet tak a awm hran lova, House ngaihndan kha lak thin a ni a. Tunah khan House ngaihndan kan la a, House-in sawi zawh a, vote lak hman kha in duh zawk si a, tichuan dar 4:00 pm kan pel ta a ni tih kha House in hre ve ila. Tunah chuan kha House Leader kha kan koh tur tho a ni a, mahse a lo sawi hman a, Minister zahawm tak kan sawm tawh ang a, (Pu Vanlalzawma : Pu Speaker, ka lo ngaichang deuh che a, kan House Leader a ding tawh na a inthlahrunawm khawp mai a. Ka lo nghak ve deuh a, tawi te kan lo sawi ve lawk ang e) Awle, sawi rawh.

Pu VANLALZAWMA : Pu Speaker, nia, kha House Leader a ding tawh a, a din tawh hnuah han din leh pawh chu a inthlahrunawm khawp mai a. Amaherawhchu tun tum session hrim hrim chu ni 4 lek emaw kan ti a, thil hi danglam deuh hi a thleng nual mai a. Kan Governor a rawn thleng hmasa nulh mai a, a tan ni ah. Heta House-a tumah kan thut hma in, chutihmek laiin CLP in Zofate Chawlhbuk sak a tih mek laiin sak theih loh nan sec 144 te Home Minister rawn miah lovin a lo puang map kha session kal lai thil a ni a.

Tin, member zahawm tak Pu Sangthuama'n resolution a nei a. Chumi support angreng si amendment kha nidanga kan tih ngailoh ang deuhin a lo lut leh vat a, kan zawt kual a, kan senior member te pawh hetiang hian amendment hi a kal ngai em mawni le ? Pu Vena rawn tih luh ang mai hian. Engemaw zat kan sawi hnuah amendment tur kha a lo kal a, tikhan kan kalpui thin kha a nia, a ti a. Mahse dan bawhchhiatna a awm pheih chu a ni hauh lova, helaiah hian. Chungte chu tun tum session hi a mak teh nuaih ang reng a, Pu Vena khan a ti duh a nih pawhin sawiho hnu ah khatiang amendment kha a rawn rawt thin ang deuh khan, kan senior te pawh kan rawn a, helaiah hetiang hi vawikhat kan hriatna a ni an ti a. Engpawhnise (Speaker : Ngawi rawh, amendment kha chu dan anga siam tur a ni a) Chu pawh chu engemaw chen kan sawi hnuah an rawn ti thin a.

A ruling lam khan dan naranin (dan kan bawhchhia e tih ni lovin) 'kan la tih ngai reng reng loh a ni e,' an ti a. Chu chu kan sawi hmasa duh lawk a ni. Engpawhnise, member zahawm tak Pu Sangthuama'n private member resolution a rawn putlul hi kan ngaihthlak tawh ang khan he House-ah hian tum thum a sawina a ni tawh a. A wording draft dawn pawh hian fimkhur takin kan hotuten an ti a, sawi rem ve deuh tur te pawh hi kan ngaihtuah a ngai a ni tiin a rawn tan chho

a. Amaherawhchu a sawi zawh veleh khan member zahawm tak khan amendment a rawn rawt nghal a, khang te pawh ka'n ngaihtuah thin a, kan chhiar phei a, 'rei tak atanga kawng leh lei chhia avanga harsatna kan tawh sukiang tura,' tih thleng hi chuan ala tha khawp mai a. A rawn movetu kha pa rum leh pa huaisen nia ka hriat kha a rawn nem phei ta riau mai a, helai phei ah hian, 'kan sorkar hmalakna kal mek hi tha kan ti,' a rawn ti ta daih mai a, East Tuipui bial tupa rawn chulmam sa a nih duh hmel khawpin ka hria a. Pu Vena kan member huaisen leh rorum ber maiin hetiang a nem zawnga a rawn kai lut nghal ta mai, kha kha kan House Leader-in an rawn sawi nghal atang te pawhin han ngaihtuah ila. Tender kan chhuah dan te pawh kha kan House Leader pawh khan tha a ti lo a ni lawm maw ni le khulama tih daih te pawh hi! Chutih lai chuan sorkar hmalakna kal mek pawh hi tha kan lo ti ve bawk si a, he resolution-ah hian. Helam hrechiang hlei lo te pawhin an rawn chhang ve sup sup a tih te kha, a in kalh deuh ta mai awm mange aw Chief Minister han sawi zawk leh helai kan resolution hi. Kan kal mek dan a kha ani chuan tha a ti lova, phailam atanga kan auh chhuah vak vak te kha, helama luh chhoh dan te pawh hi a awm lawm ni te pawh ka han ti duh a. Mahse tiang khan amendment a lo kal ta miau si a. Engpawhnise, kan thu ni tawh lo turah ngai ila, a lokal tawh miau si chuan. Tichuan, kam hnih khat leka ka'n sawi duh chu he House chhungah hi chuan kan kawng hi chu a tha thei khawp mai a, mahse a hmunah va kal ila kan lung hi a awi tlang chiah si lo va, mahni bial theuha han chhuah sang sang hian, chung te chu a va buaithlak awm mang e aw ka'n ti a. Tin, hmanni lawka Tlawng lui leh Pukpui inkar kawng chungchanga chhim bial unau te thawm te kha ka'n ngaihtlak hian ava zia lo em aw ka'n lo ti ve ringawt a. 'MLA pasarih ah pasarih kan rawn thawn phei a, kawng tha hi chu kan phu ve a ni,' an han tih te, an hotute che vel pawh an han tih buai deuh kha, khang te pawh kha ngaihtlak hi chu a nuam lo mang e, an beisei dan kha! He House-ah Lunglei District atangin MLA pasarih an awm a, MLA pasarih ruling an rawn thawn phei a. Mahse an kawng chhiat zia an rawn sawi khan, an lungawi lo te pawh kha a awm viau te pawh khan ka hre deuh a. Mahse he House chhungah hi chuan kan han sawi tak tak chuan kan kawng hi a mar leh pur bawk si a, hriatthiam hi a har khawp mai a.

Tin, kan thawm ngaithla zawng zawng hi ka ngaihtuahna ah chuan tunah pawh hian Mizoram hmun hrang hrangah pawh hian thusawi hi an lo ngaithla ang a, an beidawng hle chuan kei chuan ka ring a. Kan kawng chu a tha dawn chuang lo a nih hi tiin min lo conclude ang tih hi chu a hriat theih ruau ruau in ka hria a. A chhan chu heti chen kan kal a, hetiang kawng hi kan nei a, hmasawn theihna a awm lawm ni tia resolution pass a, kan kal dan pangngai hi a tha a ni tih kha a ni deuh ngawtin a lang a. Chuvangin Zoram mipui te kan beidawng viau awm mang e aw tih ngaihtuahna ah a lo awm a.

Tin, nimin piah lama zawhna chhanna kan han hriat ah te khan pawisa hi a awm lo pawh a ni lova, pawisa awm lova kawng chhia hi chu ni se a hriatthiam theih deuh a. Mahse pawisa hi a lo awm khawp mai a. Tunah pawh financial year thar kan kai dawn mek a, chutih rual chuan pawisa la hman loh nuai hlir, nuai 52,883 kha a lo la awm reng bawk si a, kan kawng a chhe bawk si a. PWD officer pakhat ka zawh chuan, ‘pawisa hi a awm lo emaw ni le?’ ka ti a, ‘pawisa chu a tam alawm, mahse kan hmang thei lo alawm,’ a ti a. Khalai tak te kha kan kawng chhiatna chhan te chu a ni mai awm mang e aw ka ti a. Hetia pawisa tam ringawt hman theih si loh kha, heti hi chuan kawng hi chu a tha mawh ngawt hi chuan ka ring a Pu Speaker. Chuvangin vawiina tlema kan kalphung pangngai lo deuh hreta, fimkhur taka member zahawm tak Pu K. Sangthuama rawn rawtna zawk hi he House zahawm tak hian pass ta zawk ila Zoram mipui kan hlim tlang zawk ang a! I pass mai ang u tiin ka rawn thlawp a ni, ka lawm e.

SPEAKER : Aw le, tunah chuan sawihona khaikhawm turin Minister-in-charge sawm ila. Chumi zawh ah chuan resolution neitute kha vote turin in han dil ve ve ang a, chuan vote kan la mai dawn nia. Tunah Minister i sawm tawh ang u.

Pu LAL THANZARA, MINISTER : Pu Speaker, ka lawm e. Vawiina Private Member Resolution hi PWD concern la nihna avangin member zahawm tak tak ten an thil sawi han sawifiah ngai te a awm in ka hria a, chung han sawifiah chu ka tih turah ka ngai a, a khaikhawm tur ka ni chiah em ka hre lo a. Engpawhnise vawiinah kan senior member Pu K.

Sangthuama'n 'Hun rei tak atanga kawng leh lei chhia avanga harsatna kan tawh sukiang turin nasa leh zuala hma lak ni rawh se,' a tih Pu R. Vanlalvena'n a amended form-a, 'hun rei taka atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti,' a han tih support pahin member thenkhat te thil hriat fuh lo deuh te sawifiah pahin leh kan hmalak mek dan te tawi te tak tak chauh sawi ka tum a ni Pu Speaker.

A hmasa berin hemi resolution neitu in a rawn sawi a kan ngaihtlak tawh ang in, a han move khan, kawng tha kan neih theih nan a sutkianna tur kawng a rawn sawi dawn emaw ka ti a, a rawn sawi lem ta lo in an hunlaia hmalak tawhna nia a hriat, mahse an hmalakna ni mang si lo tam zawk kha a rawn sawi lang a. Chutih rual chuan ama bial chungka kan hmalak mek na Tanhril - PTC kawng chungchang hi a changtu Minister-in min han hrihfiah thei deuh sela a tih kha,- Nia, Ramrikawn – PTC upto National Highway 54 hi, Airport kawngpui ber, Huntharah leh Rangvamual thlen dawna kawng min thin avanga fura kawng block thin, chumi hel nana ruahmanna siam a ni a. Hei hi kan sawi tawh thin angin NABARD atanga sum hmuh a ni a cheng nuai 931 leh sing 8 leh sang 6 a ni a. Open tender koh a ni a, chutah chuan Pu Lalfamkima hi a chhang hniam ber a nih avangin hna hi pek a ni a. Tin, khulaiah khuan chak taka hma lak tum a nih avangin Sakawrtuichhun Co-ordination Committee te insiam in sorkar-in hmalak a tum dan zawng zawngte kan sawi khawm hnuah, sorkar hmalak tum dan te pawh ti danglamin anmahni duh dan angin hma lak chhoh a ni a. Amaherawhchu vanduaithlak takin helai hmuna contractor in hma an lak in premix carpet a surfacing nalai tur remchang laiah hnathawh tan a nih in thil dang sawiselna teh chiam awm lo in Sakawrtuichhun YMA ten an sawi zui ber chu prenex carpet rawra hman gradation leh supervising engineer 24 hours duty tur awm lo kha an lo complain a gradation hi sin deuh pawh awm ve mahse specified maximum size 13.20 mm-a sin, a aia lian te pawh lo tel ve nawk awm in, a contractor pawh hian a lo control lo deuh a, hetiang a nih avang hian a hman tur rora a lei khawm sa pawh hi specified gradation anga ti tura her nawn leh tura contractor hi hriattir a ni a, chutiang chuan hma lak a ni a.

Tin, chutih rual chuan Supervising Engineer, Junior Engineer te hi kan hriat angin PWD-in kan indaihlo nasa em em a, kan indaihlo chung chungin khulai kawng khu kan ngaihpawimawh avangin Diploma Engineer pakhat khulai vil tur khuan Muster Roll-in kan ruai ngawt nghe nghe a ni. Chutiang chuan tunah hian chak taka hma lak tum a ni a, agreement ang chuan ni 16 thla 2-a zawh tur a nih laiin 2017 chhunga fur ruah tui a tlak rei avangin hnathawhna hun a tlem em em a. Chuvang chuan, hun tiam chhunga zawh hman a ni ta lo. Khuain a zir chuan April 2018 ral hma ngeia zo tura siam tum a ni, khulai hmun khu remchang hmasaah, vawiina kan resolution neitu kan senior member, amah a bialtu pa nen hian department hotute nen pawh remchangah tlawhna hun ruahmanna kan la siam dawn nia.

Tin, Pu Thanliana khan nikum lamah ram pum buai in kan buai a a ti a, kawng min 984, kawng chim 81, retaining wall chim 94, culvert chhia 83 khang zawng zawng awm chunga sorkar in a hma an la a, khatih hunlai zawng zawng khan khawi khua mahin ei leh bar chungchangah buhfai supply leh gas ah te harsatna an neilo te kha a lawmawm hle a ni.

Tin, kawng chhe chungchang report dawn a nih te khan zing a ni emaw, zanlai a ni emaw PWD thawktuten JCB awm ang angte leh an bungraw neih ang angin a hmunah an kal a, a theih ang angin an clear nghal zel a. Chumi a nih avang chuan khatih hun laia kawng chhiat avanga khualzin zan hnih tangkhang sawi tur hi kan hre kher awm lo ve. Chutiang chuan nasa takin PWD hnathawktu te hian hma an la a. Tin, kan JCB neih te pawhin a daih lova, chungte avang chuan mimal ta te kan hire a ngai a, chutiang chuan theihtawp kan chhuah a. Kawng a chhia kan pha lo, amaherawhchu mipui vantlangin ei leh bar chungchangte leh thil dangah zin miten harsatna lian tham an tawh sawi tur a awmlo a ni.

Tin, Shimla te kan zuk kal a, khangte nen te khan kan ramte kan han tehkhin thin hi lawmawm ka ti. Keini rambuai kum 20 tal tapin min thut beh, chumi hnua bul tan ve dek dek te, kan hmasawanna, kan hmalakna chak tak avanga ram changkang zawkte nena han khaikhin kan han ni thin te pawh hi a lawmawm tak zet zet a ni.

Tin, NGO te fuihpawrh ila, sum te pe ila tia thahnemngaihna-ah, hetiang zawnga fuihpawrha sum pe lam ni lovin, kawng tha zawk kan neih theihna turin

vawiinah hian PWD ten hma kan la mek a ni. NGO te nena thawhhona tur te pawh ruahmanna kan siam chho mek a ni tih ka sawi duh a.

Member zahawm tak Pu Lalruatkima'n kum 10 chhung zet harsatna kan tawh a nih chuan a han ti chho a, kum 10 chhung zet hi harsatna kan tawh lo a ni tih chu a hrechiantu amah kha a nih ka ring a. Tin, chhuanlam hrang hrang avangin kum 20 chhung ruahtui tlak tam ber kum a ni lo, nikum kha an ti te pawh kha kan lo teh ve si se lo va. A tehtu te teh zat pawh kan lo hre lo, amaherawhchu vawiinah hian ka sawi duh chu kan ngaihthlak tak ang khan, nikum kha ruah sur rei ber kum a ni. Chumi ina a tih chian em em chu, nikum February atanga November thleng khan ruah a sur a, chumi avang chuan black topping leh khuar hnawh hna khan awmzia a nei thei lo reng reng. Kan han hnawh chhun te pawh reiloteah ruah a sur zel avangin motorin a chil pherh darh vek zel. Cheng nuai khat man, a hnawh nana lung han lak khawm te pawh khan awmzia a nei thei lo. Kolasib lamah te pawh an mangang a, Truck Owner Association ten kan han la khawm ve ang e, an ti a, an han lakhawm tak na a, khuain a zir miau loh avangin a hman tangkai tak tak theih loh a ni. Chuvangin, nikuma ruah sur tam dan kha chu a hre duh tan chuan hriat theih a ni a, khatih chhung khan kawng siamtha turin hma lak theih ngaihna a awm lo, eng sorkar mahin khatih chhung khan kawng tha tak an siam thei lo. 2014-ah khan truck ke 12 nei te hi hmuh tur a la vang khawp mai (PU LALRUATKIMA : Pu Speaker, kum 10 kal ta khan truck ke 10 nei pawh hi engemaw zat ka lo nei ve tawh a sin, khalai kha chu a dik lovang, kan Minister...) A lo neih tawh chuan a lawmawm a nih chu, ka lawmpui khawp mai che, chutiang zat ilo nei tawh chu. Amaherawhchu, tun ang hian motor lian rit phur tam thei hi tun hmain a la awm lo tih chu khawvelin an hria a ni, chu thu dik chu ka sawi mai a nih chu.

Tin, Kawnpui leh Buichali kawng, contractor revised estimate an siam sak a, party fund-ah kan pe tawh a ti tih kha a bengvarthlak ka ti. Amaherawhchu, hemi hi Ministry of Road Transport lamin agreement sign hnuah a specification kha an rawn tihdanglam avangin helai hi siamthat leh a ngai a. Tichuan, kan thuneihna piah lamah keimahni revised ni lovin Ministry of Road Transport lamin a agreement siam vek tawh hnuah an rawn siamthat leh vang a ni. Tin, ruahtui tam vanga kawng min bakah hian Telecom lam in cable an phumna avang pawh hian nasa takin kan kawng hian harsatna a tawh phah ve nghe nghe a ni.

Tin, KDZKT contract rate sang a tih kha SOR hlui base a sang a ni. Tin, tender tihfel laia a rate thar ang chuan below SOR a ni zawk, tender chhuah laia rate hlui atanga a san em avangin state PWD in a pawm theilo NEC-ah a thawn thla a, an pawmpui hnuah chauh agreement ziah tir ani. Tin, competitive rate a ni a, a hniam ber a nih avangin ani hi pawm a ni ta a ni. Chu chu thil awmdan a ni. Party fund-ah hian he House-ah ngei hian sorkar hmasaa leader chuan 3% kan la a ti a, chu chu a sawilan chin a ni. Mahse a khawntu chuan 3% sakah 10% an lak sak baw, PMGSY contractor hnen atangin, chu chu MNF sorkar lai ami ani. Keini lak ve kan nei a nih chuan chiang takin in rawn sawi dawn nia.

S P E A K E R : Ngawi rawh aw, thu chung khan Minister dinglai han chhan kha a tih chi loh a nia.

Pu LAL THANZARA, MINISTER : 3% plus 10% an la tih hi chu khawvel hriat a ni. Chumi avanga vawiin thlenga kawng chhe ta hi kan ni a ni.

Lei chim hi a vanduaithlak a, pawl kan ti. Tin, rilru pangngai pu a, a chim dan hi ngaihtuah chiang duh tan chuan bridge part thenkhat lo ruk bo lai kara motor lian in a trailer te a phur a, a zawh avanga chim te an ni a. Chumi piah lamah chuan bitumen phurh theih tur zat aia bitumen phur truckin a zawh avanga chim ta te a ni a. Tin, tui rawn lian phutin a shattering (a do tu) a len tak phut avanga khami cement la in set si lo chimte a ni, heng hi a pawl kan ti a. Heng avang hian a department engineer te kan mawhpuh lo, kei mahni PWD leh a changtu mawhpurhna a ni tih hi kan phalo a ni

Tin, lei i maintain ang u tih te a ni a, lei hi kan maintain a, tunah hian a viltu kan indah reng a ni. Tin, lungtha zawk, material tha zawk hman pawh hi kan duh, mahse kan sum neihin a tlinlo a ni. Member zahawm tak Er. Lalrinawma khan kan pawisa neih tawh atanga 38% chauh kan hmangte hi hmang tha tawh kan in ti em a tih kha, hmangtha tawh kan in ti lo. Amaherawhchu, kan pawisa neih zat kan rawn sawi zawng zawng hi January atanga kan hmuh kha a ni lo, a tam zawk hi last quarter a kan hmuh a ni a, tun thla thlenga kan la hmuhte an ni. Chuvang chuan nichina an rawn sawi ang khan, AA te a awm mai theih loh avanga hman mai theih loh te a awm a, kan pawisa neih hi kumtir atanga kan thut beh renga kan hman chhuah loh a ni lova, a tahtawla kan hmuh chhoh tling khawm a ni. Engineer te kut phuar hi an awm a nih chuan thian tha hrilhin min rawn hrilh sela, an kut phuar chu

ka lo phelh sak ang. Tin kawng chhia siam vat vat hi keini pawhin kan duh, amaherawhchu, maintenance fund hi a siam hunlaiin kan nei mai lova, siam vat khan a tha tih chu kan hre ve tho a, mahse maintenance fund kan neih ngang si loh hi chuan a siam vat hleih theih loh a ni tih kha kan sawi duh bawk a. Maintenance fund atan hian 300 crore vel kan mamawh laiin 39.5 crore vel chiah kan nei a ni.

Dr. K.Beichhua khan kalkawng leh kan lei te hi in tihfuh loh lai chu a ni a ti a. Dr. Beichhua hi kan hriat angin Siaha lam bialtu a ni a, a bial atanga a lo kal vang vanga Aizawl a rawn thlen hian a lungawi viauin ka ring, a kawng rawn zawh tlang hi. Tin, thalah kan contractor te kan control leh theilo tih hi control theih loh an awm ka ring lo. Contractor te nichina kan House Leader-in a sawi ang khan a bikin Highway lam hi chu central atanga tender an ni a, a ram leilung an hriat loh chu thu dang ni se, working season kan neih tlem zia hi an hrelo a ni. Working season tlemte chauh kan nei tih hi an hre lova, chuvangin pawn lam mi hian harsatna an tawk thin a ni.

Tin, kan Group Leader zahawm tak Pu Vanlalzawma khan Tlawnglui leh Pukpui inkar chungchang a rawn sawi a. Nia, sawlai saw sawlam life line a ni tih kan hria a, keimah ngei a bul tan dawn khan a hmunah ka va kal a, sawlai local contrator te thawh tir kan tum khan lung van zia leh kawng siamthat a ngaih tur si zia te an han ngaihtuah khan an cho ta lova, chumi hnuah chuan hnam dang contractor pahnih thawk turin kan request ta ringawt a, anmahni min rawn dil pawh ni lovin. Tunah hian hma an la mek a, ka va kal hnuah chuan kan Engineer-in-Chief leh kan CE te'n ruahmanna an va siam a, ruahmanna an siam a contractor kan offer ten an thawh ngam tawh loh hnua vai ho kan han rawih hnuah pawh khan keimah ngeiin engtin nge ni an bul tan an tum dante hi tiin a hmunah ngei va kalin a thawktute nen pawh ruahmanna kan va siam a. Sawlaih Lunglei thalai pawl te nen te pawh kan va inkawm a, tiang chuan sawlai hmunah sawn kawng tha tak an neih theih nan tunah hian theih tawpin hma kan la a ni. Tin, kan kawng a tha dawn chuanglo tiin mipui te pawh hian min ngaithlatute hian ngaihtuahna an hmang mai awm mang e aw tih kha kan group leader khan an hlauthawng deuh a. Nikum lam anga min bumro leh a nih loh chuan kan sum neih te leh kan engineer tha tak takte nen hian kawng tha tak neih kan tum a ni. Chutiang ti thei tur chuan hma kan la dawn a ni. Tin, kan engineer te tunah chuan tun hma lam engineer hman tlak loh eng emaw zat awm thin ang kha an ni tawh lova, hna ah hian an inpe em em a, an

ngaihtuahna nasa takin an seng a, anmahni pawh an taima hle a ni. Tin, kum kaltaa kawng chhiat nasat dana an hmalak dan atang te pawh khan a hre duh chuan kan hria in kan hmu thei awm e. Chutiang chuan waviinah hian hma lak tum a ni a, kan sawi tak ang khan khua in min bumro lo a nih chuan kan hmalak tum mek ang hian kan kal chhoh theih chuan tun atanga reiloteah Pu Speaker, i vei lama thu te pawh in tha an tih tur khawp hian kawng hi siamthat kan tum a ni. Chumi a nih avang chuan kan amended resolution, ‘hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti a ni,’ tih hi kan thlawp a. Tin, chutianga kan hmalakna tur ang hetiang ang kan lehkhabu hring pawh hi i vei lama thu te kha kan lo pe ve dawn nia, ka lawm e.

S P E A K E R : Tunah chuan a resolution neitu kha kan ko tawh ang a, Pu K.Sangthuama kan ko hmasa ang a. Pu Vena khan i sawi duh ve tho ang ti raw? Aw, an pahnihin kan sawi tir ang a, tichuan vote kan la dawn nia. Pu K.Sangthuama i sawm ang u.

Pu K.SANGTHUAMA : Pu Speaker, ka lawm e. Member zahawm tak tak ten thu ngaihnam tak tak an sawi a, a lawmawm a, a zah pawh a zahawm khawp mai a. Tlem a zawng han sawi ve leh ta ila, thui tak chu sawi a tul tawhin ka hre lo va. Amaherawhchu, member thenkhat 2,3,4 velin thudik tawklo sawi leh thawh loh te sawi anga an rawn sawi kha, hetilaiah hian hemi bu zawng zawngah hian PWD ten 2007-a an thawh an rawn sawina a ni a. Pu Speaker, hemi bak hi chu ka rawn sawi lo va. Tichuan, Bilkhawthlir-Saiphai Natasura road; (hei hi ka rawn sawi kha a ni a) tin, Bilkhawthlir-Buhchang-Bairabi road 58 kms. National Highway standard tha taka siam a ni. Kum 2008-ah hian double lane tura laih zauh mek a ni, tih kha ka rawn sawi tel bawk a.

Tin, Pu Speaker, Serkhan-Bagha kha kan lai e tiin ka sawiin ka hre lo va. Ka lo sawi palh a nih chuan helaia sawi tura ka ruahman ang a ni lo va, record-ah a awmin ka ring a, kan lai ka ti lo va. Kha kha member zahawm tak tak te khan in lo hresual a nih kan ring a. Chuvangin, thawh loh thawk anga sawi ka ni lo va. Kan thawh chu PWD khatihlaia kan Engineer ho in an rawn buatsaih ngei hei hi a en theih vek a, in duh chuan a bu pawhin kan pe thei ang che u a. Chuvangchuan, hemi a ziaak bak hi ka sawi lo ve tih kha sawifiah nan Pu Speaker, kan sawi duh a ni.

Pu Speaker, nichin khan, ‘suggestion, a siam that dan tur emaw chungchangah sawi i nei lo,’ an ti a. Ni e, tun a tawpah hian suggestion eng eng emaw sawi ka tum avanga a kawng siam thatna atana thil tha awm ni a ka ngaih chu hetilaiah hian ka lo ziaak lawk vek a. Chu chu tlem azawng kan sawi ve leh phawt turah kan ngai a. Kan PWD hnathawk hi a thawktute kan dem hrim hrim emaw; tin, department changtute kan dem hrim hrim emaw, sorkar kan dem hrim hrim lam kha a ni lo va. A chhan chu tun aia tha zawk leh tun aia chak zawka hnathawh theihna kawng kan zawn vang a ni tih Pu Speaker, min lo hriatpui turin kan duh che a. Vawiinah hian ka lawmna em em chu kan zavaiin kan kawng a tha tawk lo a ni tih kan pawm tlang niin ka hria a. Chuvangchuan, a tha tawk lo tih kan pawm tlan si chuan tun aia chak zawka hnathawh hi a tha lawm ni ti a resolution kan siam hi min pawmpui thei mai sela a tha in kan ring a. Naupang pawhin lehkha an zir a, ‘i lehkha zir hi i zir tam tawk lo ve, hei aia tam hi zir la, matric chu hei aia sang hian i pass thei ang a,’ tehkhin nan kan ti thin a. Chuvangin, zanah dar 8 thleng chauh lehkha zir thin kha, ‘dar 9 emaw, 9:30 thleng emaw hi chuan zir la tun aia tha hian i pass thei ang,’ naupang hnena kan ti thin ang hian tun aia chak zawka hna kan thawh hian kawng tha kan nei thei zawk ang a tih ngaihtuahna atanga resolution hi rawn siam kan ni a. Kawng a tha tawk e tih sawi awm kan member zahawm tak tak te hnenah khan ka hre lo a. Chuvangin a tha tawk lo deuh chu ni awm tak a ni a. Chumi tha tawka, chak zawka hma la tur chuan kan phut ve a ni.

Hetiang hian rawtna chu kan siam chho ve a. Kawng black-top na tur atan hian lung chang tha hman hram theih ni se. Tin, khawl tha zawk, machinery tha zawk hi PWD hian ngaihtuah sela. Tin, mimal contractor in hna an thawh pawhin PWD te hi bum mai mai lovin, khawl tha zawk nei te chauh contractor hi hna pek ni ta bawk sela.

Pahnihna atan chuan black-top hi kan ram ni lo, mi ramah chuan nichinah an rawn sawi ang khan kum 10 atanga kum 15 thlenga tha tura buatsaih thin a ni a. Mahse, kan ram te chu chutiang a ni ve lo tih kan hre theuh a. Chuvangin, kum 3 atanga kum 5 erawh hi chu tha ve tur anga ngaih theih a ni e tih a ni a. Chuti a nih lai chuan a tlangpuiin kum 1 hi a daih awrh a ni mai a, kan hre theuh a. Nikum April-a black-top kha kuminah hi chuan a chhe leh tlangpui deuh a ni a, hei hi zep thu a cheng lo va, kan hmu theuh a, kan kal a. Chuvangin, contractor te hian standard quality, standard work quality-a thawk hram hram turin kum 3 atanga kum

5 tal tha thei turin khawl tha hmang a, a standard work quality hi ti hram hram turin PWD te hian ngaihtuahna hmang turin vawiin ah hian suggestion kan siam duh bawk a. Tin, pathumna ah chuan contractor thlan uluk theih ni sela. Kan House Leader zahawm tak khan a sawi a, tunah chauh niloin a hma te pawhin a sawi a, ram dang atanga tender rawn chhang hian a condition an hrelo a, kan ram chanchin an hre lo a, a dikna thui tak a awm a, a dik khawp mai a. An rin chhan pawp thin a, heta an han thawh leh hian harsatna tam tak an tawk thei a ni tih ngaihtuah lo in a hmun pawh en lo in an chhang pawp mai thin a, chu chuan harsatna thui tak min thlen thin a. Chuvangin contractor te pawh hi helaia chhan ve theih tur ang china central lam pawh hi kan nawr a ngaiin ka hria a. Hei pawh hi kan Minister zahawm tak te hian ngaihtuahna han siam se, chumi entirna atan chuan tunah khuan Sihhmui atang Ramrikawn kal tura hi kan hluihlawn deuh hlek ni hian ka hria a, tuna han thar thawh leh turin vawibelchhe za vel tunah hian estimate siama central-ah an pass vek hnu ah, helaia chhan ve theih in i ti ang u, tiin ngaihtuahna an siam a, tunah hian chutiang tur chuan a in dah mek niin ka hria a. Chuvangin vaibelchhe za lo deuha helai ami ten an thawh ve theih a, a siam theih a nih chuan khulai pawh a siam theih a nih chuan a dang pawh hi a siam theih ang tih kan ring a. Helamah hian PWD Minister zahawm tak leh kan House Leader pawh hian ngaihtuahna tun aiin lo hmang tam se tih kan ngen duh bawk a ni.

Tin, pakhat lehah chuan PWD engineer ten tun aiin kawng black top hna hi vil uluk sela, hma tun ai hian la chak sela, contractor te instruction tha leh zualin pe sela. Vantlang leh opposition in helai hna chu a tha lo e a, tih kan sawi emaw, vantlang in a complain emaw nghak lo hian PWD a enkawltute hian tun ai hian theihtawp an chhuah leh zual hi ngaiin ka hria a, rilru berah hei hi lo nei se a tha in ka ring a ni.

Tin, nichinah te pawh an sawi tawh a, a theih chin chin ah RCC a kawng hi siam tum ni ve ta sela. Vawikhatah chuan kan zolo ang, Pu Speaker, kan siam vek thei lo ang tih chu thil Chiang sa a ni a, mahse a theih chin chin ah hian bul tanin, ngaihtuahna siam turin rawtna kan siam bawk a ni. Tin, pakhat lehah chuan kawng laih leh black topping hi agreement-a a hun chhunga zawh hman hram tum ni sela, hemi hun chhunga zolo te chu cancel sak emaw hrem emaw hi PWD hian a ti ngai vaklo in ka hria a, mahse hetah hian inthlahrung lo in hrem emaw, an hna cancel emaw in helaiah hian rilru nei ve se a that kan ring a ni.

Tin, kan ramah chuan kum 3 emaw kum 5 emaw chauh daih tura ngaihtuahna awm a ni a, a dik pawh a dik thawkhat viau a, chutihruah erawh chuan kum 3 vel hma atang hian resurfacing hi tih tum ni ta mai se, a chhiat vek hnuah Pu Speaker, resurfacing tih leh thin hian pawisa kha a lo ngai tam a, a lo daih thin lo a. Chuvangin a chhiat vek hma hian resurfacing hi tih tum ni ta se a that ka ring a. Tin, maintenance fund, nichina kan Minister zahawm takin a rawn sawi kha ka rilruah awm chiah a ni a. Maintenance fund hi a tlem em em thin a, hetah hian tam deuh zawk dah ni se chuan a hun taka kan chei theilo te, kan siam tha theilo te hi, maintenance fund hi duh tawh tak taka hman tur a awm theilo a nih pawhin tun aia tam zawk dah hi chu ni se a that ka ring a. Hei pawh hi dah theih ni sela tih hi rawtna kan siam duh bawh a.

Tin, lei dawh chungchang ah hian Engineer-in-Chief hnuah hian a division hran hi dah ta ila a tha mai awm mang e aw, tih ngaithuahnate ka lo nei a. Hei hi a tih theih chuan hmalakna ah hian kan tangkaipui viau keichuan ka ring a ni. Tin, a pakuanaah chuan manpower hi tih chak ni se tun, aia manpower hi kan tihchak deuh chuan kan hnathawh pawh hi a sawt deuh zualin kan ring a ni.

Tin, sawmna ah hian thawk thalo leh a huna zolo contractor te hi hrem thin ni se tih Pu Speaker, kan rawt duh bawh a. Department-te hi ngaih a sam deuh hlek a, Mizoramah hi chuan inhrem hi kan hreh em em a. Mahse kawng leh PWD hnathawh chungchangah hi chuan hrem te pawh hi han awm ve zeuh zeuh pawh ni se. A tlangpui thuin Pu Speaker, hrem hi an awm tlem em em a, chuvangin thawk thalo, a huna hna zo duhlo chu hrem ve te pawh hi ni se a tha awm mang e aw tih ngaihtuahna kan hmang a, rawtna kan siam bawh a ni.

Tin, pakhat leh ah chuan contractor chhanna rate SOR aia hniam chu pek tawh loh ni se, sorkarin hemi chungchang hi Dan siam mai ni se. Chumi kan sawi awmzia chu SOR aia hniam 10 % te, a then phei chu 30 % aia hniam ten an lo chhang a, chutah an la hralh leh ta nghal a, hetiang chuan hna that ngaihna pawh a awm lo a. Chuvangin tun hma deuh hleka an tih dan ang khan schedule of rate aia hniam chhan hi tih loh tur a ni tih emaw, helai hi chu sorkarin a hria ang a, Department ten an hria ang a. Hetiang deuhhleka kan inenkawl loh chuan kan hna hi a thalo zel ang tih a hlauhawm a, hei hi rawtna kan siam bawh a. Tin, pakhat lehah chuan sorkarin contractor te hna an pe a, a pek lo hralh ta mai hi kan tam em em mai

a, tunah chuan Manipur ang deuh kan ni tawhin ka hria. Keini chang pawh a ni chuanglo a, phai lam atanga Mizoram atanga contractor nilo, contractor lian pui pui pawh khuan an rawn hralh tho mai kan ramah hian. Hei hi a mak angreng khawp mai! Hei hi engtinng e kan tih reh ang tih chu kan hotute, kan Minister te, kan House Leader te pawh hian ngaihtuahna chiang zawk hmang sela. Hetianga an hralh chhawn hian a contractor taka kha chu a pathumnate an ni tawh mai thin a. Hei hi chu a diklo, a tih reh dan hi ngaihtuah nise a tha ang tih kha ka rilru ah an awm a.

Tin, a tawp ber ah chuan bar chart siam a, an hnathawh dan hi kan Minister zahawm tak pawh hi thurawn han pek kan duh a. Supply Minister-a kan awm ve lai khan ka room ah khan lianpui maiin Board ka tar a, kudam zawng zawng kha ka zia k chhuak vek a, wawiina kudama buhfai awm zat tiin (wawiin ni 10 a ni a, naktuk ni 11,12,13 tih khan) ka zia k vek a. Tichuan a tuk zingah khan Pu Speaker, chutilai ah chuan buhfai engzahng e awm, engzahng e an thawnchhuah, engzahng e chutiang chu la awm tiin ka zawh tir leh chat chat a. Tichuan, buhfai awm lohna lai ah chuan, 'hetilai ah khan wawiinah chutizat thawn ula, tiin ka ti ve thin a. Chutiang deuhhle k chuan kan Minister zahawm tak hian an hnathawh kalphung leh eng i lo kha tun aia uluk zawk hian lo enpui ta se kan chak zawk mai awm mange aw kan ti a. Khangte kha ka suggestion te chu a ni a.

Engpawhnise, a lawmawm a, wawiinah kawng that taw k loh zia chu kan pawm tlang theuh a. Kan pawmtlan theuh rual erawh chuan pass duh dan kha a inanglo hret a ni mai a. Chuvangin, keini chuan wawiina kan resolution rawn thehluh, 'hun rei tak atanga kawng leh lei chhia avanga harsatna kan tawh sukiang turin nasa leh zuala hma lak ni se,' tih hi tha tawkin Pu Speaker, kan hria a. Helaia kan MLA zahawm takin amendment a rawn siam, 'hmalakna kal mek hi tha kan ti'. Hmalak kal mek hi engemawchen chu a tha tho e, a tha lo fai vek chu kan ti reng reng lo Pu Speaker. Mahse, tun aia chak zawka hma lak kha kan la duh a. Chuvangin Pu Speaker, he ka resolution "Hun rei tak atanga kawng leh lei chhia avanga harsatna kan tawh sukiang turin nasa leh zuala hma lak ni rawh se" tih hi khawngaih taka kan zavaia min vote pui turin ka rawn ngen e. Ka lawm e.

SPEAKER : Pu Vanlalvena i lo sawm ang.

Pu R. VANLALVENA : Pu Speaker, ka lawm e. Vawiinah kan thahnemngaihna a lawmawm tlang khawp mai a. Resolution puluttu zahawm tak Pu K. Sangthuama'n kan Resolution kha min thlawp ve a, 'sorkar hmalakna hi a tha kan ti e,' a rawn ti te kha a lawmawm ka ti a. Lawmthu kan sawi hmasa duh a.

Pawimawh leh zual ah chuan kha kan sorkar hmalakna kan Minister zahawm takin, 'a copy kan pe ve ang,' a tih kha kan lo la nei kimlo a nih hmel a. Kan resolution neitu zahawm tak pawh khan a copy kha a lo la neilo a nih hmel a. Han chhiar chiang se chuan tuna rawtna a siam tam zawk kha chu kan hmalakna mek a ni tih a hriat theih ka ring a. Chuvangin Private Resolution a luh dawn hian (engemawzat hi a lut a, tun ah pawh hian 6 lai a awm a) a pawha pawh chhuah a nih avang hian tuna pakhatna ni lo a dang zawk hi pakhatna pawh ni ta se chuan amend dil ngai miah lo a kan pawm tlan vek theih tur a ni a. Amaherawhchu pakhatnaa rawn chhuak ta ber kher hi sorkar-in hmalakna tha tak a neih lai mek a nih avangin tlemte hi siamthat ngai; resolution neitute hian la hriat kim loh lai an nei a nih hi maw kan tih avanga tlemte siam that rawn dil kan ni tih kha Pu Speaker, a hmasain kan sawi duh a.

Kan hmasawinna hrang hrang kha sawi duah a ngai tawh lo a. Kan hmalakna tha tak tak, kan Minister zahawm tak pawhin nichin khan an rawn sawi a. Tlema harsatna contractor chungchanga an neih te pawh a hmunah kalin a chhang lo tute pawh thahnemngaihna avangin tlawmngaia thawk tura a ngen a, an thawhzui thu te kan hria a. Harsatna awm lai ah chuan a hmun ah a tlawh zel a ni. Chu bakah kan thawktu Engineer zahawm tak tak ten nikum lama khawchhia avanga kawng tha lo te pawh, chhun ah pawh, zan ah pawh, englai pawhin leimin thar a awm pawhin a hmun pan in an siam tha zel a ni tih te kan hria a ni, i dinglam ami te hi chuan. Veilam ami te hian an hre tho ang a, mahse an hre hreh deuh te pawh a ni ang e. Chuvangin helai an resolution a kha siamthat ngai kan ti a ni.

Vawiinah hian kan PWD, te leh kan Minister te hmalakna tha tawh kan tihna lang chiang em em point khat chauh sawi kan duh chu- kum

hmasa lama kawng chhe chungchang resolution kan sawi lai khan kan Department lam enkawltute hi an thu miah lova, (helai kan tlar ah hian) kan sawi kan sawi thin a. ‘Helaiah keimahni leh keimahnin kan sawi kan sawi a, a thawktu zawk hi an thu der si lova,’ kan ti a. Vawiinah erawh chuan an thu thup a, hei ringawt pawh hi kan resolution rawn siam chhan te zinga tel ve, kan hmalakna hi a tha tawh a ni kan tih te zinga point pakhat te zing ami a ni.

Chuvangin Pu Speaker, ka sawi rei lovang, kan hre vekin ka hria a, sawi thui vak ngai lo in. Kan sorkar hmalakna hi a tha tawh kan ti a. ‘Hun rei tak atanga kawng leh lei chhia avanga harsatna kan tawh sukhang tura sorkar hmalakna kal mek hi tha kan ti,; tih hi min pawmpui turin ka ngen a che u. Ka lawm e.

S P E A K E R : Awle, kan duhtawh mai ang a. Kan hriat angin kan dan 136-na hian hun pawhsei theihna Speaker-ah pe mahsela, Speaker-in ama thuin hun a pawtsei ve ngai lo tih hi hria ila, House ngaihkan kan la thin a. Nichin khan House ngaihkan dar 4-ah khan kan la ta a. House-in a tawp thlenga hun kha pawh sei a, hei hi chu tih zawh hman hram kha kan duh avangin hun kan pawt sei ta a. Tin, vawin ah hian maximum hun kan inpe a ni. Kan dan ah hian 15 mins. aia tam chu a phal lova, minutes 15 member tin kan inpe a, maximum kan thleng a. Tin, duhtawkin kan sawi a, kan zalenna a ni a, hei hi kan House a ni a. Member ten zalen takin thusawi theihna hun in nei a. Vawin phe chu Private Members ni a nih ang takin member ten zalen takin hun kan hman thei a, a lawmawm hle a ni.

Kan buk tawh mai ang a, kan buk dan tur erawh hi kan chhiarchhuak ang a, a pahnih khan a khawi zawk nge kan duh ti khan kan buk tawh mai dawn, vawihnih vote lak kher ngai lovin. Tichuan kan ti mai theiin ka ring. A pakhatna original MLA zahawm tak Pu K. Sangthuama resolution chu hei hi a ni, ‘Hun rei tak atanga kawng leh lei chhia avanga harsatna kan tawh sukhang turin nasa lehzuala hmalak ni rawh se’ tih a ni a. Hei hi siamthat deuh hlek ni se la tiin MLA zahawm tak Pu Vanlalvena’n amendment a rawn siam a, chu a siam chu hetiang hi a ni, ‘Hun rei tak atanga kawng leh lei chhia avanga hasrsatna kan tawh sukhang tura sorkar hmalakna kal mek hi tha kan ti’ tih a ni a. ‘Tha kan ti’ tih leh

‘Hma lak zel ni rawh se’ tih kha a ni mai, a danglamna chu. ‘Hma lak zel ni rawh se’ tih leh ‘Tha kan ti’ tih kha kan buk dawn a ni.

Tunah hian a hnahnung zawk kha ‘Tha kan ti’ tih kha a ni a. Chuvangin, ‘Tha kan ti’ ti zawng kha vote kan han la phawt ang a, kan sawi tir phawt ang che u ang a. Tihian ka’n chhiar ang a, ‘Hun rei tak atanga kawng leh lei chhia avanga harsatna kan tawh sukiang tura sorkar hmalakna kal mek hi tha kan ti’ tih hi pass remti zawngin ‘Remti’ ti ru le. (Member : Remti)

A nih chuan, pakhat kha ka’n chhiar veleh ang a, ‘Hun rei tak atanga kawng leh lei chhia avanga harsatna kan tawh sukiang turin nasa lehzuala hmalak ni rawh se’ tih hi pass remti zawngin ‘Remti’ ti ru le. ‘Tha kan ti’ tih kha a tam zawk a, chuvangin ‘Original resolution is defeated by the amended resolution’ tih a nih chu.

Tichuan, vawiina kan tih tur chu tha takin kan ti zo ta a, kan chawl rih ang a, Thawhtan tahrik ni 19 zing dar 10.30 –ah kan kalkhawm leh dawn nia.

The House is adjourned. 5:15 PM